

Գիրքը յուսադատճեհահանվել է
A-PDF DjVu TO PDF DEMO: Purchase from www.A-PDF.com to remove the watermark

"Նամահայկական էլ. Գրադարան"

կայքի՝ www.freebooks.do.am

կողմից եւ ներկայացվում է իր

այցելուների ուշադրությանը:

The book created by "PanArmenian E. Library"



Գիրքը կարող է

օգտագործվել միայն ընթերցանության համար...

For more info: www.freebooks.do.am

Library

ՄԱՅՑՈՒՄ ԿԱՐՆԱԿԱՆ ԵՐ ԶԵՐ ԼՈՐՄԻՆՈՒՄ ԸՆԴՈՒՄ ԸՅՅԱՅԱՍ
ԳՐԱԿԱՆՈՒԹՅԱՆ ՏԱՐԱԾՄԱՆ ԳՈՐԾՈՒՄ ԵՎ ԻՆԿՍՏՐՈՒ
ԼՈՒՄԳՈՍՏՔԵՆԱՆՈՒՆԵԼ ԳՐԵՐ:


ՔՐՈՑՆԻ ԳՐԵՐԻ ՄՏԵՐՈՄԱՆ ՄԱՆԸՄԱՆՈՒՆԵՐԸ ԿԱՐՆԱԿԱՆ
ԻՄՈՒՄԱՆ "ՇԱՄԱՆՅԱՅԱԿԱՆ ԷԼԵԿՏՐՈՆԱՅԻՆ ԳՐԱԿՈՐՄԱՆ" ԿՈՑՔԻՑ

www.freebooks.am

ԵՆԴՐՈՒՄԱՆ ԵՎՆ ՈՐ ԺՐՆԱԿՆԻՄ ԵՐ ՄՏԵՐ ԿՈՑՔԻՑ
ՑԱՆԿՈՒՄ ԵՎՆ ՀԱՇՎԻ ԸՆԹԵՐՏՈՒՆԵՑՈՒՄ:



ԳՐԵՐ ՄԻՑ՝ freebooks@rambler.ru



Ն. ՌՈՒՄՅԱՆՅԱՆ
Ի
ՌՈՒՄՅԱՆՅԱՆԻ
ՄԱԿՈՒԹՅՈՒՆԸ

ՆՎԱՐԴ ԹՈՒՄԱՆՅԱՆ

**ԹՈՒՄԱՆՅԱՆԻ
Մ Ա Ն Կ ՈՒ Թ Յ ՈՒ Ն Ը**

**«ՅՈՎԵՏԱԿԱՆ ԳՐՈՂ» ՀՐԱՏԱՐԱԿԶՈՒԹՅՈՒՆ
ԵՐԵՎԱՆ 1988**

Թումանյան, Ն. Հ.

Թ 949 թ Թումանյանի մանկությունը: Դպր. միջին և բարձր տարիքի համար:— Եր.: Սովետ. գրող 1983.—84 էջ, 10 նկ.:

Մեծ բանաստեղծի դուստրը՝ Նվարդ Թումանյանը, պատմում է հոր մանկական ու դպրոցական տարիների մասին: Նա մի առանձին սիրով է գրում Լոռու հիասքանչ բնության մասին, որը եղել է բանաստեղծի ներշնչանքի աղբյուրը:

4803010000(6)

Թ _____ 84 «Տ»

705 (01) 88

ԳՄԴ 88.821

ՏԱԲ1

ԲԱՆԱՍՏԵՂԾԻ ԾՆՆԴԱՎԱՅՐԸ

Էն Լոռու ձորն է..

Հովհաննես Թումանյանն իր մանկությունը՝ կյանքի առաջին տասը տարին, անց է կացրել իր ծննդավայրում՝ Լոռու Դսեղ գյուղում (այժմ Թումանյան) և նրա սարերում:

Նա ապրել է քաղաքի կուլտուրային անձանոթ միջավայրում՝ հին նահապետական գյուղում՝ ժողովրդի մեջ, ժողովրդի հետ, տեսել է նրա ուրախ ու տխուր օրերը, նրա նիստ ու կացը: Ապրել է իր հայրենի օջախում: Լոռու շքեղ ու շուայլ բնության գրկում՝ ազատ, անհոգ և ուրախ, շնչել է լեռնային մաքուր օդը և անտառների թաքմ բույրը:

Հովհ. Թումանյանի մանկությունը նրա կյանքի ամենապայծառ շրջանն է, որ բանաստեղծի հուշերում մնացել է որպես «լուսաշող երագ», որպես «պայծառ առավոտ»: Հետագայում նա առանձին կարոտով ու թախիծով է հիշում այդ օրերը, այդ օրերի հետ կապված վայրերը, դեմքերն ու դեպքերը:

Թումանյանը մանուկ հասակում ապրել է Դսեղ գյուղում, իսկ պատանեկան տարիները (1879—1883 թ. թ.) անց է կացրել Զալալօղլում (այժմ Ստեփանավան), հետո (1883—1886 թ. թ.) Թիֆլիսում՝ Ներսիսյան դպրոցում: Թիֆլիսում են անցել բանաստեղծի կյանքի հետագա տարիները:

* * *

Կուսական է եղել Լոռին անցյալում, հարուստ, խիտ և անանցանելի անտառներով:

Այն վայրերը, ուր այժմ Զորագետի էլեկտրակայանն է լուսավորում, ուր բանաստեղծի անվան հրակայուն հանքերի գործարանն է գտնվում, մոլոն էին, խավար, վայրի ու ամայի:

Լոռու մթին անտառներն ու ձորերը առաջին անգամ լուսավորվում են, կենդանանում, երբ 1898 թվին կառուցվում է Թիֆլիսից Ղարս տանող երկաթուղին:

Մինչև այդ ամբողջ Լոռին պատված էր անտառներով, որտեղ փարթամորեն աճում էին հաստաբուն ընկուզենին, կաղնին ու հացենին, հաճարենին ու լորենին, վայրի տանձենին ու սալորենին և այլ պողատու կամ անպտուղ ծառեր: Բարձրաբերձ լեռները հարուստ էին վայրի կենդանիներով ու թռչուններով, ժայռերի գլխին թռչկոտում էին այծյամներն ու էրեները:

Իր հայրենի անտառների բուսական և կենդանական աշխարհի գունագեղ նկարագրությունը Թումանյանը տվել է «Քաջերի կյանքից» պատմվածքում:

«...Դսեղի հանդի սահմանները հարավից սկսվում են զովասուն, քարձր լեռներով, հյուսիսում՝ վերջանում անդրհրախոր ձորերով: Նրա հարավային սահմանում՝ Քոջաքարի ժեռուտ կատարին, թռչկոտում է քոջը* և բուսնում խանձիլ, իսկ հյուսիսում՝ «Չաղի ձորում», ապրում է կարին և հաանում է խաղող:

Այս երկու սահմանների մեջ կան թանձրախիտ, կուսական անտառներ, որ կացնի ձայն չեն լսած, ուր ծառերի փշակներում բույն է դնում մեղուն, թալաններում ապահով վխտում են էրեները, մոռուտներում ինքնիշխան թագավորում է արջը, և շամբուտներում հանգիստ ապրում է վարազը: Կան ժայռեր, ուր բույն են դնում արծիվները և թռչկոտում այծյամները...»:

Իր դիրքով Լոռին մի գեղեցիկ ու անսովի լեռնագավառ է՝ կղզիացած և ապահով, որ հնում, ահ ու վախի տարիներին, ապաստան էր դառնում շրջանի բնակիչների համար: Մինչև հիմա էլ այդ ձորերում մնում են ավերակ տնակների հետքեր, քանդված մամուսպատ մատուռներ:

Լոռին պատմական հարուստ անցյալ ունի: Հնում Լոռին կոչվում էր՝ Գուգարք, Գուգարաց աշխարհ: Այդ ժամանակ էր, որ կառուցվում էին այժմ պատմահնագիտական մեծ նշանակություն ստացած բազմաթիվ հուշարձաններ՝ վանքեր, որոնցով հարուստ են Հաղպատն ու Սանահինը, ապա Օձունը, Արդվին, Դսեղն ու մյուս գյուղերը: Դսեղի ձորումն է կառուցվել ս. Գրիգորի բարձրաշեն վանքը: Այդ վանքի

* Քոջ— վայրի այծ:

կիսավեր պատերը մինչև հիմա էլ կանգուն են նույնանուն գեղեցիկ ձորում:

«Դսեղ գյուղը մեր պատմության մեջ հանդես է գալիս առանձնապես Բագրատունյաց շրջանում, երբ Մամիկոնյան իշխանների մի ճյուղ՝ Համազասպյանները, բնակություն են հաստատում Լոռու Դսեղ գյուղում: Ծինում են իրենց տոհմական գերեզմանատունն ու աղոթարանը՝ Բարձրաքաշ ս. Գրիգորի վանքը»:

Հին Լոռու ընդհանուր պատկերը ամբողջանում է այն պատմական խաչարձաններով և հուշարձաններով, որոնց գեղեցիկ նկարագիրը տեսնում ենք Թումանյանի «Լոռեցի Սաքոն» պոեմում:

...Էն տախտի վրա աղոթում մի վանք,
Էն ժայռի գլխին հսկում է մի բերդ,
Մութ աշտարակից, ինչպես զարհուրանք,
Բռի կոհնչն է տարածվում մերթ-մերթ,
Իսկ քարի գլխից, լուռ, մարդու նման,
Նայում է ձորին մի հին խաչարձան...

Ավերակներով ու հուշարձաններով հարուստ խոր ձորի միջով հոսում է Դեբեդ գետը՝ մերթ սրընթաց ու գիծ՝ իր ժայռոտ ափերը ծեծելով, մերթ մեղմ ու հանդարտ՝ թևերը փռելով իր լայն հունի մեջ: Դեբեդը լեռնային շքեղ բնության գեղեցիկ տեսարաններից մեկն է, որ Թումանյանի ստեղծագործական կյանքում մեծ դեր է խաղացել:

Դեբեդը երկու գլխավոր ճյուղ ունի. մեկը սկիզբ է առնում Փամբակի ձորով, մյուսը Ջորագետն է, որ գալիս է Մթին (Ղարախաչի) սարից՝ Ստեփանավանի ձորով: Այդ երկու վտակներն են, որ Լոռու ձորում, Քոլագերան կայարանից ներքև միանալով՝ կազմում են Դեբեդ գետը:

Դեբեդի աջ ափից սկսվում են անտառները և Դսեղի այգիներն ու բանջարանոցները: Դեբեդի ձորում են գտնվել Թումանյանի տան պապեճական հին ընկուզենու այգին և ջրաղացը:

Դեբեդի ձորափին՝ բարձր ժայռերի գլխին, մի լայն և ընդարձակ հարթավայրի վրա, գտնվում է Դսեղ գյուղը, որի նկարագրությամբ է սկսվում Թումանյանի անդրանիկ պոեմը՝ «Մարոն», գրված 1887 թվին, երբ բանաստեղծը տասնութ տարեկան էր.

Մեր գյուղն էն է, որ հպա՛րտ,
Լեռների մեջ միգապատ,
Խոր ձորերի քարափին
Ձեռը տված ճակատին՝
Միտք է անույժ տխրադեմ.
Ի՛նչ է ուզում՝ չգիտեմ...

Գյուղի երեք կողմում փոված են արտերն ու արտունե-
րը, որոնք շրջափակված են և կտրված ձորերով, իսկ չոր-
րորդ կողմում՝ հարավում, կա մի փոքրիկ լեռնաշղթա՝ Քո-
շաքար գագաթով: Գյուղի դաշտերն ու արտերը հարուստ
են գույնզգույն և անուշահոտ վայրի ծաղիկներով ու վարդի
թփերով:

Դսեղ գյուղից հեռու, հորիզոնի վրա, բարձրանում են
Թումանյանի ստեղծագործության մեջ այնքան հաճախ
հանդիպող լեռները՝ Լավարը, Դվարը, Չաթինդաղը, Ղա-
րախաչը, Քոշաքարը:

Դիմացի հարթավայրի վրա, Դեբեդի ձախ ձորափին,
երևում են Լոռու գյուղերից մի քանիսը՝ Չորագյուղ, Ծա-
թեր, Կուրթան, Ուզունլար, Մղարթ, Այգեհատ և այլն:

Դսեղն իր գեղեցիկ ու անսովի դիրքով իսկապես որ
նման է մի «քնակերտ ամրոցի»: Գյուղի բարձրությունից
Դեբեդի խոր ձորին և քարաժայռերին նայելիս՝ հիշում եք
բանաստեղծի «Լոռեցի Սաքոն».

Էն Լոռու ձորն է, որ հանդիպակաց
Ժայռերը՝ խորունկ նոթերը կիտած՝
Դեմ ու դեմ կանգնած, համատ ու անթարթ
Հայացքով իրար նայում են հանդարտ...

Այդ գեղեցիկ լեռնաշխարհի խավար ու անգետ բնակիչ-
ներն ապրում էին իրենց լեռների վրա թառած. չքավոր-
ները՝ ծխոտ ու խարխուլ գետնափոր տներում, ունևորնե-
րը՝ գլխատներում. չքավորները, քեչայի և թաղիքի վրա,
ունևորները՝ գորգի: Ապրում էին մեծ գերդաստաններով,
հաճախ երեսուն-քառասուն հոգուց բաղկացած, ապրում
սարի ու դաշտի աշխատանքով, փակ ու ինքնամփոփ:

Լոռու գյուղերն իրար միանում էին դժվարանց ճանա-
պարհներով, նեղ ու քարոտ կաժաններով:

Հանգստի ժամերին գյուղացիների հանույքը զրույցն էր.
պատմությունները իրենց նախնիների կյանքից՝ համեմված

առակներով ու խաղերով: Սիրում էին գրուցել «գարնանը՝ սարերի լանջերին, ամառը՝ ծառերի շփաքում, ձմեռը՝ պատերի տակին արևկող արած, գիշերը՝ օդաներում...»*:

Հին նահապետական գյուղում գյուղացիներն ապրում էին զուրկ ու ճնշված: Գյուղացու կյանքը, նրա ապրուստը, ինչպես ծերունի գյուղացին է ասում քանաստեղծի բերանով, կախված էր երկնքից:

Մեր ապրուստն ինչ է,— մի կտոր չոր հաց,
Էն էլ հրեն հա՛— երկնքից կախված:
Մի մարդ որ նրա երեսը պահի՝
Նրա ապրուստը ի՞նչ պետք է լինի...

Իր վերջին սերմացուն գյուղացին հանձնում է հողին և վար ու ցանքից հետո սպասում է քերքի. եթե տարին քերքառատ է լինում՝ կարողանում է մի կերպ ապրել, իսկ եթե կարկուտը կամ երաշտը ոչնչացնում է նրա արտը՝ մնում է հացի կարոտ ու դիմում գյուղի վաշխառուներին: «Սովը վաշխառու հարուստի բնկերն է: Սովը աղքատ գյուղացուն տանում է վաշխառուի դուռը...»: Սրանք դաժանորեն խաբում, հարստահարում են խեղճ գյուղացուն: Թումանյանը ատելությամբ և զգվանքով է խոսում աշխատավոր ժողովրդին շահագործող այդ վաշխառուների մասին:

«...Ջարմանալի խորամանկ են այդ վաշխառու հրեշները,— գրում է Թումանյանը,— մի օր յուր ժամանակին գյուղացին տանում է իր պարտքը ետ տալիս. «Տո, ո՞վ ա քեզ մից փող ուզում. մի ուրիշ ժամանակ կունենաս՝ կտաս. հիմի էս սահաթին ի՞նչ ես վուզում, ուրիշ պակասություն կունենաս, տար քո պակասությունն արա...» Այսպես, սրտացավ բարեկամի նման, վաշխառուն փողը ետ է տալիս գյուղացուն և անխիղճ տոկոսով, տոկոսը տոկոսին բարդում, մի քանի ամսում աննկատելի կերպով մեկ էլ տեսնում ես քանն այնտեղ է հասել, որ գյուղացու ունեցած չունեցածը վեր է գրում պարտատերը...»

Եվ ահա մեր առաջ բացվում է մի շատ ծանր և տխուր պատկեր. «Ուսուցիչը պատմում է, թե ձմռան մի ցուրտ ու բուք օր դատավորն իրան կանչեց Օհանեսնց Ալեքսանի տունը: Ալեքսանը, վաթսուն տարեկան մի ծերունի, իր տան

* Հ. Թումանյանի ինքնակենսագրության նյութերից:

միակ աշխատավորը՝ վերջին շնչի վրա էր: Այդ օրհասական ռուպեին նրա գլխի վերևը կտրել են գյուղական դատավորն ու վաշխառու Գրիգորը: Գրիգորը երեք տարի առաջ վաթսուն ռուբլի է տվել, այժմ եկել է այդ պարտքի տեղը Ալեքսանից պահանջում է երկու հարյուր ռուբլիանոց այգին: Այդ առանց թղթի չի կարող լինել, և վարժապետը նրա համար է կանչված, որ այդ թուղթը գրի, դատավորն էլ վավերացնի իր կնիքով, թե այսուհետև Ալեքսանի այգին անցնում է Գրիգորին՝ հարյուր հիսուն ռ. պարտքի տեղ:

— Մի՞թե ինձումն ռ. է տոկոսը, զարմանալով հարցրի ես,— ասում է ուսուցիչը:

— Մեր գյուղերում այդպես են հաշվում,— ասաց դատավորը ժպտալով:

. Հարցնում են հիվանդին, թե համաձա՞յն է: Հիվանդը չկարողացավ խոսալ, ձեռքով նշան արավ, չհասկացան ինչ էր ուզում ասել: Ապա խոսաց հիվանդի անկողնի կողքին կույ եկած կինը, թե՛ «Գրիր, վարժապետ, թեև այդ փողից միայն երեսուն ռ. ենք ստացել...»:

Ես գրեցի:

Հիվանդը վերջին շնչի վրա էր: Նրանից հետո տասնամյա փոքրիկ որդին և մաշված ու հյուծված կինը պետք է մնային առանց մի կտոր հացի»:

Վաշխառուների կողմից աշխատավոր գյուղացու դաժան շահագործման նման ցնցող պատկերները չէին կարող խոր տպավորություն չգործել ապագա բանաստեղծի զգայուն հոգու վրա: Եվ իսկապես, հետագայում Թումանյանը մեծ ցասումով է արտահայտում գյուղացու կեղեքումը և շահագործումը թավադներից, վաշխառուներից, ցարական պաշտոնյաներից:

Գյուղացու ծանր վիճակը, սեղմ ու պատկերավոր, արտացոլվել է նաև Գիքորի հոր նամակում.

«Ահա իմացած լինես, որ տեղներս շատ նեղ ա և խարչը սաստիկ ուզում են և փող չենք ճարում, և նաևն ու Չանին տկրոր են և տեղներս շատ նեղ ա: Գիքոր ջան, մի քանի մանեթ փող դարգի...»

Նահապետական գյուղի աշխատավոր ժողովուրդը ենթակա է եղել նաև պետական պաշտոնյաների կեղեքումներին ու շահագործմանը: Թումանյանը և՛ իր հողվածնե-

րում, և՛ գեղարվեստական երկերում հաճախ է տալիս այդ ծանր պատկերի նկարագիրը:

«Հիմա եկեք տեսեք այս ժողովրդի տանուտերը, քյոխվեն, գյուղական դատավորը... որոնք ոչ մի օրենք ու արդարություն չեն ճանաչում, բացի կաշառքն ու մտրակը...»

Գյուղացու ծանր կյանքի այդ պատկերներից մեկը արտացոլվել է նրա «Դժվար տարի» բանաստեղծության մեջ.

Հարկ են ուզում—Տուր՝ հա տո՛ւր...

—Կտամ, քյոխվա, փող չունեմ:

— Չունե՞ս, Ծեկոն կտանեմ...

— Ամա՛ն, քյոխվա, քեզ դուրբան,

Ծեկոն գնա թող գութան,

Գարնան անենք վար ու ցանք,

Կալը կալսենք, բերենք տանք...

* * *

Լոռու ժողովուրդը՝ հովիվ ու հողագործ, կտրված քաղաքից ու նրա կենցաղից, ապրում էր փակ կյանքով:

Իննսունական թվականների վերջերին Լոռու գյուղերն սկսում են շփվել քաղաքի հետ, ծանոթանում ու կրում են նրա ազդեցությունը և հետզհետե կերպարանափոխվում են: Ներս է խուժում փողի, առևտրի իշխանությունը: Ավելի են զգացվում վաշխառուների ու հարուստների, մանր պաշտոնյաների՝ քյոխվի ու թավադի ուժը, նրանց ճիպտուն ու ծեծը: Գյուղացին, հեկարվ կոռ ու բեգարի ծանրության տակ, քարշ է տալիս իր կյանքը ադաթի ու նախապաշարումների մեջ:

Նույն այդ ժամանակները Լոռու ձորերում երևում է երկաթուղին, որն անցնում է ձորերով, ու շոգեքարշի սուլոցից խրտնում են սարերի պախրաներն ու կենդանիները, անհետանում անդհախոր ձորերում և կիրճերում. «...Եկավ ձորերումը ծղրտաց, էլ պախրա չմնաց, կխտար չմնաց, ձենիցը խրտնեցին, փախան կորան...»*:

Երևում են «սպիտակ շրապկավորները» (ինժեներներն ու տեխնիկները), առևտրականները: Լոռու հովիվները, Ռեհաննես բիճու դռան գերանների վրա նստած, զարմա-

* «Երկաթուղու շինությունը»:

ցած գրույց են անում նոր երևույթներից, նոր մարդկանցից...

Լոռին ամպամած է ու մշուշապատ: Գարունը անձրևալին է ու ցուրտ, ամառը՝ զով: Հաճախ տեղացող կարկուտը ոչնչացնում է գյուղացու դաշտերը...

Այս լեռնային բնության մեջ է անկացրել Թումանյանն իր մանկությունը՝ վայելելով լեռնային անմահական օդը, լեռնային կյանքի ազատությունն ու խաղաղությունը:

«Իմ մանկությունը անց էմ կացրել աստվածային շռայլության մեջ: Լոռու գեղեցիկ բնությունը, անմահական օդը, զրնգան աղբյուրների ջուրը, լեռնական գյուղական կյանքի, ազատությունը, որ կար հին գյուղական կյանքում...»

Այսպես է հիշում իր մանկությունը բանաստեղծն ինքնակենսագրական նյութերի մեջ:

Հայրենի Լոռին, նրա ամպամած լեռներն ու խիտ ձորերը, «անլուելի վշացող Դեբեդը», ողջ հիասքանչ բնությունը բանաստեղծի ոգևորության անսպառ աղբյուրն են եղել: Մանկուց լսած ու սիրած ժողովրդական գրույցներն ու երգերը, հեքիաթներն ու լեգենդները նրա ստեղծագործությանը առատ սնունդ են տվել:

Թումանյանը դիտել է և ուսումնասիրել, տեսել է ու ապրել գյուղացու ծանր, չարքաշ կյանքը, նրա աշխատանքն ու հարստահարումները, և այդ ամենը խոր ակունք է թողել, անջնջելի հետքեր՝ բանաստեղծի զգայուն հոգու վրա: Մանկության օրերի այդ ծանր տպավորությունները նրա կյանքի մշտական ուղեկիցներն են եղել:

ՊԱՊԵՐԸ

Հովհաննես Թումանյանը ծնվել է 1869 թ. փետրվարի 19-ին (հ. տ.) նահապետական երբեմնի հարուստ և անվանի ընտանիքում:

Այն տարիներին, երբ ծնվել է Հովհաննեսը, Դսեղ գյուղը մեծ չի եղել՝ ընդամենը վաթսույն-յոթանասուն տուն: Կղմինդրե տանիքով միայն մեկ տուն է եղել:

Հայրական տունը, որտեղ ծնվել է նա, գյուղի սովորական տներից էր. միհարկանի հողածածկ գլխատուն, կող-

քին՝ գոմը, տան առաջ՝ սրահ և սալորենու փոքրիկ պարտեզ՝ վայրի վարդի թփերով շրջապատված:

Հեռագայում իր գրույցների ժամանակ բանաստեղծն այսպես էր հիշում հայրական տունը. «Մի մեծ սենյակ ունեինք. օջախը միշտ վառած. երկու կողմից տախտեր, դռնակներ ու մութաքաներ դարսած: Բոջահայելին, կողքին սազը կախած, մոմակալն ու մաղաշը*, նկարները...»

Այս տունը բանաստեղծի պապի՝ Օհաննեսի կահավորված սենյակն էր: Թումանյանի պապը Լոռում հայտնի է եղել Օհաննես աղա անունով, որին Թումանյանը չի տեսել: Մանուկ Օհաննեսը տատից, տան մեծերից գրույցներ ու պատմություններ է լսել իր նախնիների ու իր պապի քաջագործությունների ու խիզախ գործերի մասին:

Թումանյանի հեռավոր նախնիները, ինչպես ինքը՝ բանաստեղծն է հիշատակում, եկվորներ էին, որոնք տասներորդ դարում թողնելով իրենց հայրենի Տարոնը՝ բնակություն էին հաստատել Լոռու Դսեղ գյուղում:

Նրանք ճամապարհներ են շինել այդ անդնդախոր ձորերում, կամուրջներ կառուցել, հուշարձաններ ու աղոթարաններ կանգնեցրել, որոնց ավերակները դեռ մնում են Դսեղի ձորերում, անտառներում և հանդամասերում: Նախահայրերը հայտնի իգիթներ են եղել, քաջ որսկաններ:

Այդ տոհմի պապերը արտաքին հարձակումների ժամանակ՝ ինքնապաշտպանության օրերին, ինչպես՝ Հասան խանի ասպատակության ժամանակ, գործի գլուխ են անցել և պաշտպանել գյուղերի խաղաղ բնակչությունը կոտորածից ու կողոպուտից:

Թումանյանի պապը՝ Օհաննես աղան (1795—1868) անվանի զինվորական էր. բարձրահասակ ու սիրուն տղամարդ, սաթի ծայրով մեծ չիբուխը ձեռքին, թուրը կողքից կախ, սամույր մուշտակը ուսերին: Լավ ձի նստող է եղել ու լավ հրաձիգ: Նրա թուրը այժմ էլ պահպանվում է գյուղի տան Թումանյանի թանգարանում:

Թումանյանի պապը ծառայել է ռուսական բանակում, մասնակցել է մի շարք պատերազմների: 1826 թ. Ախալցխայի մոտերը մի հաղթություն տանելու համար ստացել է

* Մաղաշ— ունելի, որով կտրում էին վառվող մոմի ծայրը:

սպայի աստիճան, 1842 թ. Դաղստանում, 1845 թ. լեռնա-կանների դեմ, 1853 թ. Ախալցխայի կովում տարած քաջագործությունների համար, այնուհետև 1854 թ. իր մի քանի հաղթությունների համար ստանում է շքանշաններ: Բացի այդ, նա մեծ աշխատանք է կատարել Հայաստանի զանազան վայրերում ճանապարհներ կառուցելու համար:

Պապը հյուրասեր էր, գրուցասեր, սրախոս ու զվարճա-սեր: Այնքան է սիրել գրույցը, որ իր տան պատի տակ, ճանապարհի վրա, տասներկու քար է տաշել տվել, դրել, որ գլուղացիները գան, նստեն ու գրույց անեն:

Բնավորության այս գծերով և արտաքինով, ասում են, Թումանյանը նման էր իր պապին:

«Օհաննես աղան թեև աղա էր, բայց շատ հասարակ մարդ էր,— ասում էր նրան մոտիկից ճանաչողներից ու ժամանակակիցներից մեկը՝ Կիրակոս բիձեն:— Բնավորու-թյամբ բարի էր և առատաձեռն: Հասարակ ժողովրդին միշտ օգնել է, հողագործի գլուղացուն՝ հող տվել: Գլուղում կար Մուրադանց Մարգար անունով մի կատակասեր և առա-կախոս մարդ, որը միշտ սազ էր ածում, առակներ պատ-մում, սրախոսություններ անում և զվարճացնում Օհաննես աղայի հյուրերին»:

«Օհաննես աղան շատ լավ մարդ էր. ամբողջ Լոռին նրան սիրում էր, լսում: Մեծ մարդ էր. չափից դուրս շքա-նշաններ ուներ. դիվան էր կտրում, ժողովրդին պաշտպա-նում էր: Ամեն տեղ դիմավորում էին, շարաթներով քեֆ անում»,— այսպես էր պատմում Օհաննես աղայի մասին քեռի Սաքոն և ապա շարունակում.

«Հասան խանի ժամանակ գլուղումս աղ չկար. ժողո-վուրդը առանց աղ կոտորվում էր. նա գնաց ուղտի բեռնե-րով աղ բերեց, ժողովրդին բաժանեց, ժողովրդին պահեց: Տուրքերը հավաքելու ժամանակ, երբ պետական պաշտոն-յաները գալիս են հացահատիկ հավաքելու, ժողովուրդը դժգոհում է. Օհաննես աղան դուրս է գալիս պրիստավին ճանապարհ դնելու, որ իր եկած ճանապարհով ետ գնա-չի լսում, Օհաննես աղան բարկանում է, ճանապարհ է դնում և ասում. «Զուրը անցկացրեք, թող գնա»:

Օհաննես աղան բարեկամական կապեր էր հաստատել

հարևան շրջանների՝ Ղազախի ու Բորչալուի թուրքերի ու վրացիների հետ և աշխատում էր հաշտ ու խաղաղ պահել այդ ժողովուրդներին:

Թուսաստանից նա իր հետ բերել էր մի ռուս ջրաղաց-պան: Առաջինը նա էր, որ Լոռում մտցրեց մոմի գործածությունը: Մինչև այդ Լոռվա գյուղերում ձեթի ճրագներ են վառելիս եղել: Թուսաստանից իր հետ բերել էր նաև հայելի, ակարներ և այլն:

Օհաննես աղան ունեցել է ճանապարհորդական արկղ, մեջը՝ ասիսե, բաժակ, գդալ և այլ պարագաներ, որն իր հետ տանելիս է եղել Ղարս, Ախալցխա կամ այլ վայրեր կովի գնալիս: Նա շարունակ Լոռուց դուրս պատերազմի է եղել: Թումանյանի տատը ասում էր. «Հենց որ ձմեռնանում էր, աչքս մեր սարերին էի գցում, թե ե՞րբ պիտի ձիեր նստի, որ մարդս տուն գա»:

Ասում են, ավելի անվանի և հայտնի է եղել Թումանյանի պապի հայրը՝ Օվագիմ Յուզբաշին, քաջ ու հաղթանդամ, Լոռու հայտնի իգիթներից մեկը: Տասնութերորդ դարում, շնորհիվ իր քաջագործությունների, նա մեծ հռչակ է ստանում:

Խաչատուր Աբովյանն իր «Վերք Հայաստանի» վեպում Օվագիմ Յուզբաշու մասին այսպես է պատմում. «Մենակ դսեղցի Մեհրաբյան Թումանյան Հովագիմի անունը՝ քարերը սասանացնում էին: Սարերի, ձորերի միջում մեծացած, գազանի ու հարամու արիւնը թափելով էր նրա ոսկորները հաստացել: Երկու տղամարդ նրա մեջքը չէին կարող խտրտել, հինգ մարդ նրա մեկ ձեռքը չէին կարող օլորել, նրա գլուխը մեկ օր չէր ցավել: Կերածը մեղր ու կարագ էր, հագածը շալ, կոխածը ծաղիկ ու չիման, աղբրների վրա, մեշի միջումն էր նա օրորոցումը աչքը քաց արել: Նրան ի՞նչ կոչմանար: Ածդահա ու ոչ տղամարդ... Ութ ախպեր ուներ, մեկը քանց մեկը ածդահա: »

...Վաթսուն ջանից ավելի հոգի՝ հարս, փեսա, թոռը, ծոռը, առավոտը՝ նրանց տանիցը դուրս էին գալիս, րիգունը մթանը նրանց օճորքի տակին քնում ու նրանց հարյուր տարեկան հերը դեռ երեկվան երեխի պես՝ բեղերն ոլորում, միրուքը սանդրում, փափախը կոտորում, նրանց հետ պար գալիս՝ պար գալի, խաղալիս՝ խաղում, սագ ածելիս շատ

անգամ ինքը սազը ձեռներիցը խլում, ածում, խաղում, քսան տարեկանի պես ձիու վրա նստում, ասպարը գցում ու սարերում, ձորերում, չաղրի տակին՝ պարզկա գիշերը՝ որդոցը իրան արած քաջությունները՝ լոռեցունց տղամարդությունը, հին, հին քաներից, լազգուց, թուրքից, հազար քաներ պատմում...»

Օվագիմ Յուզբաշին մեռել է քառասունական թվականներին:

Օվագիմ Յուզբաշու հայրը՝ Մեհրաբը, Լոռու ձորերի նահապետն էր:

Գյուղական մեծերի պատմածների համաձայն այսպես է նկարագրում Թումանյանը իր ապու պապին՝ Մեհրաբին:

«...Ծերունի Մեհրաբը, Օվագիմի հայրը, Լոռու ձորերի նահապետը, իսկի չէր էլ մտածում, թե հարչուր տարին անց է կացրել: Նրա վիթխարի, բարձր հասակը կորացել էր, նորից ամրացել, ճերմակ մազ ու միրուքը բռնել կուրծք ու երես և ածղահալի ահավորության հետ խառնել, միացրել ծերության պատկառանքը*»:

Մեհրաբը բարձրահասակ, հաղթանդամ, հուժկու ձայնով տղամարդ էր. խելացի էր, արթուն և արի: Նրա անունով Թումանյանի տոհմի տունը կոչվում էր նաև Մեհրաբյան:

Միանգամայն այլ ծագում և տարբեր նկարագիր ունեն Թումանյանի մոր կողմի պապերը՝ գյուղի մյուս ծայրի բնակիչները՝ Քոչարյանները: Նրանք սարեցիներ էին, գյուղի առաջին հովիվներն ու տավարածները. նրանց տունն այդ պատճառով էլ կոչվում էր՝ «սարըցու տուն»:

Այդ տան նահապետը՝ տավարած Օհաննես ապին, Թումանյանի մոր հայրը, սարերում աչք քաց արած, սարերում մեծացած, իր տղաների հետ բերում է սարերի կյանքը, շվին, բայաթին: Ինքը՝ Օհաննես ապին, շատ առողջ է եղել, ուժեղ և ձայնեղ, մի ածղահա մարդ: Իր ամբողջ կյանքը նա սարերում էր անցկացրել և երբեք չէր հիվանդացել: Օհաննես ապին իր առաջին վշտից՝ կնոջ մահից հետո, կարժամահար է լինում հարչուր ութ տարեկան հա-

* «Քաջերի կյանքից», Երկերի ժողովածու. III հ.:

սակում, վախճանվում: Մեռնելիս ցավով բացականչում է.
«Ա՛յ փուչ աշխարհ, արժե՛ր երկու օրվա համար ծնվելը...»

Ահա այս երկու միանգամայն տարբեր օջախների
ծնունդ էր Թումանյանը:

ՀԱՅՐԸ

«Ամենալավ ու ամենամեծ բանը
որ ես ունեցել եմ իմ կյանքում
այդ եղել է իմ հայրը»:

Թումանյանի հայրը՝ Տեր-Թադևոսը, գյուղի քահանա-
ներից մեկն էր: Նրա աշխարհիկ անունը Ասլան էր. ծնվել
է 1839 թվին, վախճանվել՝ 1898-ին: Սկզբում, 1870—1872
թվականներին, նա ուսանում է Սանահնի վանքում, քահա-
նա է դառնում 1874 թվին, երբ Թումանյանը արդեն չորս-
հինգ տարեկան երեխա էր:

Տեր-Թադևոսը թեև նույնպես անվանի մարդ էր, բայց
նա չունեւ իր նախնիների ո՛չ դիրքն ու կարողությունը և
ո՛չ էլ նրանց մեծ համբավը: «Հայրս մեր տան վերջին ըն-
կած բեկորն էր...» — ասում էր Թումանյանը:

Իր տնտեսությամբ բանաստեղծի հոր տունը միջակ
տներից էր. ունեցել եմ երկու կով, մի գոմեշ և մի քանի
ոչխար: Բայց, շնորհիվ իր անվանի պապերի և իր անձնա-
վորության, Տեր-Թադևոսի տունը համարվում էր Լոռու
պատվավոր տներից մեկը:

Հմայիչ դեմք էր Տեր-Թադևոսը, սիրված ու հարգված
գյուղի և Լոռու շրջանի ժողովրդի կողմից: Բանաստեղծն
առանձին սիրով էր խոսում իր հոր մասին:

«Ամենալավ ու ամենամեծ բանը, որ ես ունեցել եմ իմ
կյանքում, այդ եղել է իմ հայրը: Նա ազնիվ մարդ էր և
ազնվական՝ քառի բովանդակ մտքով: Չափազանց մարդա-
սեր ու առատաձեռն, առակախոս ու զվարճաբան, սակայն

միշտ ուներ մի խոր լրջություն: Թեև քահանա, բայց նշա-
նավոր հրացանաձիգ էր ու ձի նստող: Այդ ժառանգական
էր մեր ցեղի մեջ»*:

* «Ինքնակենսագրություն»:

Հոր բնավորության գծերը ժառանգաբար անցել են բանաստեղծ որդուն: Բնորոշելով իր հորը, ասես նա ինքն իրեն է բնորոշում. այդպես մեծ էր հոր և որդու նմանությունը:

Երբ խոսք էր լինում մեծ մարդկանց մասին, նա ասում էր. «Մեծ մարդու մասին գաղափար եմ կազմել իմ հորով: Մեծ մարդ էր, զարմանալի խոր մարդ, անդունդի խորություն ուներ. լայն հոգի, մեծ սիրտ, մեղմ բնավորություն, ժպիտը միշտ դեմքին»:

Ինչպես նրա կյանքի բազմաթիվ դեպքերն ու գրույցները, այնպես էլ գյուղի ծերերի պատմածները վկայում են նրա առաքինությունները: Նա ամեն տաք վեճ մեղմացնում էր և վերացնում. նրա ժամանակ Դսեղ գյուղի մասին ասում էին՝ «Արյունը ջուր անող գյուղ»:

Թումանյանի հայրը բարձրահասակ էր, նիհար, ժպտուն ու խոր աչքերով. մազերը գանգուր ու վաղ ճերմակած՝ ձյունի նման սպիտակ:

Թեև քահանա էր, բայց, ինչպես պատմում են մոտիկից ճանաչողները, նա չի սիրել եկեղեցական ծեսերը: Հաճախ, եկեղեցու գանգերը լսելիս, գնացել է գյուղամեջ գրույցի կամ մարդ հավաքել, բերել տուն գրուցելու, հետն էլ իր չոնգուրն է ածել ու երգ ասել:

Պատմում են, որ Տեր-Թադևոսի հյուրերից մեկը, տեսնելով պատից կախված չոնգուրը, հարցնում է. «Տերտեր, դու չոնգուր ածել էլ գիտես»: Տերտերը թե՛ «Էդ հո ավետարանը չի, որ չգիտենամ»:

Լինելով բնավորությամբ ուրախ և հյուրասեր՝ նա իր շուրջն է հավաքում շրջանի աշուղներին ու շվի ածողներին, առակախոսներին ու գրույց անողներին և այսպիսով իր տունը դարձնում է երգի ու գրույցի կենտրոն:

Իր աղջիկներից մեկը՝ Իսկուհին, պատմում է, թե ինչպես ինքը մի օր հոր ձին վերցնում է, կժերը բարձում, գնում է հեռու աղբյուրը՝ ջրի: Ծանապարհին ձին որտեղ մարդ է տեսնում կանգնում է: Աղջիկը գալիս է տուն, հորը պատմում: Հայրը թե՛ «Ա՛յ որդի, էդ իմ ձին ա. ես որ ճամփա եմ գնում, մարդ պատահելիս կանգնում եմ գրից անում, ձիս էլ սովորել ա»:

Հոր երգի ու գրույցի երեկոները մեծ նշանակություն են

ունեցել և խոր տպավորվել Թումանյանի վառվորուն երևակայության մեջ: Նա մանկուց ազդվում էր հոր երգերից, ներշնչվում և սիրում երգն ու գրույցը:

«Իրիկունները, երբ տուն էինք հավաքվում, հայրս թիկն տված ածում էր իր շոնգուրը և երգում «Քյոռոզլին», «Քյարամը» կամ որևէ հոգևոր երգ»:

Հայրը երգում էր արևելյան թախծոտ բայաթիներ, աշունդական խաղեր ու ժողովրդական երգեր: Հոր երգի ու նվագի երեկոները փոքրիկ Հովհաննեսի ամենաթանկ ու ամենանվիրական ժամերն են եղել: Ասում են, երբ հայրը սազ էր նվագում, փոքրիկ Հովհաննեսը նստում էր շատ մոտ, նայում էր նրա դեմքին և մեծ ուշադրությամբ լսում... լսում էր, նայում նրա բոցով այրվող աչքերին, որոնք նայում էին հեռու, շահ հեռու, և ինքն էլ բոցավառված, լցվում, համակվում էր հոր վշտոտ երգերով:

Հայրը ամենապայծառ դեմքն էր, որ լուսավորել է բանաստեղծի մանկության օրերը: Այսպես էր տեսել Թումանյանն իր հորը, իսկ մորը՝ միշտ դժգոհ ամուսնու անհոգ ու անփույթ ապրելակերպից:

«Ռրա համար է,— ասում էր Թումանյանը,— որ երևակայում եմ հորս անհոգ ու զվարթ գրույց անելիս, ձի նստած կամ շոնգուր ածելիս, իսկ մորս՝ հոգսի մեջ, գյուղից դուրս մեր կորած անասուններին ման գալիս»...

Հայրը անփույթ և շռայլ ապրող էր: Հաճախ էր պատահում, որ գյուղերում աշխատածը թողնում էր դուրսը, տալիս էր չունևորներին, ինքը դատարկ գալիս տուն: Ծատ անգամ ստացածը գրպանն էր ածում առանց նայելու, ուզողին էլ տալիս էր առանց հաշվելու, ասելով՝ «էնքան ըի, որ կնիկս չիմանա»: Վախենում էր հաշվով ապրող կնոջից:

Կինը՝ չկարողանալով տանել ամուսնու անհոգ ու շռայլ բնավորությունը, մշտական վեճի մեջ էր հետը: Իսկ ամուսինը, վախենալով նրա կովող բնավորությունից՝ միշտ գաղտնի էր անում իր բարեգործությունները: Ծատ է պատահել, որ կնոջ բացակայության ժամանակ Տեր-Թադևոսը իր տղային՝ փոքրիկ Հովհաննեսին, կանգնեցրել է դռան մոտ հսկելու, իսկ ինքը ցորենը լցրել է, տվել մի որևէ չքավոր գյուղացու կամ սարից իջած թուրքի շալակը:

Թումանյանի մայրը ամուսնու բարեարտության մասին հետաքրքիր դեպքեր էր պատմում: Մի օր աղունը ջրաղաց է տանում աղալու. ջրաղացում տեսնելով միրգ ծախող մի գյուղացու, աղունը թողնում է ջրաղացում, միրգը բեռնում ձիուն, բերում տուն: Գալիս է տուն, կինը հարցնում է ամուսնուն, թե՛ «Տերտեր, քա ալյուրն ի՞նչ արիր»:

Թե՛ «Ջրաղացում ջրաղացպանը դեռ աղում ա»:

Կինը, թե՛ «Ախր անտեր ա, կգողանան»:

Նա թե՛ «Չունենոր մարդիկ են, մի քիչ էլ թող գողանան...»

Մի ուրիշ անգամ էլ, մի սովի տարի, տերտերը աղունը ջրաղացն է տանում աղալու, կինն էլ փուռը վառում է, սպասում տերտերի գալուն: Բայց տերտերը չկա: «Մթնել ա,— պատմում էր Թումանյանի մայրը,— էրեխեքը լաց են լինում, սոված են. տանն էլ հաց չկա, մին էլ տեսնեմ՝ տերտերը ջրաղացից գալիս ա դատարկ, երկու կրկեցի* կուան տակին»:

Դու մի ասիլ, մի ձիաբեռ ալյուրը կրկեցի է թխել, դուրս է եկել հանդը, հանդի սոված հանդավորներից բաժանել ու ինքը դատարկ եկել է տուն...»

Պատահել է, որ աշնանը գյուղի չքավորի կամ այրի կնոջ արտը հնձել է տվել իր վարձած մշակներով:

Տեր-Թադևոսի բնավորության համար բնորոշ է հետևյալ դեպքը:

Պատմում են, որ մեկ անգամ Դսեղի հարևան Մարց գյուղից կեսգիշերին գալիս են Տեր-Թադևոսին հիվանդի համար կանչում: Ջի է նստում ու գնում: Ջորի կաճաններով իջնելիս, մութ ձորը լուսավորելու համար, նա ձորի մեջ պատահած չոր խոտի բլուրները (դեզերը) վառելով հասնում է Մարց գյուղը: Մյուս օրը խոտի տերերին կանչում է ն արժեքը կրկնակի վճարում:

Լինելով կենսուրախ մարդ, շատ է սիրել երեխաների շրջանը. նրանց հետ վեզ է խաղացել, կատակներ արել, գյուղի ջահել հարսն ու աղջիկների հետ Համբարձման տոնին վիճակ հանել: Խաղով, երգով ու կատակներով է պահել իր երեխաներին:

* Կրկեցի— ջրաղացում կամ սարում մոխրի մեջ թխված հաց:

Առանձնապես սիրում էր մեծ որդուն՝ Հովհաննեսին: Հոր և որդու փոխադարձ այդ սերը տարիների ընթացքում ավելի է ուժեղանում և խորանում: Պատմում են, երբ 1890 թվին Մոսկվայում լույս է տեսնում Թումանյանի բանաստեղծությունների առաջին ժողովածուն, հայրը մեծ հրճվանքով է կարդում այդ գիրքը, հյուրեր է հրավիրում, ուրախանում, քեֆ անում և ասում է.

— Հիմի ինձ էլ մահ չկա...

Տեր-Թադևոսը սիրված էր ո՛չ միայն Լոռու շրջանի, այլև հարևան շրջանների՝ Բորչալուի, Ղազախի գյուղացիներից և հատկապես թուրք բնակիչներից: Նա անշահասեր ու մեծ մարդու համբավ ուներ Լոռու շրջանում: Հետագայում, ինը հարյուրական թվականներին, Լոռում Հովհաննես Թումանյանին իր հոր անունով էին ճանաչում: Պատմում են՝ 1905—1906 թվականներին, հայ-թուրքական ընդհարումների ժամանակ, երբ Թումանյանը Ղազախի շրջանի սարերն է գնում երկու հարևան ժողովուրդներից հաշտեցնելու, թուրք բնակիչները վախենում են երևալուց, ըստ երբ իմանում են, որ ձիավորներին գլխավորում է Թումանյանը, գյուղի ծերերն ասում են՝ «Նա Ասլան քեշիշի տղեն է, մի վախեցեք, գնացեք, նրա հայրը մեծ մարդ էր, մեր բարեկամն էր»:

Տեր-Թադևոսը Լոռու շրջանի առաջադեմ դեմքերից էր, գյուղի աչքի ընկնող հասարակական գործիչներից: Նրա օրով է գյուղում գործածության մեջ մտել կաղամբը և ապա կարտոֆիլը: Նա է առաջին լամպը գնել, բերել Դսեղ: Նավթի գործածությունը նրա օրով է սկսվել, մինչև այդ գյուղում վառում էին մոմի ճրագներ: Այդ եղել է մոտավորապես 1873—74 թվականներին:

Տեր-Թադևոսը շատ էր սիրում Թիֆլիսը: Ամեն տարի ձիով գնում էր Թիֆլիս, իր տղային տեսնելու: 1898 թվին, երբ սկսվում է երկաթգծի կառուցումը, նա շատ է ուրախանում, որ հնարավորություն կունենա ավելի հաճախ գնալու Թիֆլիս: Բայց հեկց նույն տարին նա վախճանվում է և միայն գնացքի ձայնն է լսում ձորում:

ՄԱՅՐԸ

Մորս ձայնը մեղեդիական
Ահա հնչում է քնքուշ
Նրա հայացքը մայրական
Ինձ հետևում է զգուշ:

Թումանյանի հոր հակապատկերն էր մայրը՝ Սոնան: «Երկու ծայրահեղորեն տարբեր արարածներ հանդիպել են իրար»,— գրում է Թումանյանն իր ծնողների մասին:

Մայրը նույն գյուղից էր. սարերում ապրած ու մեծացած, իր հոր նման՝ առողջ, ուժեղ և դիմացկուն: Բարձրահասակ էր, գեղեցիկ և կարմրաթուշ. կատարյալ սարի աղջիկ, ինչպես գյուղացիներն էին ասում նրա մասին՝ «մի գիծ պախրի կով»: Աշխատասեր էր, մեծ կամքի տեր, գյուղի անվախ կանանցից էր. նա էր կառավարում տունն ու սարը:

Մայրը տարվա մեծ մասը սարերումն անցկացնելով՝ իր երեխաներին էլ սարերումն էր պահում, մեծացնում: Սարն էր գնում վաղ գարնանը ու մնում մինչև ուշ աշուն: «Հենց որ գարունքանում էր, էն ա սարն էի տանում էրեխանցը,— պատմում էր Թումանյանի մայրը,— տանելուս էլ ապրանքը ձիուն էի բեռնում, ապրանքի ետևից ոտով գնում, որ ձիու վրա երեխեն չհարվի: Սարերումն էլ է՛ն ծաղկոտ տեղերումն եմ պահել, աղբյուրների մոտ կացել: Սարերում մնում էինք մինչև ձնի կաթոցը, էն ա ձնի հետ կոլովելով գալիս էինք գեղը. ամպը գոռում էր, չոքում, սևակնում, չանգը կոխում...»

Բանաստեղծի մոր սիրած սարը, որտեղ նա շատ է մնացել և որտեղ պահել է իր երեխաներին, կոչվում է Ղարանդուղդարա՝ Մթին Ջոր: Այդ սարը գտնվում է Քոչաքար լեռան մոտ, գյուղից քառասուն-հիսուն կիլոմետր հեռավորության վրա: Մինչև վերջին տարիներն էլ, թեև ութսուն տարին անց էր կացրել արդեն, նա գնում էր սար, սարերում անասունները պահում և ձմեռվա կաթնամթերքը պատրաստում: Վերջին անգամ իննսուն տարեկան հասակում, մի անգամ էլ սարն է գնում՝ վերհիշելու, վերապրելու սարերում անցկացրած օրերը, սարի կարոտն առնելու:

Թումանյանն ասում էր, «Ինչ-որ սարի բան կա իմ մեջ,

դա իմ մորիցս է՝ Նանից: Թոշող կին էր իմ մայրը. արծվի թռիչք ուներ: Ամենաբարձր սարերում, ծաղկոտ տեղերում է պահել ինձ: Ծառ բան է տվել ինձ մայրս, շա՛տ... շա՛տ էր սիրում ինձ»:

Մայրն անգրագետ էր: Մի անգամ երեխաներից մեկի հարցին, թե՛ Նա՛նի, դու ուսումնարան գնացե՛լ ես,— նա պատասխանել է. «Բա՛, գնացել եմ, տասներկու ուսումնարան եմ ավարտել...» ու թվել է այն բոլոր սարերը, ուր գնացել էր ամառները՝ Կարմիր էր (այր), Ծաղկոտ ուրթ, Քոչաքար, Ղարանյուղդարա, Կալերի Սեռ, Իքատակ, Սոթ և այլն:

Ծառ աշխատասեր կին էր Թումանյանի մայրը: Սիրում էր և՛ դաշտի, և՛ սարի աշխատանքը: Նա տանը շարունակ խոտում էր, կոպում, որ առավտորը վաղ վեր կենան, աշխատանքի գնան, խնայողությամբ ապրեն: Հենց որ նա խոտում էր ու սկսում կոպել, տերտերն ասում էր. «Երբ պիտի գարունքանա, որ սրան սարը դարկենք, մենք էլ հանգիստ ապրենք»: Իսկ երբ նա սարն էր գնում, տանը հարսանիք էր ուշ էին վեր կենում, հանգիստ էին աշխատում, միրգն էլ առատ էր լինում:

Նա ութ երեխա ուներ՝ հինգ տղա և երեք աղջիկ: Ամենամեծը և ամենից շատ սիրվածն ու փայփայվածը ապագա բանաստեղծն էր:

Մայրը, բացի սարի ու դաշտի աշխատանքից, այդ բազմանդամ ընտանիքի մանվածքն ու գործվածքն էլ էր անում. «Յերեկը ապրանքն էի պահում, գուլպան ձեռքիս գործելով, գիշերը թել էի մանում, չուխա, խալի գործում»,—ասում էր մայրը:

Նա իր ճախարակի առաջ նստած՝ գիշերները թել էր մանում, հետն էլ երգ ասում: Իր ութ երեխային այդպես է պահել, մեծացրել: Երգել և տխուր երգեր՝ արևելյան եղանակներ, ժամանակի տարածված ժողովրդական և հայրենասիրական երգեր, օրինակ՝ «Է՛ր հեռանաս քո մայրենի աշխարհից...», «Մանի՛ր, մանի՛ր իմ ճախարակ», «Ազնիվ ընկեր» և այլն:

Լինելով գրույց սիրող և լավ պատմող կին՝ նա իր երեխաներին հին-հին գրույցներ էր պատմում իրենց տան մեծերից՝ Օվագիմ Յուզբաշուց և նրա քաջագործություններից:

Լեզունդներ, հեքիաթներ էր պատմում առակների հետ միասին, համեմաձ ժողովրդական ոճով ու դարձվածքներով: Պատմում էր Հասան խանի օրերից, ինչպես Լոռվա գյուղերի բնակչությունն այդ ժամանակները գյուղերից փախաձ՝ ահ ու սարսափի մեջ պատուպարվել է այրերում: Պատմում էր Օհաննես պապից ու նրա յոթ եղբայրներից, անցաձ ժամանակներից և իր ջահել օրերից: Նա հարս է եղել նահապետական մեձ ընտանիքում՝ քառասուն-հիսուն հոգուց բաղկացաձ մեձ գերդաստանում: Ընտանիքն ավելի բազմանդամ է եղել նրա սկեսրոջ ժամանակ: Երբ Թումանյանի տատը հարս է գալիս տուն, տանը վաթսուն մարդ են լինում, ութ ծեր, սպիտակ մորուքավորներ, և չի իմանում, թե ո՞րն է մեձը, որ առաջ նրան ծառայի:

Թումանյանի մայրը իր հոր նման երկարակյաց էր. նա վախճանվել է իննսունչորս տարեկան հասակում (1842—1936):

ԱՆՀՈԳ ԵԶՆԱՐԱԾԸ

Թումանյանն ընտանիքի անդրանիկ երեխան էր: Տանը փոքր հասակից շատ են սիրել նրան: Մայրն ասում էր. «Գիշեր-ցերեկ ձեռներիս ենք պահել ես ու իմ սկեսուրը: Օրորոց չենք դրել, ոչ էլ ճոճի մեջ, որ միտքը պայձառ մնա, չօրորվի»:

Թեպետ լավ են պահել, բայց ինքը շատ լացկան երեխա է եղել: Պատմում են, թե իրիկնադեմից մինչև լույս լաց էր լինում: Հայրը երբեմն բարկանում էր, որ քնի, լաց չլինի, բայց ոչինչ չէր օգնում. տատն էր՝ իր հոր մայրը, որը թոռանը պահում էր, պաշտպանում: Գիշերները միրգ էր տալիս, ընկույզ և չամիչ դնում բարձի տակ, լաց լինելիս՝ տալիս էր նրան:

Տատերը շատ են սիրել իրենց թոռանը. ավելի շատ՝ հոր կողմի տատը: Այդ տատը գեղեցիկ ու կիրթ կին էր. չէր սիրում գյուղի աշխատանքը: Նա ավելի էր սիրում քաղաքը և քաղաքի կյանքը:

Նա է հետևել թոռան կրթությանը, նրա հազնվելուն, շարժունակին, պահանջելով, որ ամեն ինչ մաքուր լինի: Թո-

ուան անունը դրել էր իր ամուսնու անունը՝ Օհաննես աղա: Եվ գյուղում այդպես էլ կոչում էին Թումանյանին՝ Օհաննես աղա:

Թումանյանին պակաս չափով չի փրել և մյուս տատը՝ մոր մայրը: Իր մանկությունը հիշելիս Թումանյանն ասում էր՝ «Երկու տատիս ծոցումն եմ մեծացել»:

Տատի տունը գտնվում էր գյուղի մյուս ծայրին: Տատը թխվածքներ էր պատրաստում, սարի ազդակ* ու սեր էր ուտեցնում թոռանը, միրգ էր տալիս, սիրում, գուրգուրում, ամառներն էլ իր հետ սարն էր տանում: Սարերում նա իր հասակակից երեխաների հետ գառներ էր արածեցնում:

Փոքրիկ Հովհաննեսը թեև նիհար, բայց շատ առողջ, ժիր, աշխույժ և չարանճի երեխա է եղել: Կարմիր արխալուղը հագին, մորթե փափախը գլխին, ոտքին տրեխներ, ճիպոտը ձեռին, իր հասակակիցների հետ շարունակ ձորերում, հանդերում խաղացել է, վազվզել, թափառել:

Յոթ-ութ տարեկան հասակում նա «եզնարած» էր, բայց եզները միշտ կորցնում էր: Իրենց անասունները տանում էր հանդ, բաց թողնում, ինքը հեռանում մի քարի գլխին նստում կամ ծառի տակ պառկում և անձնատուր լինում իր երազներին: Ժամերով նայում էր վերջալույսի վարդագույն ամպերին, հետևում էր Զաթինդաղի գագաթի ամպերի խաղերին, նրանց սահուն ու դանդաղ ընթացքին և երազում... Լսում էր թռչունների ծլվլոցը, ծղրիդների, պառկում էր ձորափին ու լսում Դեբեդի վշշոցը...

Ներշնչված բնության գեղեցկություններով, մոռանում էր ամեն ինչ, մնում էր իր մտքերի հետ, իսկ անասուններն արածելով՝ գնում հեռանում էին իրենց հսկողից ու կորչում...

Մանուկ Հովհաննեսը շատ էր սիրում բնության խաղաղ ժամերը, լույթունը-մենության մեջ: Լոռու հանդերում կամ բլուրների վրա նա պառկում էր, խորասուզվում երկնքի մեջ: Լեռնային բուրումնալի զով ու կազդուրիչ օդում, կանաչ, ծաղկավետ խոտերի մեջ հետևում էր արծիվների թռիչքին ու լսում նրանց ծղրտոցը կամ զմայլվում թիթեռ-

* Սերուցքից ու խմորից պատրաստված թխվածք:

ներով, որոնք՝ ծաղկից ծաղիկ թռչելով, գույների խաղ էին ստեղծում...

Շատ ուշ, երբ մութն ընկնում էր, պթափվում էր նա իր երազներից, հիշում իր եզներին և դատարկ վազում տուն: Տանը երազկոտ փոքրիկ «եզնարածին» խիստ հանդիմանում էին այդ բանի համար, երբեմն նույնիսկ ծեծում: Մայրը տղային ծեծից ազատելու համար տանում էր հարևանների տանը պահում:

Փոքրիկ Հովհաննեսը թեև վատ եզնարած էր, բայց շատ էր սիրում եզներին և ընդհանրապես կենդանական աշխարհը: Իր կենսագրական նյութերի մեջ բանաստեղծն առանձին սիրով ու կարոտով է հիշում իրենց պապոնց տան կենդանիներին:

«Իբրև հին կարոտ մտերիմների, հիշում եմ պոզատ գոմեշը՝ Նազուն, Ծաղիկը (կովի անուն), Չերքեզը, Աբրաշը (եզներ), Թորլան շունը, Ղայթարը (շան անուն) իմ պապոնց, մեր Մարինոս էշը, Ղոսթ ձին, մեր սև Մաշկոն (շուն)»:

Հետագայում, երբ գրում է կենդանիների կյանքից իր հայտնի պատմվածքները, նա առանձին ջերմությամբ ու մտերմությամբ է խոսում կենդանիների ու թռչունների մասին:

Իր մանկության օրերի վերհուշերին նա բանաստեղծություններ ունի նվիրած, ինչպես «Հիշողություն հայրենիքից», «Մանկություն», «Պատրանք», ինչպես և արձակ գործեր, որոնց մեջ վերապրում է իր անցած անհոգ օրերի տպավորությունները: Ինչպես ասացինք, նա ունեցել է երեք քույր, չորս եղբայր, իր փոքր եղբոր հետ նա սովորել է Չալալօղլու դպրոցում և խաղացել սարերում: Իր այդ բանաստեղծություններից մեկում վերհիշում է և նրանց.

Ահա փոքրիկ իմ քույրերը
Խաղ են անում միասին,
Օ՛հ, անհանգիստ, չար եղբայրը
Նրանց ծեծում է կրկին...

Չարանձի ու անհանգիստ է եղել իրենից երկու տարով փոքր եղբայրը և միաժամանակ շատ ընդունակ, որին և հիշում է իր բանաստեղծությունների մեջ:

«Հիշողություն հայրենիքից» ոտանավորի մեջ նա հիշում է «բազմահոգ գյուղացուն», որի «երեսին ծիծաղ չկա», ու լսում է նրա երգը՝ «միանման ու տխուր», թշվառ հայ գեղջկուհուն՝ «դեմքը վշտոտ ու նիհար»: Եթեղ բնությանը նա հակադրում է իր վշտակիր երկիրը:

Ի՛նչ սիրուն է և հոյակապ
Հայրենիքս վշտակիր:

ԽԱՂԵՐԻ ՈՒ ՀԵՔԻԱԹՆԵՐԻ ԱՇԽԱՐՀՈՒՄ

Գյուղի վայրերից, ուր անց է կացրել իր մանկությունը, Թումանյանն ամենից շատ Դիդն էր հիշում ու սիրում:

Դիդը գյուղի հյուսիսարևելյան կողմում, հարթավայրի կենտրոնում՝ քարոտ կատարով մի բլուր է: Հնում, հարձակումների ժամանակ, դիտարան է եղել, հետո դարձել է ուխտատեղի, այժմ գրոսավայր է հովեկների համար: Բլրի կատարին մի հին մատուռ է կանգնած, իսկ չորս կողմը տարածվում են գյուղի արտերը: Դիդ գյուղի կատարից երեվում է Դսեղն իր շրջակայքով ու սահմաններով:

Դիդ գյուղում ամառը միշտ հով է, օդը դուրեկան և բուրումնալի: Այնտեղ քամին միշտ խաղում է ազատ...

Դիդի կատարին բուսնում են ուրց և անանուխ, ստորոտին՝ բազմազան բուրավետ ծաղիկներ. օդում ճախրում են արտույտները, թիթեռները թռչում են ծաղկից ծաղիկ ու կենդանացնում շրջապատի հարթավայրը:

Աշնանը լուռ է, տխուր և թախծալի. ծաղիկներն ու խոտերը թոշնած են, դեղնած... թռչունները չված, հեռացած...

Առաջ, բանաստեղծի մանկության տարիներին, Դիդի ստորոտում աղբյուրներ են եղել, որոնք հիմա ցամաքել են, կտրվել: Մնացել է մի մեծ կարմիր քար, որի տակ, ինչպես բանաստեղծն էր ասում, անձրև ժամանակ թաքնվել է ինքը՝ անհոգ փոքրիկ «եզնւրածը»: Մինչև հիմա էլ մնում է այդ քարը:

Դիդի ետևը, ձորի մյուս ափին, որպես ֆոն, ձգվում է Չաթինդաղ լեռնաշղթան, որի գագաթը գարուն-ամառ ծածկված է թխպով: Այդ այն լեռնաշղթան է, որի վրայով՝

...Ամպերը դանդաղ ուղտերի նման
Նոր են ջուր խմած ձորից բարձրանում...

Գիդի ստորոտին, գյուղի հակառակ կողմը, ձորափին՝
կանգնած է Սիրուն Խաչ գեղեցիկ խաչքարը, որ այն

...Քարի գլխից, լուռ մարդու նման,
նայում է ձորին...

Չորին, որտեղ գտնվում է Բարձրաքաչ ա. Գրիգորի վանքը,
տասներկուերորդ դարի գեղեցիկ հուշարձաններից մեկը:
Վանքի մոտ կա մի վճիտ ու սառն աղբյուր: Այդ աղբյուրը
և ձորը բանաստեղծի սիրած վայրերից են եղել՝ ինչպես
մանկության օրերին, այնպես էլ հետագայում:

Ինչպես տեսնում ենք, բանաստեղծի մանկության և
պատանեկության շրջանի վայրերը հարուստ են եղել պատ-
մական հուշարձաններով, որոնք մեծ ազդեցություն են
ունեցել նրա վրա: Հին դարերի այդ հուշարձանները առան-
ձին գեղեցկություն և հմայք են տվել Լոռվա բնությանը:

Թումանյանը շատ է սիրել այդ վայրերը, և տանից ու
դաշտի աշխատանքից ազատ՝ պտտել է այնտեղ:

Իր դասընկերներից մեկը՝ Գաբո քիձեն, պատմում էր
իրենց մանկության շրջանի օրերից ու սիրած վայրերից,
որ խաղացել են միասին:

«Հինգ-վեց տարեկան երեխեք էինք. անբան երեխեք. էն
ա հանդն էինք գնում, խաղ անում: Օհաննեսն էլ շատ էր
սիրում. տանից փախած սաղ օրը ման էինք գալիս: Գնում
էինք Դըդի ուսը. ապրանքը հետ էինք ածում, թոցնում:
Ընտեղից գեղի մյուս ծերն էինք վազում՝ Կաթնաղբյուրն ու
Առվյակը: Աղբրի մոտ հաց էինք ուտում կամ թե ծովերն
էինք գնում՝ մոռ, մոշ ուտելու, ծտի բույն ման գալու, ձու
հավաքելու...»

Աշնանը խմբով գնում էին վայրի տանձ ու խնձոր և զա-
նազան պտուղներ՝ հոն, կաղին, անար հավաքելու:

Ծատ են սիրել խաղալ ա. Գրիգորի վանքի և նրա աղ-
բյուրի մոտ: Այնուհետև իջել են Զաղի ձորը, այնտեղ, որ-
տեղ հիմա Թումանյանի անվան հրակայուն աղյուսների
հանքերն են:

Չաղի ձորը Լոռվա խիտ, կուսական և հարուստ ձորերից էր: Այդ ձորում՝ Դեբեդում լողացել են, խաղացել, ձուկ բռնել: Այսպես էր վերհիշում Գաբո քիձեն իրենց մանկությունը:

Այդ ձորում անցկացրած մանկության օրերը հաճախ էր հիշում բանաստեղծը հետագայում. «Օրը քանի՛ անգամ էի գնում-գալի Չաղի ձորը, ես հո ման չէի գալի, ուղղակի թռչում էի. մարդ է՛նքան էլ առողջ լիներ... անսպառ եռանդ էի...»

«Ծովերը», որ գյուղի գեղեցիկ անկյուններից մեկն է, գտնվում է գյուղից երկու-երեք կիլոմետր հեռավորության վրա. անտառի մեջ եղեգնուտով շրջապատված փոքրիկ մի լիճ, որ կոչվում է նաև՝ Տգրուկա-գոլ, որովհետև լիճը լիքն է տզրուկով: «Ծովերը»՝ առաջ երկու մեծ և փոքր լճից է կազմված եղել, այժմ փոքրը ցամաքել է և մնացել է միայն մեծը:

Ընորհիվ իր այդ թափառումների՝ Թումանյանը մանկուց արդեն լավ էր ճանաչում գյուղի, նրա շրջակայքի ու սարերի հուշարձանները, մութ ծմակներն ու թալաները: Նրան ծանոթ էին ամեն մի քար ու ծառ, ամեն այր ու վանք, խաչքար և քարանձավ:

Նա գիտեր բուսական աշխարհը, վայրի բույսերի, ծաղիկների բուժիչ հատկություններն ու անունները, գիտեր բանջարեղենների զանազան տեսակները, արմատեղենների անունները, ինչպես՝ կոճղեզ, ճանդուկ, ավելուկ, երիցուկ, ուրց և այլն:

Մանուկ Հովհաննեսի մեջ սերը դեպի բնությունը, դեպի խաղերն ու թափառումները շատ ուժեղ է եղել: Նա միշտ նախընտրել է բնության մեջ ազատ կյանքն ու երազանքը, խաղն ու երգը, ազատ ժամանցն ու զբոսանքը իր ընկերների հետ:

Թումանյանի մանկության օրերի արկածներից հայտնի է՝ «Չերքեզի պոզի» պատմությունը, որ ինքը՝ Թումանյանը, պատմում էր հետագայում:

Մի ամառվա շոգ օր, կալի ժամանակ Թումանյանի հայրը եզները կալն է անում լճելու: Հենց այդ ժամանակ գյուղացիները գալիս են հորը գյուղամեջ կանչում: Ամառվա շոգ օր, եզներն սկսում են այս ու այն կողմ գնալ: Հով-

հաննետը քար է գցում. քարը գալիս է դիպչում Չերքեզի պոզին, պոզը դուրս է ընկնում: Հովհաննեսն իսկույն վազում է, պոզը նորից տեղը դնում: Քիչ հետո հայրը գալիս է, ուզում է եզները լծել: Չերքեզը ցավից մոտ չի թողնում, որ ականջը բռնի: Հայրը՝ միամիտ, պոզիցն է բռնում, պոզը մնում է ձեռին, իսկ եզը փախչում է: Տերտերը հասկանում է, որ սա իր տղայի գործն է, բարկանում է, պոզը շարտում է տղայի կողմը, թե «Դու ինձ համար տուն չես շինի»: Հովհաննեսը թողնում է կալը, փախչում է Դրդի կողմերը՝ իր սիրած վայրերը...

Թումանյանը սիրել է կալի աշխատանքի հանգստի ժամերը: Այդ է պատճառը, որ նա ամենից շատ սիրում էր կալի դագեն և մոտի դեզերը: Տերեկը պսոկում էր սուվերում, իսկ ուշ երեկոյան՝ բաց երկնքի տակ, ու այնտեղ մտորում, երազում... Այնտեղ է գրել իր լիրիկական քանաստեղծություններից մի քանիսը, ինչպես՝ «Է՛յ աստղե՛ր, աստղե՛ր, երկնքի աչքեր...» և այլն:

Բանաստեղծի տաղանդի կազմավորման գործում մեծ նշանակություն են ունեցել մանուկ օրերին հայրենի օջախում տան մեծերից լսած գրույցները, լեզենդները, առասպելները: Ժողովրդի խոսքն ու գրույցը՝ համեմած առակներով և ժողովրդական դարձվածքներով ու ոճերով, հարբստացրել են նրա երևակայությունը և լեզուն. դա է եղել նրա առաջին դպրոցը: Եվ այդ է պատճառը, որ հետագայում բանաստեղծը այնքան կարևորություն է տալիս ժողովրդական բանահյուսությանը, և ինքն էլ առատությամբ օգտվում է մանկության և պատանեկության օրերին լսած գրույցներից: Այդ մասին ինքն էլ է հիշատակում հետագայում իր մի հոդվածում. «Էն գլխից սիրել և հետաքրքրվել եմ հեքիաթներով, լեզենդներով, առակներով և շատերն անգիր գիտեմ դեռ մանկուց»: Նա սիրել է սարերում ու ձորերում կամ գյուղի օդաներում գրույցի նստել գյուղի մեծերի հետ ու լսել նրանց. սիրում էր գյուղացու կենդանի խոսքը՝ գրույցը, նրա շվին, նրա սայլի ու կալի երգը: Ինչպես ասում են՝ Թումանյանի ականջը ժողովրդի լեզվին էր:

Բանաստեղծն առանձին քաղցրությամբ էր հիշում գյուղում անցկացրած օրերը: Իր պատմվածքներից մեկը՝ «Իմ

ունկեր Նետոն», որի մեջ կենսագրական շատ բան կա, հենց այդ օրերի նկարագրությամբ էլ սկսվում է:

«Մի խումբ ընկեր երեխաներ էինք: Գյուղացի երեխաներ:

Ո՛չ ուսումնարան կար, ո՛չ դաս, ո՛չ դաստիարակություն. ազատ էինք միանգամայն ու խաղում էինք. ի՛նչքան էինք խաղում: Ու ո՛նց էինք իրար սիրում, ո՛նց էինք իրար սովորել: Սոված ժամանակներս էլ վազում էինք, հացի սաշտիցը մի կտոր հաց առնում, պանրի կարասիցը մի կտոր պանիր, ու էլ ետ շնապում իրար մոտ: Երիկուններն էլ հավաքվում էինք, ծիծաղ բաներ ասում կամ հեքիաթ պատմում:

Մի ընկեր ունեինք, անունը Նետո: Է՛նքան հեքիաթ գիտեր, է՛նքան հեքիաթ գիտեր, որ ոչ ծեր ուներ, ոչ տոտ:

Ամառվա լուսնյակ գիշերները մեր դռան գերանների վրա շուրջ-բոլոր նստոտում էինք, հիացած պլըշում Նետոյի՝ ոգևորությունից գեղեցկացած դեմքին: Ու պատմում էր նա հուրի փերիներից, Ջմրուխտ Ղուշից, Լիս ու Մութ աշխարհից...»

Մանկության տարիներին իր ընկեր Նետոյից լսած հեքիաթներից շատերը Թումանյանն աճօր գիտեր:

Իր տան մեծերից ու քեռիներից լսում է լեգենդներ, գրույցներ և զանազան պատմություններ: Նա սիրով ու կարոտով էր հիշում այն օրերն ու գիշերները, երբ իր հարազատների շրջանում լսել է նրանց գրույցը:

Որ որ հայրենի օջախի առաջ.....

Ու ձմռան երկար գիշերը նստած՝

Խոսում են Լոռու հին-հին քաջերից...

Նա սիրով էր հիշում աշնան այն օրերը, երբ քեռիները սարից ձիով տուն դառնալիս՝ ճանապարհին առակ ու լեգենդ էին պատմում: Նա հիշում էր քեռի Իսայուն, որը նրան պատմել է «Ծունն ու կատուն» գրույցը, «Արծիվն ու Կաղնին», «Անբախտ վաճառականները» և մյուսները: Հետագայում, երբ սկսում է գրել, Թումանյանն առատությամբ է օգտվում մանկության օրերին գյուղում լսած այդ ժողովրդական նյութերից՝ հեքիաթներից և լեգենդներից:

Հեքիաթների ու լեգենդների հետ միասին բանաստեղ-

ծը սիրում էր սարի շվին: Սիրում էր սալվորի երգը, կալի երգը, գութանի հորովելը գյուղում, հանդերում, իսկ սարերում՝ դագաների առաջ, նա պատկոսում էր «թա՛րմ, ցողապատ լեռների լանջում», ժամերով լսում հովիվների սրինգը, նրանց կանչը, նվազն ու բայաթին:

Սրինգ ածողներին ու առակ պատմողներին Թումանյանը միշտ հիշում էր ու սիրում: Հետագայում, երբ Թիֆլիսից գյուղ էր գնում, պահպանում էր իր սերտ բարեկամությունը նրանց հետ, հրավիրում էր տուն, հյուրասիրում, նվերներ տալիս՝ գիրք, ծխախոտ, արխալուղ կամ ուղղակի դրամ:

Շվի ածողներից Դսեղում այն ժամանակ հայտնի էին քեռի Եզեկը, հովիվ Ակոփը, Ղշի Միխակը և մյուսները, առակ ստղներից՝ Մելքոնանց Օհաննես ապին: Նա մի ծեր, չքավոր բոստանչի էր, որ մշտապես ապրում էր Զաղի ձորում, ամառները բանջարեղեն էր մշակում ու դրանով ապրում:

Ահա այդ Օհաննես ապիի դափումն է հաճախ գիշերը մնացել Թումանյանը, նրա հետ եղնիկի որսի գնացել, կրակի կողքին նստած զրույց արել որսից ու կենդանիների կյանքից:

ԲՆՈՒԹՅԱՆ ԳՐԿՈՒՄ

Հեքիաթների ու խաղերի աշխարհից դուրս Թումանյանը մի ուրիշ ավելի մեծ աշխարհ ուներ, որին կապված էր վաղ մանկուց, նրա գիրկն էր գնում միշտ, նրանից շատ բան էր ստացել, շատ բան սովորել: Այդ աշխարհը բնությունն էր՝ իր ծննդավայրի լեռները: Բնությունը բանաստեղծի ներշնչարանն էր: Նա սիրում էր Լոռու վայրի բնության շքեղ տեսարանները, նրա «վես ու վիթխարի լեռները», որոնք հարբած շարքերով շուրջպար էին բռնել, սիրում էր սաղարթախիտ կուսական անտառները, թավուտ ծմակները, մամոռոտ ժայռերը. սիրում էր նրա սառն ու վճիտ աղբյուրները, բնության բոլոր գույները, ձայները...

Նա հաճախ է առանձնացել բնության գրկում ազատ ապրելու, նրա հետ ձուլվելու, նրանով շնչելու: Սիրել է

թափառել Լոռու անտառներում մեճ-մեճակ, իր ցնորքների հետ կամ հանդի լուռության մեջ լսել թռչունների ծլվլոցն ու արտերի սվավոցը...

Լոռու հանդերն ու արտերը առանձնապես սիրուն ու կենդանի են գարնան օրերին, երբ ծաղկի ու կանաչի բացվելու հետ միասին սկսում են երգել ծղրիդները, ճախրեւ արծիվները, արտերի մեջ՝ արտորել արտույտները:

Իր կյանքի հասուն շրջանում նա հիշում էր Լոռվա հանդերի արտույտները... վերհիշում իր մանկությունը, վերապրում ու կարոտում...

Կյոսացնում են, արտորում
Արտույտները արտերում,—
Թռչում մանուկ հոգու հետ,
Ծախրում, ճխում եթերում:

Նա հիշում էր իր հայրենի անտառները՝ գարնան բացված լորիները, աշնան դեղին ու կարմիր կաղնի և հաճախի շքեղ ծառերը, որոնք ասես կանչում էին իրեն,— հիշում էր, տխրո՞ւմ... կարոտո՞ւմ...

Ո՞վ է ձեռքով անում, ո՞վ,
Հեռվից անթիվ ձեռքերով.
— Ջա՛ն, հայրենի անտառներ,
Դուք եք կանչում ինձ ձեր քով:

Բնության կարոտը թախիժ էր բերում նրան: Առանձին խորությամբ է հիշում նա իր հայրենի ամպամած լեռները, միշտ ոգևորվում նրանցով ու կարոտով նրանց գիրկը թռչում:

Իր պատմվածքներից՝ «Ծղրիդում» զգացվում է Թումանյանի այդ խոր և մեծ կարոտը, մանկության օրերի վերապրումը. «Լսե՛լ եք է՛ն թախձալի ճրոտոցը, որ ծաղկի բուրմունքի ու կանաչի թարմության հետ խառնված հոսում է գարնան դաշտերի երեսով:

Իհարկե լսել եք, և ինչքա՛ն եք լսել: Դեռ ով գիտի, գուցե էդ ժամանակ մի ծառի կամ թփի տակ պառկած խորասուզվել եք ջինջ կապույտ երկնքի խորության մեջ, մաքուր, թեթև երազների մեջ, իսկ չորս կողմերդ ծափավորում է համատարած՝ ճր՛ոռ... ճր՛ոռ...

Հանդի կամ դաշտի ծղրիդն է իր անթիվ ու անհամար ընկերներով:

Կամ գուցե հիշո՞ւմ եք էն մելամաղձո՞ր՝ ճրոռոցը, որ ամառվան իրիկունները մեճակ ու միալար հնչում է գյուղական խաղաղ տան մի որևէ անկյունից:

Եվ ի՞նչ դուրեկան թախիծ է բերում մարդու հոգուն, ի՞նչ խաղաղություն, մանկության օրերից, մանկության իրիկուններից, նրանից էլ կարծես դեճը՝ հեռավոր ու անորոշ հիշողություններ...»

Ինքն է այստեղ, Թումանյանը՝ իր մանկության օրերին, բնության գրկում, մանկության հիշողությունների քաղցրության հետ միասին:

Ամառները, երբ Թիֆլիսից գյուղ էր գնում, նա հաճախ բարձրանում էր Դիդը՝ զբոսնելու. պառկում էր նրա ստորոտին ու նայում մոտակա արտերին, հեռավոր անտառապատ սարերին և մտքով թռչում, սլանում դեպի Լոռում անցկացրած իր մանուկ օրերը, երազանքները, արկածներն ու խաղերը:

«Հե՛յ, գիտի հա՛... ի՞նչ օրեր եմ անցկացրել փոքր ժամանակս էստեղ: Երեխեքով հավաքվում էինք Դըդի դոշը՝ ուրց էինք քաղում, հասկերից պկու* շինում, մեջքներիս վրա պառկում էինք ու ածում... ի՞նչ լավ էր...»

Արտերի միջնակներում ինչքա՛ն մորի եմ հավաքել, ծմակներում կխտարի որս արել...»

Նա հիշում էր իր խաղերը, արկածները, իր լավ օրերը, որ անց էր կացրել այնտեղ:

— Էն ի՞նչ բան էր, մարդ որ հիշում է... շա՛տ էի խաղում, վազում, վազվզում, ինչքա՛ն էի շար ու շարաճճի, ինչ օյին ասես չէի սարքում... Է՛... Է՛...»

Իր կյանքի վերջին օրերին, 1923 թվի մարտին, Մոսկվայում, մի անգամ էլ անհուն կարոտով հիշում է Դիդը.

«Ծատ էի ուզում, որ Դիդ գյուղի ուսին լինեմ. էճտեղ եմ անցկացրել երեխա ժամանակիս լավ օրերը... շա՛տ եմ խաղացել էճտեղ, շա՛տ...»

Մանուկ Թումանյանի վրա խոր տպավորություն է արել

* Պկու— նվազածության գործիք՝ հասկի ցողունից կամ եղեգնից պատրաստած:

Դեբեդ գետն իր վշտոցով ու իր ձորով: Դեբեդի ձորն ու նրա վշտոցը հաճախ է պատահում ու հիշվում բանաստեղծի պոեմներում ու պատմվածքներում: Դեբեդը մասնակից է պոետի և նրա երկերի հերոսների ապրումներին: Դեբեդը ուրիշացած է, շնչավորված: Նա մերթ սգում է ու հեծեծում՝ ծեր նանի հետ խավար անդունդում, մերթ հուզված, խլածայն ողբով սողում դեպի ցած կամ տխուր շարական երգում, իսկ ավելի հաճախ՝ մոռնում է մեռակ, խոր ու մութ ձորերում, խոսում բանաստեղծի հոգու հետ, իսկ նրա սկանջը Դեբեդի ձայնին է, Դեբեդի հետ:

Իր կենսագրական նյութերի մեջ Թումանյանը գրում է.

«Իմ մեծ ուսուցիչն է եղել Դեբեդի վշտոցը՝ գիշերները լուսության մեջ միշտ սկանջ էի դնում Դեբեդի ձայնին, երբեմն խուլ ու խոր, երբեմն պարզ ու ահավոր: Եվ կարծես խոսում էր հոգուս հետ...»

Այո՛, կենդանի է ու շնչավորված Դեբեդը Թումանյանի Ուամար: Նա երբե՛ք, երբե՛ք չէր մոռանում Դեբեդի վշտոցը, նրա փրփրադեզ ալիքները, նրա ժեռուտ, քարքարոտ ափերը, նրա խիտ, անտառապատ ձորերը, նրա ափի շքեղ և փունագեղ ծաղիկները... Հարազատ ու թանկ էր Դեբեդը բանաստեղծի հոգուն:

Դեբեդի վշտոցը գյուղում գիշերային խաղաղության մեջ ավելի լավ է լսվում, ավելի տպավորիչ է ու խորհրդավոր, բան ցերեկը: Ցերեկները գետը երևում է գյուղի ձորափի ժայռերի գլխից, այդտեղից ամբողջ ձորն է բացվում՝ խոր, լայնաբերան, և անդունդ, ձորի միջով օձապտույտ ու կատաղի հոսում է Դեբեդը, նրան զուգահեռ անցնում է երկաթուղին:

Դեբեդի ձորը բանաստեղծի սիրած վայրն էր, որ գյուղի ամենամոտ ձորն է, գտնվում է հենց Դսեղ գյուղի տակ և կոչվում է «Տան տակի ձոր»: Այդ այն ձորն է, որի նկարագրություններով է սկսում Թումանյանն իր «Լոռեցի Սարուն»:

Դեբեդի շքեղ ու հարուստ ձորը հաճախ էր հիշում բանաստեղծը: «Ամբողջ ձորը ծածկված էր խիտ անտառով, գետը հագիվ էր երևում նրա վրա կախված ծառերի տակից: Ահով ու սարսափով էինք մտնում այդ անտառը՝ Դեբեդի մեջ լողանալու համար: Մեր այգում՝ հրե՛ն այնտեղ,

հսկայական ընկուզենիներ կային: Կանգնում էինք նրանց տակ, փայտե ճղորուտներով ահագին տարածության վրա խփում էինք ծառերի վերին ճյուղերին, թափում կաղաղահաճ ընկուզենիները... Հիմա... քաշալացել է մեր ձորը, կտրատել են ծառերը և դեռ կտրատում են անդադա՛ր»:

Դեբեդի այդ ձորն այն ժամանակ հարուստ է եղել հաստաբուն, դարավոր կաղնիներով, ընկուզենիներով և պրտադատու այլ ծառերով ու խաղողի այգիներով: Այդ ձորումն է եղել բանաստեղծի պապերի ընկուզենու հին այգին ու ջրադաջը:

Երբ 1898 թվին կառուցվում է Թիֆլիս—Ղարս երկաթուղին, Դեբեդի ձորի հարուստ անտառը և ընկուզենու այգին ոչնչացնում են: Կտրվում են հարյուրավոր հաստաբուն ընկուզենիներ և հազարավոր դալար ծառեր: Երկաթգծի մոտ պահպանվել է այդ հաստաբուն ընկուզենիներից միայն մեկը, այն ընկուզենիներից մեկը, որի հովանու տակ աշակերտ Թումանյանը ներկա է եղել իր պապերի քեֆին և որի նկարագիրը տվել է իր «Հին օրհնության» մեջ:

Կանաչ վիթխարի ընկուզենու տակ,
Իրենց հասակի կարգով ծալպատակ,
Միասին բազմած,
Մի շրջան կազմած,
Քեֆ էին անում
Եվ ուրախանում
Մեր հսկա պապերն ու մեր հայրերը՝
Գյուղի տերերը...

Ասում են, մինչև հիմա էլ Դեբեդի ձորում դեռ մնում են այդ այգու հետքերը՝ խորը թաղված գիճու երկու մեծ կարաս, խաղողի որթեր, իր տասի սիրած թթի և հոնի ծառերը:

Գյուղից վերև գտնվում է այն վճիտ ու սառն առվակներից մեկը, ուր փոքրիկ Հովհաննեսն իր խաղընկերների հետ ամառը հաճախ գնացել է լողանալու: Դեբեդ գետում իր ընկերների հետ ձուկ է բռնել, լողացել, խաղացել:

Ի՛նչ հաճելի և ուրախ ժամեր է անցկացրել բանաստեղծն իր ընկերների հետ.

...Էն առվակում կեսօրին,
Երբ որ շոգից նեղանում,

Գնում էինք լողանում,
Տկոյր, աշխույժ խմբակով,
Աղաղակով, աղմուկով
Խաղում էինք, վազվզում
Գույն-գույն մանրիկ ավազում:
Կամ հետևում հեկհե
Թիթեռնիկին ոսկեթև...

Այս հեշտ ու թեթև, ուրախ ժամերի հետ բանաստեղծն ունեցել է և տխուր պահեր: Չորում, գետափին, դափաներում* նա հանդիպել է չքավոր ու կարիքավոր գյուղացիների, գիշերներ անցկացրել նրանց հետ, ցավակից եղել նրանց, լսել զրույցներ նրանց ծանր ու դժվարին կյանքի մասին:

Ավելի ուշ, աշակերտական տարիներին, այդ հեքիաթային գիշերների մասին ինքը հիշում էր ու պատմում: «...Աշակերտ վախտս էր. Ղոխնանց Պապը մեր ձորումը գիշերները կրակի դրաղին չիբոյխ էր սարքում, հեքիաթներ ասում... Դեբեդը վշշում էր... ձորերը թշշում, ձեն տալիս, պախրեն գոռում էր... Ղոխնանց Պապը պատմում էր, մենք էլ լսում էինք. լա՛վ պատմող էր...»

Այդ գիշերներն ու զրույցները, գյուղացու պատմածների Թումանյանը հետագայում պատկերել է «Հառաչանք» պոեմում:

ՍԱՐԵՐՈՒՄ

ԲՇուրջյան գեղեցկությունն ու շքեղությունը, գյուղի կյանքն ու կենցաղը Թումանյանն ավելի խոր կերպով զգացել է ու ապրել սարերում: Սարը նրա տարերքն էր: Սարի սկզբը վաղ է զարթնել նրա մեջ և մնացել մինչև իր կյանքի վերջը: Սիրում էր սարը, սարի-կյանքը, սարի արշալույսն ու վերջալույսը:

«Իմ կյանքի ամենալավ ու ամենաքաղցր օրերը սարերում եմ անցկացրել», — ասում էր Թումանյանը, հիշելով իր կյանքի շրջանները, որ անց էր կացրել Լոռում: Սար գնալը Թումանյանի մեջ թողել է շատ թանկ հուշեր:

* Դափա — տաղավար, ձորերում, բանջարանոցներում ամառվա բնակիկի տեղ, շինված է փայտից, վրան թեք մանր տախտակներ ու ճյուղեր, առաջը՝ բաց:

Իր մանկության շրջանի գարունները Թումանյանը սարերում է ապրել: Սիրում էր, երբ վաղ գարնանն սկսվում էր փոթորկի, կայծակի, հեղեղի ու տարափի շրջանը, երբ ջրերը հորդանում էին, բնությունը զարթնում՝ սարերն ու ձորերը կանաչ հագնում, մեկ թուխս ու մշուշի մեջ էին կորչում, մեկ պայծառանում, շքեղ ու սիրուն տեսարաններ կազմում, և այդ քոլորից հետո՝ բացվում էր սարի գարնան չքնաղ առավոտը՝ թարմ, ցողապատ ու բուրավետ, հետն էլ բինաներում զարթնում էր սարվորների կյանքը՝ աշխույժ, զվարթ ու կենդանի:

«Անուշ» պոեմում Թումանյանն առանձին կարոտով է վերապրում սարի գեղեցիկ թարմ առավոտը, առանձին շքեղությամբ է նկարագրում ու երգում բնության թովչանքն ու հմայքը.

Ահա բացվեց թարմ առավոտ,
Վարդ է թափում սարին, քարին,

Ծաղ են շողում ծաղիկ ու խոտ,
Ծնչում բուրմունք եղեմային:

Ա՛խ, ի՛նչ հեշտ են սարի վրա
Սահում ժամերն անո՛ւշ, անո՛ւշ...

Թումանյանի սրտին թանկ էր ու հարազատ սարի կյանքի ամեն ձայն ու աղաղակ, ամեն վայր ու տեսարան: Հետագայում, երբ արդեն բանաստեղծ էր, նա կարոտով էր հիշում սարի կյանքն ու տխրությամբ դառնում այդ անցած, գնացած օրերին.

Եվ մութ այրերից մամոտ ժայռերի,
Թափուտ ծմակի լոին խորքերից,
Մանուկ հասակիս հնչուն ծիծաղի
Արձագանքն ահա լսում եմ նորից...

...Եվ անքուն հովվի սաստող, ազդարար
Աղաղակները ականջումս են դեռ:
Իսկ առավոտյան աղմուկը քինի,—
Հաչոց, բառաչոց, խրխինջ ու գոչյուն...
Այն աղմուկի մեջ կիսավայրենի

Ինձ սիրելի է ամեն մի հնչյուն:
Ես այն սարերումն էի երեխուց...

Թումանյանը չէր կարողանում մոռանալ սարերի հեքիաթային աստղալից գիշերը, երբ սարվորները, իրենց օր-

վա աշխատանքից հոգնած, հավաքվում էին վրանների առաջ և սկսում շվի ածել, երգել, պարել, իսկ մեծերը սարքում էին իրենց շիբուխներն ու սկսում պարզ լեռնական գրույցը՝ համեմած առակներով ու պատկերավոր դարձվածքներով: Պատմություններ էին անում սարերի կյանքից, անցած դեպքերից, իրենց որսորդական արկածներից և կենդանիների կյանքից:

«Է՛... Է՛...Է՛, կրակ էինք անում, շուրջը նստոտում, մինչև կեսգիշեր գրույց անում, հեքիաս սսում, որը շիբխին Լր գոռ տալիս, որը քնում էր... քեռի Եզեկն էլ շվի էր ածում...» Այսպես էր հիշում ու վերապրում բանաստեղծը սարերում անցկացրած գիշերները: Սարվորները հաճախ մութ գիշերներին ականատես էին լինում զանազան դեպքերի՝ աղջիկ փախցնելուն, գողության «հավարի» վրա տալուն, հարա տալուն և այլն... ու խանգարվում էր սարվորների գիշերվա խաղաղ կյանքը: «Մեկ էլ տեսար մի սարի ուսից տարածվեց մի զիլ, առաձգական ձայն.— Հավար հե՛՛յ... Այդ գուժավոր ձայնը ձգվելով՝ տարածվում է լեռներում ու հանկարծ երկու կողմերումն էլ քիներքում իրարով ևն անցնում...»*

Սարերի հավարի գիշերների նկարագիրը Թումանյանը պատկերել է իր բանաստեղծություններից մեկի մեջ, որը հենց «Սարերում» վերնագիրն է կրում: Բանաստեղծը նկարագրում է սարերում տեսած իր այդ գիշերներից մեկը, անձրևն ու տարափը, հավարն ու աղաղակը:

Մութը իջավ, գետին առավ
Քոշաքարա սարերում,
Գագաթների տեսքը կորավ
Ու խոր թաղվեց խավարում:

Երկինքն ամպած, տխուր ու սև
Լաց է լինում միայտար,
Հեռո՛ւ, հեռու լեռան հետև
Խաղում փայլակն անդադար:

...Ամպը գոռաց ու տրաքեց,
Եվ անձրևը սաստկացավ,
Հովիվն— «հե՛՛յ, հե՛՛յ...» աղաղակեց,
Ծունը թևից վեր կացավ...

Հրացաններն որոտացին,
Ոչխարն եղավ ցան ու ցիր,

* «Գրագր»

Հավարն ընկավ, ողջ զարթնեցին...

Գիշերը մոլորեց, ակնակիր...

Լոռու սարերում, մանավանդ գարնանը, կայծակ ու հեղեղ հաճախ են լինում. լեռնային բնության ամենագեղեցիկ ու ամենաշքեղ երևույթներից մեկն է այդ: Ուժեղ էր և խոր Թումանյանի սերը դեպի լեռները, դեպի կայծակն ու հեղեղը, դեպի որոտն ու ճայթյունը և նրա արձագանքը լեռներում ու ձորերում: Նա սիրում էր բնության այդ տարերքը, սիրում էր Լոռու ամպամած լեռները, ազատ սարերի քարձուկները և նրանց ձյունապատ գագաթները:

Լեռներին է դիմում բանաստեղծն իր երգերում, որպես մանուկ օրերի իր դայակի, իր ներշնչման աղբյուրի, որպես, ապաստարանի և հանգրվանի, նվիրական, թանկ ու հարազատ մտերիմի ու ընկերոջ:

Որքան հարազատ ու թանկ են եղել նրա հոգուն այդ վայրերը, նույնչափ սիրելի և մոտ են եղել այդ շրջապատի դեմքերը: Սարերում նա ապրել է իր քեռիների, տատի ու պապի և իր մոր շրջանում՝ միշտ սիրված, գուրգուրված: Նրա խաղընկերն էր գառնարած Նիկայը, որի հետ գառներ է պահել սարերում:

Քեռիները փորձված որսկաններ ու հովիվներ են եղել. հաճախ փոքրիկ Հովհաննեսին իրենց հետ սարերն են տարել ման ածելու. «Նա ինձ տանում էր ման էր ածում գառների մեջ,— գրում է Թումանյանն իր «Ահմադը» պատմըվածքում,— հետը հանդից հաղարջի կարմիր ճյուղեր էր քերում ինձ համար, իսկ իրիկունները հանում էր սրիճոն ու ածում:

Ու աստղալի, լուսնյակ գիշերները, ահագին խարույկի շուրջը բոլորած, ծափ էին տալի, խնդում էին իմ պապն ու տատը, իմ քեռիները, իսկ ես թիթեռի նման թռթռում, պար էի գալի. նրանց շրջանի մեջ»:

Քեռիները նրան սարն էին տարել որսի: «Աշակերտ վախտը հենց որ գյուղն էր գալիս միասին գնում էինք որսի,— պատմում էր Մովսես քեռին:— Ծատ էր սիրում որսը, թվանքի հետ էլ շատ էր լավ՝ տեղին տվող էր: Էն ա թվանքը առնում էր, հանդերը, սարերը դուրս գալիս»:

Թումանյանը ձորերում Անդրեաս քեռու զրույցն է լսել գայլերի մասին, նրա հետ արջաորսի գնացել, այդ բոլորը

տեսել է, ապրել և հետագայում պատկերել է իր երկերում, ինչպես՝ «Արջաորսը», «Գելը», «Եղջերուն», «Շունը» և այլն:

Որսի ժամանակ, թափառելով հանդերում ու անտառներում, նա մոտիկից ճանաչել է շրջապատի բոլոր գեղեցիկ վայրերը, պատմական հնությունները: Նա սիրում էր հատկապես Տափակ մերու անարկուտը և Արփաթափ կաղրնկուտը*:

Սիրում էր ավելի սաղարթախիտ, թավ անտառը, անտառի յուրահատուկ բույրը, ծառերի ստվերը, տերևների հոփը: Վճիտ ու պարզ աղբյուրների մոտ, խոր ու խորհրդավոր անտառի մեջ սիրում էր լսել թռչունների ձայնը, նրանց տխուր ծկլտոցը, որ մարդու սրտին թախիժ և տխրություն են բերում, ինչպես «սհակ» թռչունի ձայնը Ջաղի ձորում:

Հայրենի կուսական անտառներն առանձին շքեղության ու վեհության են հասնում Լոռու բարձր սարերում: 'Կյուղից մինչև իր մանկության վայրը՝ Մթին Ջորը (Ղարանդուղդարա սարը), ճանապարհը ծածկված էր խիտ ու գեղեցիկ անտառներով: Այդ անտառները Թումանյանը նամարում է երկրի գանձը, հարստությունը: Նա միշտ մտահոգված էր նրանց պահպանման գործով: Նա ցավով էր լսում անտառները ոչնչացնելու, ծառերը կտրատելու մասին: Հատուկ սեր ու հետաքրքրություն ուներ դեպի անտառը:

Մեր երկրի պատանիները խնամքով պիտի վերաբերվեն դեպի անտառը, ծառը, պահեն ու պահպանեն նրանց:

Լոռու անտառները շքեղ են գարնանը, մանավանդ աշնանը: Թումանյանին առանձնապես դուր էր գալիս ուշ աշնան անտառը գույնզգույն տերևներով՝ կանաչ, դեղին, կարմիր, ոսկեգույն, և անտառի մեղմ դուրեկան օդը՝ հագեցած կանաչ խոտի ու հողի շնչով: Սիրում էր ուշ աշնան անտառի տերևաթափը, երբ չոր տերևները ոտքի տակ խշշում են և ներդաշնակում ժայռերի միջից խխոջացող աղբյուրի հետ:

Մանկության օրերը,¹ հայրենի բնության տպավորու-

¹ Կաղնու և հաճարի խիտ ու գեղեցիկ անտառները գյուղից տասն-միևեց-քսան կիլոմետր հեռավորության վրա:

թյունները նա մտաբերում էր շատ տարիներ հետո, իր կյանքի վերջին շրջանում, երբ քաղաքական-հասարակական լայն կյանքով զբաղված՝ զուրկ էր իր ծննդավայրը գնալու հնարավորությունից: Բանաստեղծն առանձին կարողանում ու թախիժով էր հիշում, վերապրում սարերի կյանքը, մանկության պայծառ օրերը. այս կարոտը արտացոլվել է «Պատրանք» գեղեցիկ և հուզիչ բանաստեղծության մեջ:

Նա հիշում է իր հարազատների, իր փոքր եղբորը, որի հետ անց է կացրել իր մանկությունը սարերում, հիշում է իրենց սարի շանը՝ Չալակին, որը մութ ու ահավոր գիշերներից վրանների մոտ ոչխարի հոտի թևին* նստած հսկել է հոտը գայլից ու գողից:

Մանկության օրերի այդ հարազատ ու թանկ ձայները մնում են նրա ականջում որպես պատրանք...

Վեր է կացել էն սարում
Մեր Չալակը իր թևից,
Գնում է մութ անտառում,
Քաջ ախպերս ետևից:

Զրնգում են նրանք խոր
էն անտառում կուսական.
Ես կանչում եմ նորից նոր,
Ինձ թվում է, թե կգան...

Զո՛ւր... Վաղուց են, ա՛խ, նրանք
Մեր սարերից գնացել,
Էն գիլ ձեներն է մեռակ
Իմ ականջում մնացել...

ԳՅՈՒՂԱՑԻՆԵՐԻ ՀԵՏ

...Եվ պարզ աչքով ես տեսնում եմ
Հայրենիքս ծաղկավետ,
Այն ճոխ երկրից ես լսում եմ
Անհոգ ծիծաղ լացի հետ:
(«Հիշողություն հայրենիքից», 1890 թ.)

Գեղեցիկ ու փարթամ բնության ծոցում ապրող մանուկ Հովհաննեսի օրերը միշտ չէ, որ ուրախ են անցել: Ուրախ և անհոգ օրերին զուգորդել են և խառնվել տխուր տարավո-

* Թև.— ոչխարի հանգստի ժամանակ ամեն մի շան նստեցնելու և հսկելու որոշյալ տեղը:

րություններ, ապրումներ: Նա լսել է գյուղացիների տխուր երգն ու հառաչանքը: Տեսել է գյուղացու թշվառ կյանքն ու ծանր աշխատանքը:

Վաղ մանկությունից շփվելով գյուղացիների հետ, նա մոտիկից դիտել է գյուղացիների ծանր ու չարքաշ կյանքը, տեսել է, թե ինչպես գյուղացուն կեղեքում և շահագործում են քյոխավաները, գյուղի վաշխատուներն ու պետական պաշտոնյաները: Այդ տպավորությունների արդյունքն է տասնութ տարեկան հասակում գրված նրա «Գութանի երգը», որի մեջ աշխատավոր ու չքավոր գյուղացու ցավի և կարիքի մրմունջն է լսվում:

Պարտքատերը գանգատ գնաց,
Բյոխվեն կգա, կծեծի,
Տերտերն օրհնեց, անվարձ մնաց,
Կբարկանա, կանիծի...

Ութսունական թվականներին Լոռում, ինչպես և մյուս շրջաններում, թեև արդեն վերացել էր ճորտատիրությունը, բայց պատանի բանաստեղծը տեսնելով գյուղացու չարքաշ կյանքը, նրա կեղեքումները տերերի կողմից, նրա հողագործական դրությունը, ակամայից գյուղացու դրությունը համամատում է ճորտի դրության հետ և հետագայում իր ճանապարհորդական նկատողություններում գրում է.

«Այս ժողովուրդը թեև քսանական թվականներին ապրտամբվել, ձեռք էր բարձրացրել ճորտության դեմ, բայց ահագին մեծամասնությամբ այսօր էլ մնում է ակամա ճորտ, շնորհիվ այս գավառում եղած խոշոր կալվածատիրության:

Ամենալավ, բերրի հողերը պատկանում են թավադներին»:

Գյուղացին հողից ու հացից զուրկ՝ վարում է, ցանում թավադների հողը, ծառայում է նրանց, կատարում է աղա հողատերերի հրամաններն ու կամայականությունները և ինքը ապրում զուրկ ու խեղճ:

Նրա միակ ապավենը և ընկերը մնում էր իր գութանը, լծկանը, որին և դիմում է աղի մրմունջներով.

Արի՛, եզը ջան,
Ախպեր ջան արի՛,

Արի՛, ընկեր ջան,
Թառլան ջան, արի՛.
Հո՛րովելա՛...

Խեղճ ու աղքատ գյուղացին «ձեռը պակաս, ուժը հատած», «հազար ու մի ցավի տեր», իր սև օրին ճար անելու համար աշխատում է, իր տխուր հորովելը կանչում, որպեսզի պահի «մերկ ու սոված մի տուն լիքը մանուկներին», որոնց ինչպես ինքն է ասում՝ «կրակն ածես հոտ չի գալ...»

Ահա այդ ժամանակներում է ապրել Թումանյանը, գյուղացու ծանր ու չարքաշ ճորտ դրությունն է տեսել:

Հայրենասեր բանաստեղծը, տեսնելով գյուղացու հեծեծանքը, վիշտը, ինքն էլ տանջվում է նրա հետ: Նրա մեջ բուն ցանկություն է զարթնում պատմել իր աչքով տեսածը, պատմել այն մասին, թե գյուղացին՝

Ինչպես է ապրում երկրում իմ սիրած,
Եվ պատանեկան վատահ ցնորքով
Նրանց բողոքին լինել ձայնակից.
...Եվ կաղաղակեմ, քանի տեսնում եմ
Քո շեմքի վրա օտարի հետքեր,
Եվ կհառաչեմ, քանի ծխում եմ
Քո կրծքի վրա նորանոր վերքեր:

Այս ցանկոտ տողերը, որտեղ երևում է բանաստեղծի ատելությունը կեղեքողների և մեծ սերը աշխատավոր ժողովրդի հանդեպ, ըմբոստ բանաստեղծը գրել է իր կյանքի վաղ շրջանում՝ 1890 թվին:

Գյուղացու հեծեծանքով և բողոքով լի ծանր կյանքն է տեսել Թումանյանը, ձայնակցել է նրան և

Սիրել տանջվել նրա ցավերով...

Գյուղում ուր աչք է դարձնում պատանի բանաստեղծը, լսում է միայն թախծալի և ծանր հառաչանք: Գյուղացու հորովելը՝ տխուր ու միալար, հովվի սրինգը՝ վշտոտ և թախծոտ, ծեր այգեպանի զրույցը՝ դառն հեծեծանքով լի... Նա տեսնում է բազմահոգ գյուղացու ճակատի մութ ամպերն ու խոր ակունները:

Թե երկրագործն է հորովել կանչում,
Թե մայրը որդուն օրորք է ասում,
Թե հովիվն իրան սրինգը հնչում,—
Մի հուսակտուր հառաչք եմ լսում:

Ահա ժողովրդի այս հազարավոր ցավերը հայրենի գեղեցիկ երկրի պատկերը դարձնում են նրան տխուր, քանաաստեղծի սիրտը լցնում հառաչանքով ու թախիծով: Իննսունական թվականներից գրված իր մի քանաստեղծության մեջ Թումանյանը ցավով քացականչում է.

Իմ հայրենիքը տխո՛ւր է, տխո՛ւր...
Ուր աչք եմ դարձնում՝ տխուր ավերակ,

Ամեն տեղ միայն, միայն ցավալուր
Հեծության ձայներ, երկչոտ աղաղակ...

Աշխարհից, մարդուց հույսերը կտրած՝
Գանգատվում է նա և ցավից տնքում...

Գյուղացու գանգատը, նրա հեծության ձայնը, հայրենի երկրի տխուր պատկերը քանաաստեղծի զգայուն հոգում անջնջելի հետքեր են թողնում, որոնք հետագայում իրենց արտահայտությունն են գտնում նրա գրվածքների, պոեմների մեջ, որոնցից մեկը հենց «Հառաչանք» անունն է կրում: Այստեղ լսում ենք ութսունամյա չարքաշ գյուղացու հառաչանքն ու հուսակտուր հեծեծանքը:

...Էս խոր ձորերում
Էս է չորս քսան տարիս լրացավ,
Ոչ մի խնդություն տեսա իմ օրում,
Ոչ էլ մի անգամ աչքս լիացավ:

Ամբողջ ամառը առանց տաքիլեթ*,
Պտիտ եմ գալի էս ձորի միջին,
Կոիվս եմ տալի հազար ցավի հետ
Ու չեմ կարենում, չեմ հասնում վերջին...

Գյուղացու տնտեսական, սոցիալական կյանքի պատկերը ներկայացնող այդ պոեմը սկսվում է տխուր նախերգան-

* Տաքիլեթ— տաք կերակուր:

քով, հեծության երգով: Ծեր այգեպանը ողջ գյուղացիության ծանր դրության արտահայտիչն է. նա չքավոր գյուղացիության տնտեսական և իրավական դրության ընդհանրության պատկերացումն է.

Տկլոր ու սոված էսպես տարին բուն
Քարի-հողի հետ կոիվ ենք տալի...
...Էսքան տանջվելով, քրտինք ենք անում,
Էլ էն սևերեսն, էլ էն սովածն ենք...

Բանաստեղծի մանուկ հասակի տխուր տպավորությունների և պատկերների արտահայտությունները տեսնում ենք նաև նրա առաջին պոեմի՝ «Մարոյի» մեջ, որը գրել է տասնութ տարեկան հասակում՝ 1887 թվին: Բանաստեղծի վրա խորն է ազդել գյուղական աղաթի ու տգիտության այդ զոհի՝ Մարոյի տխուր պատմությունը: Պոեմի սկզբում պոետը վշտով ու թախիծով է հիշում իր հերոսուհուն:

Մարո՛, անբա՛խտ, վաղամե՛ռ,
Դու մանկության իմ ընկեր,
Ո՛րքան ենք մենք խաղացել,
Իրար սիրել ու ծեծե՛լ...

Ահա՛ Նեսոն, բանաստեղծի մանկության շրջանի մի ուրիշ ընկերը: Նեսոն գյուղի ընդունակ երեխաներից է: Նա էլ հին գյուղի չքավորության և տգիտության զոհն է: Նեսոն դուրս է մնում դպրոցից, որովհետև հայրը չի կարողանում վճարել ուսման վարձը՝ տարեկան երեք ռուբլի: Եվ Նեսոն մնում է անուսում, բռնում գողության ճանապարհը:

Իր մանկական հիշողությունից քաղած «Իմ ընկեր Նեսոն» պատմվածքում Թումանյանն առանձին կարեկցությամբ է խոսում Նեսոյի դժբախտ կյանքի մասին, շեշտելով, որ նրա կյանքի վատ ճանապարհ բռնելը հետևանք էր նյութական անապահով դրության: «...Նեսոն աղքատ է... Նեսոն տգետ է... Նեսոն լցված է գյուղական չարքաշ կյանքի դառնություններով... նա էլ, եթե ուսում առներ, կրթվեր, ապահով լիներ՝ լավ մարդ կլիներ, գուցե ինձանից էլ շատ, ավելի լավը...»

Չքավորության մի ուրիշ զոհն էլ տասներկու տարեկան Գիքորն էր, որին հայրը՝ Համբոն, քաղաք է տանում՝ մի

գործի տա, մարդ դարձնի, իրեն նեցուկ ունենա, բայց քաղաքում անխնա շահագործվելով, ծեծվելով Գիքորը հիվանդանում է ու մեռնում...

Մարո, Նետո, Գիքոր՝ ահա Թումանյանի գրվածքների մանուկ օրերի դեմքերը. նրանք բոլորն էլ հեղինակի մանկության շրջանի տպավորությունների հետ են կապված: Բոլորն էլ հին, նահապետական գյուղի տգետ ու չքավոր գյուղի և նրա նախապաշարումների ու աղաթի զոհերն են:

Թումանյանի վրա խոր տպավորություն է թողել և հայ գեղջկուհին իր վշտոտ դեմքով, իր ծանր կենցաղով, իրավագուրկ վիճակով: Եվ նա իր լեգենդներում ու պոեմներում առանձին կարեկցությամբ է պատկերում հայ գեղջկուհուն: Իր երկերում նա պատկերում է նահապետական գյուղի աղաթի ու այդ զոհերի ողբերգական վիճակը՝ Անուշին, Մարոյին և մյուսներին, հայ գեղջկուհուն՝

Աշխարհքը բանտ
Մեջը անբախտ
Ես մի գերի անխնդում...

Նա մութ և հետամնաց գյուղում ապրում է փակված ու լուռ, զուրկ ու ճնշված պայմաններում.

Լոռության կապանքն իրեն շրթունքին,
Ու ինքը ամբողջ կեղտի մեջ կորած...

Գյուղում, գյուղացիների շրջանում ապրելով, Թումանյանը մոտիկից տեսնում է ու մասնակից լինում նահապետական գյուղի գեղջկական կյանքին, նրանց նիստ ու կացին, նրանց կենցաղին ու սովորույթներին:

Նա մասնակցում է գյուղի ժողովրդական տոներին, ուխտագնացություններին, բարեկենդանի օրերի խմբական պարերին ու խաղերին: Նա առանձնապես սիրում էր Վարդափառը և Համբարձման տոնը, այդ օրվա ծաղկաքաղը, հարսն ու աղջիկների վիճակ հանելը՝ ջանգյուլումը: Այդ տոները թանկ էին նրա համար որպես ծաղկի ու երգի օրեր, որպես ժողովրդական առողջ և կենսուրախ երգի ցուցադրման օրեր: Նա շատ էր սիրում գյուղի հարսանիքը՝ զուռնա-դիմուկ, ուրախ շուրջպարն ու կոխի տեսարանը, որը հետագայում պատկերում է իր երկերում, հատկապես «Անուշ» պոեմում:

ԳՍԵՂԻ ԳՊՐՈՅՈՒՄ

Գյուղում հայրական տանը Թումանյանը կանոնավոր կրթություն չի ստացել: Այդ ժամանակ գյուղում «ո՛չ ուսումնարան կար, ո՛չ դաս, ո՛չ դաստիարակություն»:

Նրա դպրոցը տունն էր, գյուղական միջավայրն ու լեռնային հարուստ բնությունը: Արա ուսուցիչներն էին՝ հայրը, մայրը, տատերը, գյուղի հեքիաթ պատմող ծերերը, ինքը՝ ժողովուրդը:

Թումանյանն իր նախնական գրաճանաչությունն ստանում է հոր մոտ: Հայրը թեև գյուղի գրագետներից և առաջավոր մարդկանցից էր, բայց քաղաքից կտրված լինելով, գիր-գրականություն քիչ ուներ, եղածն էլ ավելի կրոնական գրքեր էին, ինչպես սաղմոս, ժամագիրք և այլն: Հոր գրքերից առաջինը, որ կարդացել է ու սիրել, եղել է Խ. Աբովյանի «Վերք Հայաստանին» և Սարգիս եպ. Հասան-Չալայանի «Ճանապարհորդություն ի մեծն Հայաստան» աշխատությունը: Այդ գրքերի ընթերցանության տպավորության տակ նրա մեջ շատ վաղ հասակում զարգանում է հայրենասիրական զգացում՝ սեր դեպի հարազատ ժողովրդի պատմական անցյալը, որի մեջ խորանալուն նպաստում է պատմական հուշարձաններով ու արձանագրություններով հարուստ Լոռին:

Ութ տարեկան հասակից նա սկսում է գրել-կարդալ սովորել իր հորեղբայր Գրիշկա բիձու նորաբաց դպրոցում: Գրիշկա բիձան գյուղի տիրացուն էր. նա գյուղի երեխաներին հավաքում էր իրենց տան օդայում ու «դպրոց» բացում: Այդ դպրոցում մատիտներն արճիճից էին, թանաքը՝ կակաչ ծաղկից, որ իրենք աշակերտներն էին պատրաստում: Բացի գրել-կարդալուց, մանուկ Օհաննեսը Գրիշկա բիձու մոտ սովորել է նաև երգել: Աշակերտները, օգտվելով իրենց ուսուցչի թույլ և խեղճ բնավորությունից, հաճախ դասերին կատակներ ու չարաճճիություններ էին անում:

Գրիշկա բիձու դպրոցում Օհաննեսը մնում է միայն մի քանի ամիս: Նա այստեղ շատ քիչ բան է ստանում, քանի որ «ուսուցիչն» էլ հազիվ գրաճանաչ մի տիրացու էր:

Այնուհետև մանուկ Հովհաննեսին տալիս են Սահակ վարժապետի դպրոցը, ուր մնում է երկու տարի: Այդ դպրո-

ցը նույնպես առանձին բան չի տալիս նրան: Սահակ վարժապետի դայրոցի պատմությունը Թումանյանը հետևյալ ձևով է նկարագրում իր «Ինքնակենսագրության» մեջ:

«Մի օր մեր դռանը մայրս ճախարակ էր մանում, ես խաղում էի. մին էլ տեսանք, քոշերը հագին, երկար մազերով ու միրուքով, երկաթե գավազանը շրխկացնելով՝ մի օտարական անցավ:

— Հասի՛ր, էդ կլեկչուն կա՛նչիր, ամանները տանք կլեկի,— ասավ մայրս: Խաղա թողեցի, ընկա ուստի հետևից, կանչեցի: Դուրս եկավ, որ կլեկչի չէ, այլ մեր ազգական, փեսա՝ տիրացու Սհակն է: Սկսեցին գրույց անել: Տիրացուն խոսք բաց արավ իր գիտության մասին:

— Տիրա՛ցու ջան, բա ի՛նչ կլինի, մեր գեղումը մնաս երեխանցը կարդացնես,— խնդրեց մայրս:

— Որ դուք համաձայնեք, ինձ պահեք, ես էլ կմնամ, ի՛նչ պետք է ասեմ,— հայտնեց տիրացու Սհակը:

Գյուղումն էլ տրամադրություն կար, և մի քանի օրից հետո տիրացու Սհակը դարձավ Սհակ վարժապետ:

Մի օթախում հավաքվեցինք մի խումբ երեխաներ, տղա ու աղջիկ, շարվեցինք երկար ու բարձր նստարանների վրա, եղավ ուսումնարան, և այստեղից սկսեցի իմ ուսումը:

Մեր Սհակ վարժապետը մեզ կառավարում էր «գավազանավ երկաթյավ»: Իր երկաթե գավազանը, որ հրացանի շամփուրի էր նման, երբեմն ծոռում էր երեխաների մեջքին, ականջները «քոքահան» էր անում և մեծ կաղնենի քանոնով «ջան լակոտների» կաշին պլոկում: Ես չեմ կարողանում մոռանալ մանկավարժական այդ տեռորը:

Վարժապետի առաջ կանգնած երեխան սխալ էր անում թե չէ՝ սարսափից իրեն կորցնում էր, այլևս անկարելի է լինում նրանից բան հասկանալ, մեկը մյուսից հիմար բաներ էր դուրս տալիս: Այն ժամանակ կարմրատակում, սպառնալի՝ չուխի թևերը ետ ծալելով տեղից կանգնում էր վարժապետը ու բռնում... Քիթ ու պոունկն արյունոտ երեխան գալարվելով բառաչում էր վարժապետի ոտների տակ, զանազան սրտաճմլիկ աղաչանքներ անելով, իսկ մենք, սիրթնած, թուքներս ցամաքած, նայում էինք ցրտահար ծտերի նման շարված մեր բարձր ու երկար նստարանների

վրա: Զարդված երեխային վերցնում էին մեջտեղից: «Արի՛», — դուրս էր կանչում վարժապետը հետևյալին...

Մի երեխայի ուսումնարան դրկելիս հայրը խրատել էր, թե՛ «վարժապետը ինչ-որ կասի, դու էլ էն ասա»: Եկավ:

Վարժապետն ասում է՝ «Ասա՛ այք»:

Նա էլ կրկնում է՝ «Ասա՛ այք»:

— Տո՛, շա՛ն գավակ, ես քե՛զ եմ ասում՝ «Ասա՛ այք»:

— Տո՛, շա՛ն գավակ, ես քե՛զ եմ ասում՝ «Ասա՛ այք»:

Այս երեխայի բանը հենց սկզբի՛ց վատ գնաց և այն-բան ծեծ կերավ, որ մի քանի ժամանակից «ղաշաղ» ընկավ, տանիցն ու գեղիցը փախավ, հանդերումն էր մաճ գալի: Բայց մեր Սհակ վարժապետի չարությունից չէ՛ր դա: Այդ տեսակ անաստված ծեծ այն ժամանակ ընդունված էր և սովորական բան էր մեր գյուղական ուսումնարաններում: Գյուղացիներից էլ շատ քչերն էին բողոքում:

Այդ ծեծերից ես չկերա, որովհետև վարժապետը քաշվում էր հորիցս, բայց մանավանդ՝ մորիցս էր վախենում:

Զմոռանամ, որ Սհակ վարժապետին սիրում էին մեր գյուղում և մինչև օրս հիշում են»:


Ինչպես տեսնում եք, Տեր-Թողիկյան տիպի դպրոցներից էր Սհակ վարժապետի դպրոցը: Գործադրվում էին նույն «մանկավարժական մեթոդները»՝ ծեծ գավազանով, հայհոյանք, և դրա հետ միասին՝ մտավոր չնչին պաշար: Սհակ վարժապետը սովորեցնում էր գրել-կարդալ: Բոլոր դասագրքերը կրոնական բովանդակություն ունեին:

Թումանյանի դասընկերներից մեկը պատմում էր, թե ինչպես աշակերտները առավոտը վաղ վեր էին կենում, վառարանը վառում, օդեն մաքրում, տաքացնում և հերթով վարժապետի համար մածուն և հաց էին տանում, աղբյուրից ջուր բերում, ամեն մեկն իր տանից վարժապետի համար փայտ էր տանում, իսկ ամռանը գնում էին գյուղի հանդերը վարժապետի համար մոռ ու մոշ կամ փայտ հավաքելու: Այսպես էր պատմում Գաբո բիձեն և թվում էր մեկ-մեկ վարժապետի համար իրենց կատարած ծառայությունները և ավելացնում. «Դասերը պատրաստելու համար ժամանակ չէր մնում մեզ...»:


Ժամանակի պատմական դեպքերից Թումանյանի վրա մեծ տպավորություն է թողել 1877—78 թվականների ուս-



Դսեղի համայնապատկերը



Այն տունը, որտեղ ծնվել է Հովհ. Թումանյանը



Թումանյանի սիրած «ծովերը» Դսեղի մոտ



Հին Դսեղիներ

Հովհ. Թումանյանի գր-
յամ առաջին տոսնավո-
րը, որ հետագայում բա-
նաստեղծը գրի է առել
«Իշողությամ»:


Երգես հարսն,
 Արթին ջոզոն,
 Կարեկա հարսն
 Կու զի երգես,
 Քաջ կուց կուտի
 Կուց ամուսնի,
 Կի բէր կարեւոր,
 Կուսիցեւոր,
 Կը կիցեւոր
 զի կուցեւոր
 Կըստ արթուն
 Կուս Եւ արթուն
 1882-3.




Հին Թիֆլիսը




Խաչատուր Աբովյան



Շահնիգ
(Հովսեփ Ծիշմանյան)



Պետրոս Աղամյան



Աղախան Կարամանյան

տաճկական պատերազմը: Այդ դեպքի տպավորության տակ ինքն էլ սկսել է ոտանավորներ գրել:

Երբ Թումանյանը տասը տարեկան է դառնում, 1879 թվի օգոստոս ամսին հայրը նրան տանում է Էջմիածին, Գնորգյան ճեմարանը գիշերօթիկ տալու, բայց տեսնելով ֆարաջավոր աշակերտների դեղնած դեմքերը և մեկին էլ մեռած, իր տղային ետ է բերում գյուղ:

Այդ մասին Թումանյանն իր ինքնակենսագրության մեջ գրում է հետևյալը. «Մի անգամ, շատ փոքր, Էջմիածին եմ եղել, միտս է միայն հորաքույրս, մեր փեսա Վարդանը, նրանց տունը, նրանց դեղին կավե պարիսպն ու պարտեզը, սև բադրիջանի ու պոմիդորի թփերը և նրանց հոտը, կուռ-կուռները, Էջմիածնի տաճարի ներսը, փոշոտ ու արևոտ ճամփեն, փշատի ու նուան ծառերը»:

Էջմիածնից Դսեղ վերադառնալուց հետո, հայրը՝ լսելով Ջալալօղլու նորաբաց դպրոցի մասին, նույն թվականի աշնանը Հովհաննեսին նրա փոքր եղբոր հետ տանում է Ջալալօղլի (այժմ Ստեփանավան) և տալիս է Լոռում հայտնի Տիգրան վարժապետի երկսեռ մեծ և օրինակելի դպրոցը, ուր մնում է երեք տարի:

Թումանյանն իր կենսագրական նյութերի մեջ հետևյալ ձևով է հիշում գյուղից Ջալալօղլի գնալու նախընթաց գիշերը. «Ջալալօղլի տանելու նախընթաց գիշերը՝ գաթա, թխվածք, ամեն բան պատրաստ էր: Մորս քունը չի տանում: Աղ է աղում երկանքով, լաց է լինում ու խոսում մեզանից իրեն-իրեն՝ մեռակ: Ես էլ անքուն տեղիս մեջին լաց եմ լինում:

Ծամփին ձյուն ու քամի. հայրս երկուսիս՝ ինձ ու իմ եղբորը ձիու վրա դրած, իրեն փարաջեն էլ հանած մեզ վրա գցած, ինքը ոտով, ցեխի ու ձյան մեջ գալիս էր ձիու կողքով:

Նրա սպիտակ մեծ մորուքը ձյունախառն քամին ցրիվ էր տալիս, կրծքին խփում, ուսովը տանում:

Էդ գիշեր հասանք Քոլագերան, մի տաք օդա»:

Մյուս օրը առավոտյան Քոլագերանից ձիով ճանապարհվում են Ջալալօղլի:

ՋԱՂԱՍՈՂԼԻՈՒՄ

Ջաղալօղլին այն ժամանակ Լոռու վարչական-կուլտուրական կենտրոնն էր: Այդտեղ էին գտնվում շրջանի վարչական բոլոր հաստատությունները և զորքը: Ջաղալօղլին միաժամանակ համարվում էր զինվորական գյուղաքաղաք: Գտնվելով Թիֆլիս-Ալեքսանդրոպոլ տանող ինժուրու վրա՝ այն նաև առևտրական կենտրոն էր: Բնակչության մեծ մասը հայեր էին, որոնք պարսպում էին գլխավորապես առևտրով և արհեստներով, իսկ ոռոսները՝ գյուղատնտեսությամբ:

Իր կենցաղով, կյանքով և նիստուկացով Ջաղալօղլին տարբերվում էր Լոռու մյուս գյուղերից, իսկ երբ 80-ական թվականներին, շնորհիվ Տիգրան Տեր-Դավթյանի ջանքերի, բացվում է երկսեռ երկդասյան դպրոց, ավելի է բարձրանում Ջաղալօղլու կուլտուրական նշանակությունը: Այդ դպրոցում առանց խտրության սկսում են սովորել հայ, ոռոս, ինչպես նաև հույն մանուկներ:

Դպրոցի տեսուչը ինքը Տեր-Դավթյանն էր՝ ժամանակի կրթված և զարգացած դեմքերից մեկը: Նա Սարգիս եպ. Հասան-Ջաղալյանի սանն էր: 1866 թվին ավարտել էր Թեոդոսիայի վարժարանը: Նա Սուրեն Սպանդարյանի հոր՝ Սպանդար Սպանդարյանի դասընկերն էր:

Տիգրան Տեր-Դավթյանը բացի մայրենի լեզվից, լավ գիտեր ոռոսերեն, ֆրանսերեն, տաճկերեն և ֆարսերեն: 1868 թվին Սարգիս եպ. Հասան-Ջաղալյանի հետ, որպես նրա քարտուղարը, ճանապարհորդում է Կ. Պոլիս, ապա Եգիպտոս, Աթենք: Այդ ճամփորդությունը տևում է մոտ ութ ամիս: Կ. Պոլսում կատարելագործել էր ֆրանսերենը:

Արտասահմանից վերադառնալով Ջաղալօղլի, Տիգրան Տեր-Դավթյանը դպրոց է հիմնադրում: Դպրոցն ուներ կանոնավոր ուսուցչական կազմ: Ավանդվում էին հետևյալ առարկաները՝ հայոց լեզու և պատմություն, ոռոսաց լեզու, աշխարհագրություն, թվաբանություն, երգեցողություն, ֆրանսերեն, ֆիզիկա և ընդհանուր պատմություն:

Դպրոցի տեսուչը, աշխարհագրության և պատմության դասատուն ինքը՝ Տեր-Դավթյանն էր: Նա դպրոցին կից

ուներ հարուստ գրադարան, որից օգտվում էին դպրոցի աշակերտները:

Դպրոցում աշակերտները հատուկ տարազ ունեին. ձմեռը տղաները հագնում էին մոխրագույն, աղջիկները՝ շագանակագույն հագուստ, սև գոգնոցով, իսկ ամառը բոլոր աշակերտները սպիտակ զգեստ էին հագնում: Ահա այդ դպրոցն է ընդունվում տասը տարեկան Հովհաննեսը: Իր պատմվածքներից մեկում՝ «Իմ ընկեր Նեսոյում», Թումանյանը հետևյալ կերպ է նկարագրում իր դպրոց գնալը. «Մի երկու տարի մեր գյուղի ուսումնարանը կարդալուց ետը, հերս ինձ տարավ մեր կողմերի գյուղաքաղաքը, Էնտեղի ուսումնարանը տվավ: Էս արդեն բոլորովին ուրիշ աշխարհք էր: Տները սպիտակ, կարմիր տանիքով, ժողովուրդը զուգված ու մաքուր, ուսումնարանն էլ մեծ ու գեղեցիկ, ու ոչ թե մի վարժապետ, ինչպես մեր գյուղումն էր, այլ մի քանի վարժապետ ու մինչև անգամ վարժուհիներ, որ նորություն էր ինձ համար ու զարմանալի, սակայն շատ դուրեկան:

Տեղին ու դպրոցին վաչել իմ հագուստն էլ փոխեցին: Քաղաքացի աշակերտի շորեր հագա, գեղեցիկ ու մաքուր»:

Թումանյանի դասընկերուհիներից մեկը՝ Տիգրան Տեր-Դավթյանի մեծ աղջիկը՝ Վերգինե Պապաջանյանը, հետևյալն էր պատմում Թումանյանի՝ Ջալալօղլու դպրոցն ընդունվելու մասին. «Տեր-Թադևոսը հորս լավ բարեկամներից էր. միշտ մեր տանն էր իջնում, և շատ էինք սիրում նրան: Երբ դպրոցը բացվեց, հայրս խորհուրդ տվեց Տեր-Թադևոսին, որ իր տղային բերի տա նոր դպրոցը: Տեր-Թադևոսը գնաց Դսեղ, մի քանի օրից հետո իրեն տղին բեռով-բարձով բերեց Ջալալօղլի: Առաջին երկու-երեք ամիսը Հովհաննեսը մեր տանն էր ապրում, ինչպես ասում են՝ դարիբության գոտիկը մեր տանը բաց արեց»:

Տեր-Դավթյանի տանը Թումանյանն իրեն լավ էր զգում՝ օգտվում էր տեսչի հարուստ գրադարանից, ապրում էր Տեր-Դավթյանի երեխաների շրջանում, որոնք ունեին հատուկ ժամեր՝ ընթերցանության, խաղերի, զրույցի, երգի և այլն:

Այնուհետև հայրը տղային տալիս է մի կոշկակարի՝ Խուրշուդ Գրիգորյանի տանը բնակվելու: Թումանյանն այն-

տեղ մնում է շատ կարճ ժամանակ, որովհետև ընտանիքը բազմանդամ էր, և երեխաները խանգարում էին դասերը պատրաստելուն:

Այդտեղից փոխադրվում է իր հորաքրոջ՝ Թալալ հոքրի՝ Սաղաթելյանների տունը, որ գտնվում էր Ջորագետի ափին, մի շատ գեղատեսիլ տեղ, բարձր ժայռի գլխին:

Հորաքույրը, Թումանյանի դասընկերների պատմելով, շատ բարի, սիրալիք ու հյուրասեր կին էր: Առանձին գուրգուրանք ուներ մանուկների նկատմամբ. նրանց սեր ու մածուն էր տալիս, հեքիաթներ էր պատմում՝ կախարդական աշխարհից, օձերից ու նրանց թագավորներից: Խոսում էր սատանաների մասին, թե ինչպես սրանք զուռնադիտով խաբում են մարդկանց և տանում հարսանիք: Այդ բոլորը ուժեղ տպավորություն էին անում մանուկ Հովհաննեսի վրա, և նա իր վառ երևակայությամբ լրացնում էր Թալալ նանի հեքիաթները: Հորաքրոջ մոտ կարճ ժամանակ ապրելով՝ Թումանյանը շուտով փոխադրվում է Ասատուր Խանադյանի տունը, որ գտնվում էր ձորի գլխին և որտեղից գեղեցիկ տեսարան էր բացվում դեպի Լոռու դաշտերն ու լսվում էր գետի վշշոցը: Այդ բնակարանից նա գոհ էր, և այդտեղ է, որ 1881 թ. գրում է իր առաջին մանկական ոտանավորները: Այստեղ նա իրեն լավ է զգացել. գոհ էր իր տանտիրուհուց՝ բարի և հյուրասեր Սալոմեից. այստեղ էլ մնում է մինչև Ջալալօղլուց հեռանալը:

Թումանյանը դպրոցի ընդունակ աշակերտներից էր: Նա առանձնապես սիրում էր Տեր-Դավթյանի պատմության դասերը և հափշտակությամբ էր լսում նրա պատմածները Եգիպտոսի, եգիպտական բուրգերի, Նեղոս գետի և դամբարանների մասին: Այդ բոլորը բանաստեղծի վառ երևակայության վրա խոր տպավորություն են թողնում: Փոքրիկ Հովհաննեսն այնքան է ոգևորվում, որ որոշում է գնալ Եգիպտոս՝ իր հետ տանելով նաև դասընկերներին: Այդ ցանկությունը երկար ժամանակ մնաց Հովհաննեսի մեջ:

Թումանյանը թե՛ արտաքին տեսքով, թե՛ բնավորությամբ տարբերվում էր իր ընկերներից: Սրախոս էր, ինքնավստահ, սիրում էր բնությունը, երազանքը...

Իր մանկության ընկերներից մեկը՝ Անուշավան Աբովյանն, առաջին անգամ տեսնելով Թումանյանին դպրոցում,

հեռվից հիանում է նրանով: Իր հուշերում նա գրում է. «Նա իր տարիքից անհամեմատ բարձր ու վայելուչ հասակ ուներ, մշտաժպիտ նշաձև աչքեր, արծվաքիթ և ազնվություն արտահայտող սպիտակ ճակատի վրա թուխ գանգուր խոպոպիկներ: Մի խոսքով՝ մի արտակարգ հմայիչ գեղեցկություն, որ միանգամայն ապշեցրեց ինձ»*:

Նման նկարագիր է տալիս նրան բանաստեղծի դասընկերուհիներից՝ Վարսենիկ Գևորգյանը. «Չնայած իր տարիքին (տասնմեկ տարեկան) Հովհաննեսը բավական բարձրահասակ էր, գունատ դեմքով, սևաթույր մազերով:

Իր առանձնահատուկ և աչքի ընկնող բնավորությամբ միանգամայն տարբերվում էր իր ընկերներից: Նա սրախոս էր, ինքնավստահ, բայց ոչ հանդուգն, կենսունակ էր ու չար, բայց ոչ անկարգ: Նա ոչ շատ մոտենում էր իր ընկերներին, ոչ էլ վիրավորում որևէ մեկին: Սիրում էր բնությունը, գորտերի կոռոցը, սիրում էր ոտանավորներ գրել, բայց շատ ինքնամիտի էր»:

Երկրորդ դասարանից, 1880—81 թվականներից Թումանյանը սկսում է գրել ինքնուրույն ոտանավորներ: Դասընկերները պատմում են, թե ինչպես նա դասամիջոցին դասարանից դուրս գալով, առանձնանում էր դպրոցի պարտեզի խորքում, նստում էր ծառի տակ և սկսում էր գրել:

Թումանյանը 1881 թվի մարտին գրած իր առաջին սիրային ոտանավորը նվիրում է դասընկերուհիներից մեկին, նրա նկատողության առթիվ, թե իրենով չտարվի՝ այլ իր դասերը սովորի: Ահա այդ ոտանավորը.

Հոգու հատոր,
Սրտիս կտոր,
Դա՞նիս համար
Դու մի՛ հոգար,
Թե՛ կան դասեր,
Կա նաև սեր,

Եվ ի՛նչ զարմանք,
Իմ աղավաղակ,
Որ կենդանի
Մի պատանի
Սերը սրտում
Դաս է սերտում:

1881 թ. մարտ, Ջալալօղլի

Դպրոցի բակը հարուստ է եղել լորենու սաղարթախիտ ծառերով, որոնք առանձին գեղեցկություն են տվել դպրոցի

* Ա. Աբովյան. «Հիշողություններ Թումանյանի կյանքից», «Պատկոն», 1923 թ., էջ 8:

քակին: Ահա այդ լորու ծառերի տակ է, որ գարնանը, Թումանյանը դասամիջոցին գրել է այդ ոտանավորը, այդ ծառերի տակ է, որ նա առանձնացած մտորել է ու երագել...

Ջալալօղլու դպրոցում Թումանյանը գրում է և մի քանի այլ ոտանավորներ, որոնցից մեկը նվիրում է մի հույն քարհատի՝ Սավա վարպետին, որը լավ հեքիաթ պատմող էր: Այդ վարպետը աշխատում էր Ջալալօղլուց դեպի Քոլագերան կայարանը տանող խճուղու վրա և աշխատանքի ժամանակ զոհ է դառնում պայթած ժայռերին:

Ջալալօղլու դպրոցի երկրորդ դասարանում Հովհաննեսը աչքի է ընկնում քանաստեղծական ընդունակություններով: Այդ տարիներին է, որ նա իր դասընկերներին առանձին ոգևորությամբ նկարագրում է մանկության տարիներին Դսեղի շրջակայքում տեսած սարերն ու ձորերը, սրընթաց գետերն ու գարնան հեղեղները, սարվորների, գյուղացիների չարքաշ կյանքը, այն ամենը, ինչ հետագայում, իննսուներկան թվականներին այնպես անսպառ հորդում է նրա պոեմներում և քանաստեղծություններում:

Այդ շրջանումն է, որ քացի սիրային քանաստեղծություններից, նա գրում է և՛ հայրենասիրական, և՛ երգիծական քանաստեղծություններ: Ուշագրավ են և սրտառուչ հայրենասիրական քանաստեղծությունները. օրինակ՝ «Օրորքը» (1882 թ.), «Երբ որ կանցնի ձմեռն սաստիկ» (1883 թ.) և այլն:

«Օրորքի» տասը քառատողից պատկերավոր է յոթերորդ տունը, որից երևում է, որ քանաստեղծը լավատեղյակ էր իր հայրենիքի ծանր վիճակին և համակված էր հայրենասիրական խոր սիրով ու վշտով.

Մի պատկեր է նա տխուր,
Աչքերն արցունք, ինքը լուռ:
Մի սուր է մեր սրտի մեջ,
Մեզ այրելու հուր անշեջ*...

Տասներեք տարեկան պատանին մոր բերանով օրոր է ասում իր քալիկին, որ քնի և իր ազգի ծանր վիճակը չտեսնի.

* «Երկերի ժողովածու», 1-ին հատոր, էջ 429:

Քնե՛, քնե՛, իմ որդի,
Աչքերդ խուփ, չբանաս,
Որ քո թշվառ հայ ազգի
Դսուն ցավերը չտեսնաս...

Այս դպրոցումն է գրել իր առաջին երգիծական քանաստեղծությունը՝ «Հայ վաճառականը» (1883 թ.)։ որի մեջ ծաղրում է տեղացի ճարպիկ առևտրականներին, որոնք հազար ու մի ձևով և խորամանկություններով խաբում էին խեղճ գյուղացիներին ու ոռես գինվորներին։

Հայ վաճառական, հայ վաճառական,
Խաբի՛ր ու զրկի՛ր աղքատ եղբորդ,
Հարամ ոռճիկով լից քո գանձարան
Ու միշտ կուշտ պահիր ուռած մեծ փորդ։

Քեզ ի՞նչ փույթ, ասա՛, թե ազգդ խեղճ է,
Ծատ հարկավոր է, թե նա չունի հաց,
Քեզ ինչ փույթ, թե եղբայրո մեղք է,
Միայն քո փորը ի՞նչ տկճած..

.

Մահից չի փրկի քեզ ժանգոտ փողը,
Մարմինդ կկլանե անգութ սև հողը,
Ամեն բան կանցնի և կանհետանա,
Միայն բարի անունն այստեղ կմնա...

Զալալօղլու դպրոցում նա լավ սովորող աշակերտներից էր, շատ էր կարդում, աշակերտներին երգեր էր սովորեցնում՝ «Մանի՛ր, մանի՛ր, իմ ճախարակ...» (Ազատն աստված այն օրից», «Մանկության օրեր, երազի նման...» և հեքիաթներ պատմում։

«Պատանի Հովհաննեսը, երբ դասարանից դուրս էր գալիս, առանձնանում էր դպրոցի բակի լորիների տակ ու սկսում էր գրել։ մենք էլ հաճախ խանգարում էինք նրան։ Նա դեռ մանկուց զգացել է իր բանաստեղծական ձիրքը, միշտ ասում էր՝ ես պետք է պոետ դառնամ, որովհետև սիրում եմ ոտանավորներ գրել։

Աշակերտ ժամանակ նա մի ոտանավոր էր գրել։ Չորս տող է մնացել հիշողությանս մեջ», — գրում է դասընկերը և մեջ բերում այդ քառատողը.

Սև գոմեշներ, կարմիր եզներ,
Ջահել տղերք, փոքրիկներ,
Մաճդ բռնած ծերունի,
Ի՞նչ ես կույում սև հողի հետ...

Մի ուրիշ ոտանավորի մեջ Թումանյանն արտահայտել է բնության սերը, երգելով Ջորագետը և նրա ձորը: Այդ ոտանավորը մեզ չի հասել:

Դպրոցում, դասերից դուրս, մի խումբ աշակերտներ երեկոները հավաքվում էին տեսչի տանը և նրա երեխաների հետ միասին պարապում էին ընթերցանությամբ: Կարդում էին «Հյուսիսափայլ», «Կոունկ», «Փորձ» և այլ ամսագրերում զանազան թարգմանություններ ու փոքրիկ պատմվածքներ: Նրա դասընկերուհիներից մեկը՝ Վարսենիկ Գևորգյանը, որը տեսչի փոքր աղջիկն էր, հիշում էր և մի առ մի թվում այն ժամանակ կարդացած գրքերը՝ «Երեք հրացանակիրներ», «Չեստերտոնի ժառանգը», «Խավարից դեպի լույս», «Պող և Վերգիներ», «Քրիստափոր Կոլումբոսի ճանապարհորդությունը», Ղ. Աղայանի «Երկու քույրը», Բիչեր Սթոուի՝ «Քեռի Թոմասի տնակը», «Թզուկը» և այլն:

Իր ընկերների ասելով՝ աշակերտական խմբի համար չափածո երկերը կարդում էր Թումանյանը: Դեռևս այն ժամանակ նա սիրում էր կարդալ ոտանավորներ, մանավանդ դրամաներ: Նրա սիրած գրքերից էր՝ «Քնար հայկականը», որտեղից նա մեծ սիրով կարդում էր Սալյաթ-Նովայի տաղերը, երգիծական և ժողովրդական երգեր:

Այնուհետև սիրում էր կարդալ Միքայել Նալբանդյանի ոտանավորները, նրա կենսագրությունը. նրա երգերից սիրում էր.

Մանկության օրեր, երազի նման
Անցաք, գնացիք, էլ չեք դառնալու...

Սիրում էր Գևորգ Բարխուդարյանի թարգմանած Ծիլերի գործերը, որոնցից հավանում էր հատկապես «Ավազակները» և «Օուլեանի կույսը»: «Հյուսիսափայլից» կարդում էին «Դքսուհի դը Շերեոզ», «Ֆերիզադեի երգը», «Անգլիական լրտեսուհու հիշատակարանը»:

Ընթերցանության ժամերին երբեմն մասնակից էր յի-

նում և ինքը՝ տեսուչ Տեր-Դավթյանը: Նրա սիրած գիրքն էր Վիկտոր Հյուգոյի «Թշվառները»: Նա ուներ այդ գրքի ֆրանսերեն պատկերազարդ շքեղ հրատարակությունը. կարդում էր հատվածաբար և թարգմանում աշակերտների համար: Այդ գրքի ընթերցումը տևել է երկու-երեք ամիս: Կարդում էր՝ Հոֆմանի «Հավատարմությունը ամեն արգելքի հաղթում է» գիրքը և «Խավարից դեպի լույսը»:

Բացի ընթերցանությունից, աշակերտները շատ էին սիրում հեքիաթներ լսել: Նրանք ազատ ժամերին հավաքվում էին դպրոցի պահակի մոտ, որին քեռի Ակոփ էին ասում, ու լսում էին նրա պատմած հեքիաթները: Քեռի Ակոփը պատմում էր «Գյուլի բաղի», «Արաբի Չանգուի», «Դուրի դուշի» և ուրիշ հեքիաթներ: Բայց ավելի հետաքրքիր էր պատմում դպրոցի վառարաններ նորոգող՝ գյառգյառեցի ուստա Սիմոնը: Ուստա Սիմոնը շատ գրավիչ և հետաքրքիր պատմում էր «Հազար ու մեկ գիշերվա» հեքիաթներից, որ փոքրիկ ունկնդիրները մեծ սիրով և ուշադրությամբ լսում էին: Ասում են՝ Թումանյանը շարունակ ուստա Սիմոնի հետ էր լինում և սիրում էր նրան:

Թումանյանը Չալալօղլիումն է առաջին անգամ լսել «Քաջ Նազար» հեքիաթը, բայց ոչ ուստա Սիմոնից, այլ մի պոլսեցի բուժակից, որը այդ ձմեռ կարճ ժամանակով հայտնվում է Լոռում և հյուր է մնում դպրոցի տեսչի տանը: Չմոռն երկար գիշերներից իր շուրջը հավաքած դպրոցի երեխաներին՝ այդ պոլսեցի բուժակը Աշուղ Ղարիբի խաղերն է ասում, հեքիաթներ ու ծիծաղաշարժ դեպքեր պատմում Քաջ Նազարի արկածներից:

Բացի հեքիաթներից, երեխաները հավաքվում էին, երգեր սովորում ու խմբով երգում: Խումբը ղեկավարում էր Թումանյանը: Երգում էին՝ «Մեր ձագուկը փոսում նստած քնում է», «Տուրտը փչեց», «Է՛ր հեռանա», հատկապես սիրում էին երգել.

Երբոր բացվին դռներն հուտ,
Եվ մեր երկրեն փախ տա ձմեռ...

Այնուհետև խմբով գնում էին շրջակա ձորերը խաղալու և վազվզելու: Դպրոցական խաղերից տղաները սիրում էին արտուրման, լախտին, վեզը:

Գեղեցիկ է Ջալալօղլու հորհգոնը և հարուստ նրա բնությունը: Մի կողմից՝ Դվալի կամ Բզովդալի լեռնաշղթան է, մյուս կողմից՝ Լավարը, իսկ երրորդ կողմից՝ Ղարախաչի Մթին սարի գեղեցիկ լեռնագոտին՝ ամպոտ գագաթներով: Ամառը չքնաղ է Վարանցովկայի, այժմ Կալինինոյի դաշտավայրը՝ թավշանման կանաչ խոտ, բազմերանգ, բուրումնալի ծաղիկներ, լեռնային թարմ ու կենարար օդ: Ծրջակայքում կան գեղեցիկ զբոսավայրեր, ինչպես՝ Գոմերի ձորը, Օռան Լոռին, Արջասարը, Ջալալօղլու ձորը, Լոռու բերդը, Տեր Ուհանանց գոմերի ձորը և այլն: Աշակերտները խմբով գնում էին այդ ձորերը զբոսնելու, գետնում լողանալու, ձուկ էին բռնում, թրթեջուկ քաղում, լվածաղիկ հավաքում բերում գյուղ:

Բնության սերը, որ զարթնել էր Թումանյանի մեջ Դսեղում, դեռևս մանկուց, այստեղ ավելի է խորանում: Նա հաճախ է հիշում իրենց գյուղն ու սարերը, պատմում իրենց սարի կյանքից ու որսից, սարի եղևիկներից, խիտ ու մթին անտառներից:

Արձակուրդներին Թումանյանը միշտ Ջալալօղլուց գնում էր գյուղը՝ Դսեղ: Գնում էր ոտքով՝ գիշերը մնում էր Կուրթան գյուղում, առավոտը ճանապարհը շարունակում էր դեպի գյուղ: Ամեն արձակուրդի տուն գնալիս՝ իր գրքերն էլ հետն էր տանում, դնելով հաբգայի (բրդից գործած փոքրիկ խուրջին) մեջ:

Ջալալօղլու դպրոցը Թումանյանը չի ավարտում: 1883 թվին դպրոցը փակվում է: Թումանյանը վերադառնում է իրենց գյուղը և միառժամանակ մնում այդտեղ:

Իր դասընկերներից մեկն այսպես է հիշում Հովհաննեսի Ջալալօղլուց հեռանալը. մի անձրևային օր հոր հետ գնացին Դսեղ: Մենք էլ, մի խումբ ընկերներ, ճանապարհ դրինք մինչև քարի գլուխը և կամրջի մոտ բաժանվելիս խմբով երգեցինք. «Է՞ր հեռանաս քո մայրենի աշխարհից...»: Ինքը գնում էր և ասում.

— Ես ձեզ կտանեմ Եգիպտոս...

ԴՊՐՈՑԱԿԱՆ ՏԱՐԻՆԵՐԸ ԹԻՖԼԻՍՈՒՄ

(1883—1886)

Հովհ. Թումանյանի հայրը՝ Տեր-Թադևոսը, տասնչորս տարեկան իր տղային՝ պատանի Հովհաննեսին, 1883 թվի օգոստոսին Դսեղից տանում է Թիֆլիս՝ Ներսիսյան դպրոցը տալու:

Այն ժամանակ Լոռուց Թիֆլիս էին գնում ձիով, ֆուրգոնով կամ ոտքով: Ծանապարհորդությունը օրեր էր տեւում...

Նրանք գնում էին ձիով: Տան փոքրիկ երեխաները՝ Հովհաննեսի քույրերն ու եղբայրները, թռչկոտելով ու խաղալով գնում են մինչև Զաղի ձորը, ճանապարհ դնում ու վերադառնում գյուղ: Մայրն իր տղային վերջին հրաժեշտը տալուց հետո, արցունքն աչքերին գնում է հերանց տուն, լաց լինում, մղկտում, թե՛ «Տղիս տարա՛ն...»

Պատանի Հովհաննեսի առաջին ճանապարհորդությունը մեծ տպավորություն է թողել նրա վրա. նա հետագայում հաճախ էր հիշում դրա մանրամասնությունները:

Թումանյանն իր այդ ուղևորության ընդհանուր նկարագիրը տվել է «Գիքորում»․ «Մի խաղաղ առավոտ էր. մի տխուր առավոտ: Տանեցիք և հարևանները եկան մինչև գյուղի ծերը, Գիքորի թշերը պաշեցին ու ճամփա դրին...»

Հայր ու որդի Թումանյանները գնում էին Լոռու խիտ ու մթին անտառների միջով, խոր ձորերով, սառն ու վճիտ աղբյուրների մոտով: Գիշերում էին ճանապարհի վրա գրտնըվող գյուղերում և ապա առավոտը նորից շարունակում ճանապարհը, Լոռու բարձունքներից՝ Լալվարի փեշերից իջնում Բորչալվի դաշտը և երրորդ օրը միայն հասնում Թիֆլիս:

Այդպես էր Լոռուց Թիֆլիս տանող ճանապարհը մինչև երկաթուղի անցկացնելը՝ 1898 թվականը:

Դասընկերների պատմելով, Դսեղից Թիֆլիս տանող ճանապարհը անջնջելի տպավորություն է թողել պատանի բանաստեղծի վրա: Նա ամեն անգամ մեծ հաճույք է ստացել, երբ իր հայրենակից ընկերների հետ, կտրելով այդ ճանապարհը, դպրոցական արձակուրդներից ձիով վերադառնում էր Թիֆլիսից Դսեղ:

Հետագայում էլ նա առանձին կարոտով էր հիշում Լոռու խիտ անտառներն ու գեղեցիկ լեռները:

«Ձորի գլխից երբ ցած էիր նայում, սիրտդ փառավորում էր: Այգիներ, ընկուզենիներ... Ի՛նչ ընկուզենիներ կային... ձորը լիքն էր որսով. եղնիկները մտնում էին այգիները՝ արածում: Մի խոսքով կուսական որ ասում են՝ իսկը կուսական բնություն...»

Բնությունն ինձ համար ամեն ինչ է: Գուցե մանկության տպավորություններից է, բայց ես ինձ թեթև եմ զգում բնության մեջ, մանավանդ մեր սարերում...»

Այսպիսով, 1883 թ. հեռանալով իր ծննդավայրից, Թումանյանն իր ետևն է թողնում Լոռու շքեղ բնությունը, բնության հետ՝ իր անհոգ մանկությունը, ազատ և ուրախ օրերը, իր հարազատներին և նրանց ջերմ ու սիրառատ միջավայրը:

Տասնչորս տարեկան պատանին ընկնում է նոր ու անծանոթ շրջապատ:

Գյուղում, հայրենի կտուրի տակ անցկացրած անհոգ օրերի տպավորությունները նրան հանգիստ չեն տալիս Թիֆլիսում, նա հիշում է գյուղը, բնությունը, իր ազատ օրերը՝ տխրում է, կարոտում...

* * *

Թիֆլիսում Թումանյանը սկզբում ապրում է Հավլաբար թաղամասում, Քոռ գետի ափին, իր ազգականներից մեկի տանը: Այդ մասին Թումանյանը իր ուշ շրջանի հոդվածներից մեկում գրել է.

«1883 թվականն էր: Ինձ մեր գյուղից Թիֆլիս էին քերել Ներսիսյան դպրոցը տալու:

Պետք է ասրեի մորս կողմից իմ ազգական Բաղդասար քեռու կամ ինչպես մենք էինք ասում՝ Բաղդի քեռու տանը:

Էդ տունը Բաղդի քեռու քեռակալի տունն էր, Հավլաբար, Ձորաբաշի եկեղեցուց ոչ հեռու...»

Այդ տանը Թումանյանը ապրել է երկու-երեք ամիս: Քաղաքը մեծ տպավորություն է թողնում Թումանյանի վրա:

«1883 թվին, երբ ես առաջին անգամ Թիֆլիս եկա ուսումնարան մտնելու, ինձ թվաց, թե ընկա մի հսկայական հարսաճախտուն: Ջուռնա, դիոլ, դայիրա, նաղարա,

ծափ-ծիծաղ, պար, երգ, էն էլ ո՛չ թե տներում, այլ դուրսը, դռներից, կտուրներից: Մանավանդ իրիկնապահներից: Կիրակի ու տոն օրերին հո գլուխ էր պետք, որ դիմանա: Զուգված, զարդարված, շրխկում ու զրնգում էր ամբողջ քաղաքը:

Տեսնողը զարմանում էր, թե՛ էս մարդիքը ե՛րբ են աշխատում, որ էսպես շարունակ ուրախանում են ու պար գալիս»*:

«Գիքորի» հետևյալ տողերը նույնպես Թումանյանի առաջին տպավորությունների արտահայտությունն են. «Մրգով լիքը խանութները, դեզերի նման դարսած գույնը-գույն չթերը, տեսակ-տեսակ խաղալիքները, ուսումնարան գնացող կամ դարձող երեխաների խմբերը, իրար ետևից սլացող կառքերը, ուղտերի շարքերը, կանաչի բարձած ավանակները, թաբախները գլխներից կինտոները... էս ամենի գոռոցն ու զնգոցը, աղմուկն ու աղաղակը իրար խառնված դժվժում էր նրա գլխում»:

Գյուղի ազատ և անհոգ կյանքից հետո ընկնելով Թիֆլիս, պատանի Հովհաննեսը դժվար է տանում քաղաքի կյանքը, այդ անհարազատ միջավայրը, մանավանդ, որ նյութապես էլ նրա դրությունը լավ չէր: Քաղաքը նա անվանում է՝ «անիրավ աշխարհք»:

* * *

Տեր-Թադևոսն սկզբում իր որդուն տալիս է կադետական կորպուս**։ Հայրը շատ էր ուզում, որ իր տղան զինվորական դառնա, որովհետև պապը հայտնի զինվորական էր եղել, բայց պատանի Հովհաննեսը՝ չկարողանալով տանել գիշերօթիկի փակ ու ծանր կյանքը, շատ ժամանակ չանցած թողնում է զինվորական դպրոցը:

Տեսնելով, որ պատանի Հովհաննեսը չի դիմանում գիշերօթիկ զինվորական դպրոցի խիստ կարգ ու կանոնին, հայրը նրան ընդունել է տալիս Ներսիսյան դպրոցի երկրորդ դասարանը, որտեղ նա պիտի լրիվ միջնակարգ կրթություն ստանար:

* «Երկու մեծ թիֆլիսեցիներ», 1913 թ. մարտի 14, «Թումանյանը քննադատ», էջ 240:

** Միջնակարգ զինվորական դպրոց ցարական Ռուսաստանում:

Ներսիսյան դպրոցում ուսանում էին գիշերօթիկ (որդե-գիր) և երթևեկ աշակերտներ: Գիշերօթիկները, գլխավորապես, գավառացի տղաներն էին լինում, իսկ երթևեկները՝ տեղացիներ, բնիկ թիֆլիսեցիներ, որոնց մեծ մասը քիչ թե շատ ունևոր դասի գավակներ էին: Գիշերօթիկները, չնչին բացառությամբ, թոշակառուներ էին: Թոշակառու գիշերօթիկ աշակերտ ընդունվելու համար անհրաժեշտ էին ազդեցիկ կապեր վարչության կամ հոգաբարձության շրջանում: Գյուղական քահանա Տեր-Թադևոսը նման կապեր կամ ազդեցություն չունեի, ուստի Հովհաննեսը ընդունվում է իբրև երթևեկ աշակերտ: Այդ նշանակում է, որ նա դպրոցից դուրս, քաղաքում մի անկյուն պիտի ունենար ապրելու համար և իր ծախքերն ինքը պիտի հոգար: Տեր-Թադևոսի նյութական դրությունն այդ ժամանակ լավ չի եղել, և նա հնարավորություն չի ունեցել քաղաքում սովորող իր որդու համար քիչ թե շատ տանելի պայմաններ ստեղծել:

Բանաստեղծի՝ Դսեղի դպրոցի դասընկերներից մեկը՝ Գնթո քիճեն, որը իր ազգականն էր, Թումանյանի հոր դրության մասին հետևյալն էր ասում. «Տեր-Թադևոսը առաջ լավ չէր ապրում: Երբ Օհաննեսը թիֆլիս աշակերտ էր, տղին քան չէր կարողանում ուղարկել, որ ապրեր ու սովորեր»:

Ապրելով նեղ պայմաններում, ինքնասեր պատանին մոտիկներից և ընկերներից ծածկել է իր դրությունը: Կյանքի այդ դժվարին ճանապարհին նա չի ընկճվել, այլ ընդհակառակը, իր կարիքավոր և հուսալքված ընկերներին օգնել է, հուսադրել, նեցուկ եղել նրանց:

1883 թ. դեկտեմբերից Թումանյանը փոխադրվում է ուզունլարցի ժամկոչ Ավագ Շեկվարդանյանի տունը, որ գտնվում էր նախկին Վորոնցովի կամուրջի մոտերը, Միքայելյան փողոցի վրա (այժմ Պլեխանովի պողոտա): Ներքնահարկում նեղլիկ ու խոր ընկած մի սենյակ էր դա, ավելի շուտ՝ ցուղ: Ժամկոչ Ավագը չքավոր, բարի ծերունի էր, ծանրաբեռնված մեծ ընտանիքով, բոլորը միասին ապրում էին այդ սենյակում:

Ժամկոչ Ավագի տանը Թումանյանը բանաստեղծություններ է գրել: Դրանից միամիտ ժամկոչը շատ է վախեցել: Նա նկատողություն է արել, կշտամբել նրան, թե ինչու դասերը թողած՝ «Շունն ու կատվի» ետևից է ընկել:

Այդ տանը Թումանյանը ապրել է մինչև 1886 թ. հունիսը, մինչև դպրոցից հեռանալը, և այդտեղ է, որ գրել է «Շունն ու կատուն», «Անբախտ վաճառականները» և մի շարք բանաստեղծություններ:

Ընկերների հիշողությամբ՝ Հովհաննեսը աշակերտ ժամանակ բարձրահասակ, նիհար, սև ու խիտ մազերով, բարի ու մեղմ հայացքով պատանի էր. հագին ուներ շագանակագույն բլուզ, որի վրա կապում էր լայն դեղնավուն կաշվե գոտի:

Ծնողներին ուղղված նամակից երևում է, որ նա ձմեռվա վերարկու չի ունեցել. «Ստացա ձեր ուղարկած 10 ռուբլին,— գրում է նա ծնողներին,— պալտո չտա, այլ երկու մանեթ ու մի քանի շահի, որ պարտ էի, Չերչոնց տղերանցը տվի... Պալտոն ավելորդ եմ համարում, որովհետև այստեղ տաք է, ուսումնարանը տաք է և մեջտեղն էլ մի քանի քայլ, և ուրիշ գնալու տեղ չունեմ»*:

Դասընկերներից մեկը՝ Սիմոն Հովվյանը, իր հուշերում գրում է. «Ես չեմ հիշում, որ Հովհաննեսը ձմեռը վերարկու լիներ հագնելիս կամ կրկնակոշիկներ գործածելիս», իսկ դասընկերներից մի ուրիշը՝ Ան. Աբովյանը, իր հուշերում գրում է. «Տանից-գյուղից նա ամիսներով ոչինչ չէր ստանում և ապրում էր մեծ դժվարությամբ»:

Ժամկոչ Ավագի տանը, նրա բազմանդամ ընտանիքում, երեխաների լաց ու աղմուկի մեջ մի սենյակում, Թումանյանը թնավ հնարավորություն չի ունեցել ինքնամիտի և լուրջ աշխատանք կատարելու, դրա համար էլ նա երեկոները փախչում էր տնից, գնում դպրոց, իր դասընկերների հետ միասին դասերը պատրաստելու կամ շրջում էր փողոցներում և իր մտքերին անձնատուր լինում:

Դասընկերների վկայությամբ՝ նա շատ ընթերցասեր, զարգացած, կենսուրախ, սրախոս և բոլորի կողմից սիրված

* 1885 թիվ, հունվարի 1:

ընկեր է եղել: Սիրով օգնում էր թույլ աշակերտներին, գրքեր կարդում, երգեր սովորեցնում նրանց: «Սիրում էիճք Հովհաննեսին, երբ նա գյուղական կյանքից համով-հոտով պատմություններ էր անում, կատակներ անում, նյութ դարձնելով և՛ դասատուներին, և՛ ընկերներին»:

«Մեր ընթերցասեր ընկերներից մեկն էլ պոլսեցի էր, մի որբ տղա, որը ազատ կարդում էր անգլերեն լեզվով Շեքսպիրը, որով տարվեցինք ամենքս էլ, բայց ամենից շատ Հովհաննես Թումանյանը»: Այսպես է գրում իր ընկերներից մեկը՝ Ներսիսյան դպրոցի աշակերտ Տիգրան Վերանյանը: Այստեղից երևում է, որ Թումանյանի սերը դեպի Շեքսպիրը զարթնել է դեռևս աշակերտական տարիներին՝ Ներսիսյան դպրոցում:

Ընթերցասեր պատանի բանաստեղծը իր գրական կյանքի վաղ տարիներին բացի նյութական զրկանքներից, ընթերցման համար գրքեր էլ շատ դժվարությամբ էր ձեռք բերել: Իր հոդվածներից մեկում Թումանյանը գրում է. «Շատերը կհիշեն, թե 80-ական թվականներին ի՛նչքան քիչ էր գիրքը Թիֆլիսում և ի՛նչ դժվարությամբ էր ընթերցանության գիրքը ճարվում՝ թե՛ հայերեն, թե՛ ռուսերեն: Դժվար էր մանավանդ ինձ նման մի օտարական պատանու համար»:

Թումանյանի այս ընթերցասիրությունը իր դրական ազդեցությունն է արել ընկերների վրա: Ինքը սովորություն է ունեցել գրքեր հավաքել և նույն խորհուրդն է տվել ընկերներին, որոնք աշխատել են հետևել նրան:

Հովհաննես Թումանյանի արխիվում պահպանվել են նրա աշակերտական ընդհանուր երկու տետր, սևագիր: Առաջին տետրի առաջին էջի վրա գրել է իր դասացուցակը. «Դասացուցակ Ներսիսյան դպրանոցի չորրորդ դասարանի: Տիֆլիս»: Մյուս էջի վրա գրել է. «Ազգ երթայ և ազգ գայ և երկիրս յավիտյան կա»: Ընդհանուր տետրի մեջ գրված են հետևյալ առարկաները. հայոց լեզու՝ քերականություն, հին հայկական ձայնահիշերով մի երգ, ապա՝ ալգեբրա, ռուսերեն և միջին դարերի պատմություն:

Մյուս տետրում կա երեք բաժին՝ մատենագրություն, հոգեբանություն, տրամաբանություն:

Ներսիսյան դպրոցում երկու տարուց ավելի մնալով, Թումանյանը ձեռք է բերում որոշ զարգացում, հատկապես հումանիտար գիտությունների բնագավառում:

Այս շրջանում Ներսիսյան դպրոցի դասատուներն էին վիպագիր Ծերենցը (Հովսեփ Ծիշմանյանը), որը ավանդում էր հայոց պատմություն և ֆրանսերեն, Ծիլերի թարգմանիչ Գևորգ Բարխուդարյանը՝ ռուսաց պատմություն և Ռուսաստանի աշխարհագրություն, բանասեր Կարապետ Կոստանյանը՝ հայոց լեզու, հայտնի թարգմանիչ և մանկավարժ Փիլ. Վարդանյանը՝ ընդհանուր պատմություն, Գր. Վարձելյանը՝ թվաբանություն, Ամիրան Մանդինյանը՝ ընդհանուր աշխարհագրություն, Վարդան Սուլթանյանը՝ ռուսաց լեզու, բառարանագետ Աբիսողոմ Հովհաննիսյանը՝ ֆիզիկա և հանրահաշիվ, Միսակ Ասիլյանը՝ եկեղեցական պատմություն, Ակարիչ Ծամշինյանը՝ Ակարչություն և այլն: Դպրոցի տեսուչն էր Արշակ Նահապետյանը, իսկ վերակացուն՝ այն ժամանակ հայտնի «պարոն Գրիգորը»՝ Տեր-Հարությունյանը:

Իր ուսուցիչներից Թումանյանն առանձին սեր և համակրանք է տածել դեպի հայոց պատմության դասատուն՝ Ծերենցը: Այդ մասին հետագայում բանաստեղծը հաճախ է հիշում:

«Նա (Ծերենցը, Ն. Թ.) վերին աստիճանի մաքուր ու պայծառ հոգի էր, անասհման սիրելով մեր ազգի պատմությունը, այնտեղից էլ վերցրեց իր վեպերի նյութը»:

Իր անասհման սերը դեպի հայ ժողովրդի անցյալը, Ծերենցը հաղորդել է նաև աշակերտներին: Որպես մարդ և քաղաքացի, որպես հայրենասեր Ծերենցը, ըստ երևույթին, ուժեղ տպավորություն է թողել պատանի բանաստեղծի վրա: Անշուշտ սիրելի ուսուցչի ազդեցությամբ, ոգեշնչված հայ ժողովրդի անցյալով, դեռևս աշակերտական նստարանից բանաստեղծը սիրել է հայոց պատմությունը, հայ ժողովրդի ստեղծած հարուստ կուլտուրան: Դասերից դուրս նա իր գիտելիքները պատմության մասին լրացրել է ընթերցանությամբ, հավանորեն Ծերենցի հանձնարարած գրականությամբ:

Թումանյանի սերն ու հետաքրքրությունը դեպի հայ ժողովրդի պատմությունը, որ զարթնել էր նրա մեջ դեռևս մանկության օրերին՝ պատմական հուշարձաններով հարուստ իր ծննդավայրում, ապա Չալալոջյու դպրոցում սովորելիս՝ պատմության դասատու Տիգրան Տեր-Դավթյանի շնորհիվ, Թիֆլիսում իր սիրելի ուսուցչի և լայն ընթերցանության հետևանքով այդ սերը զարգանում է ու խորանում, այնուհետև հայ ժողովրդի պատմությունը դառնում է բանաստեղծի մշտական հետաքրքրության առարկան, միաձուլվում նրա ողջ ստեղծագործության հետ:

Թե որքան մեծ տպավորություն է թողել Ծերենցը Թումանյանի վրա, այդ երևում է հետագայում վիպասանի գերեզմանի վրա, նրա մահվան 25-ամյակի առթիվ ասված Թումանյանի խոսքից: Ծերենցին բնութագրում է որպես «նոր պատմական վիպագրության հիմնադիր հայ գրականության մեջ»* և մեծ հիացմունքով ավելացնում է. «Չգիտենք նրա ազատասեր ոգո՞ւ վրա հիանանք, նրա վառ հայրենասիրության ու ժողովրդասիրության վրա՞ զարմանանք, նրա հոգու ազնվության ու մաքրության վրա՞ ուրախանանք, թե նրա սրտի քնքշության ու ճաշակի նրբության վրա»**:

Իր կյանքի վերջին օրերին, վերհիշելով իր պատանեկությունը, Թումանյանը մեծ սիրով էր խոսում այդ լավ մարդու, տաղանդավոր վիպագրի ու հայրենասերի մասին:

* * *

Աշակերտական տարիներին, ինչպես ասացինք, Թումանյանը ապրել է Թիֆլիսի արվարձաններում՝ Հավլաբարում, ապա Խարփուխում, որը գտնվում էր քաղաքի ծայրամասում, քարքարոտ ժայռերի վրա: Այդ թաղամասերի բնակիչները պատկանում էին քաղաքի չքավոր դասին և ճնշող մեծամասնությամբ մանր արհեստավորներ էին: Հայերի հետ կողք-կողքի ապրում էին նաև վրացիներ. բոլորը խոսում էին թե՛ հայերեն և թե՛ վրացերեն:

* 1913 թիվ, մայիսի 26, «Թումանյանը քննադատ», էջ 259:

** Նույն տեղը:

Այդ շրջապատումն է, որ առաջին անգամ նա դիտում է
և ուսումնասիրում Թիֆլիսի արձեատավորների կյանքը,
լսում և սովորում նաև վրաց լեզուն:

* * *

Դպրոցում Թումանյանն ունեցել է մտերիմ ընկերների
շրջան, հոգեհարազատ ընկերներ, որոնց հետ նա իրեն լավ
է զգացել, կարդացել է իր բանաստեղծությունները, նրանց
մասնակից դարձրել իր ապրումներին:

Դասընկերների մեծ մասը զանազան գալառներից եկած
պատանիներ էին: Նրա ընկերական շրջապատում եղել են
դազախեցիներ, շուշեցիներ, ախալցխացիներ, գանձակեցի-
ներ, զանգեզուրցիներ և այլն: Այսպիսով, Թումանյանը հա-
ղորդակից է լինում Հայաստանի տարբեր գալառների վի-
ճակին, նրանց նիստուկացին և կյանքին: Ամեն մեկն իր
հետ բերել էր իր ծննդավայրի լեզուն, սովորությունները,
գրույցները...

Ընկերների հետ նա հաճախ զրոսանքի, պտույտի էր
դուրս գալիս Թիֆլիսի շրջակայքում, տոն օրերին մասնակ-
ցում ուխտագնացություններին, դիտում ժողովրդի նիստու-
կացը, իր երկերի համար նյութեր ժողովում:

Ընկերներից Ան. Աբովյանը հիշում է իրենց այդ զրո-
սանքները. «1884—1885 թ. թ. հաճախ գնում էինք Օր-
թաճալա և կանաչ խոտերին թիակը տալով հա՛մ խոտում
էինք, հա՛մ գարեջուր խմում՝ մեզ համալսարանի ուսանող-
ներ երևակայելով»*:

Իր դասընկերներից մեկ ուրիշը այսպես է հիշում Թու-
մանյանին. «Հոյհաննես Թումանյանին ես ճանաչում էի դեռ
1885 թ., երբ տասնմեկ տարեկան հասակում Ախալքալա-
կից գալով Թիֆլիս՝ մտա Ներսիսյան դպրոցի առաջին դա-
սարանը:

Այդ ժամանակ Հ. Թումանյանը, որքան հիշում եմ, երկ-
րորդ թե երրորդ դասարանի աշակերտ էր. նա քիչ էր մաս-
նակցում աշակերտական խաղերին, միշտ մտազբառ, խոչ
հուն, առանձին պատկառանք էր ազդում դիտողի վրա, և

* «Պատկոմ» 1928 թ. № 2, էջ 10:

կարծեք թե նույնիսկ այդ հասակում նրա շարժումների, դեմքի ու հայացքի արտահայտության մեջ նկատվում էր ինչ-որ վեհություն: Ես նրանից փոքր էի, նրա հետ առանձնապես ո՛չ ծանոթ էի, ո՛չ էլ ընկեր, միայն սրանով ուզում էմ ասել, որ մեր սիրելի Թումանյանն ուներ մի առանձին գրավչություն, որով դեռ պատանի հասակից դեպի իրեն էր գրավում ուրիշների ուշադրությունը: Չէ՞ որ կային ուրիշ հարյուրավոր աշակերտներ, բայց նրանցից շատ քչերն էն հիշողությանս մեջ մնացել»:

Առաջին անգամ Հովհ. Թումանյանն իր դասընկերների հետ նկարվել է 1885 թվի մաշիսին, երբ Ներսիսյան դպրոցի երրորդ դասարանի աշակերտ էր: Նկարվել է դպրոցի բակում: Կենտրոնում իրենց դաստիարակ Գրիգոր Վարձելյանն է, որը միաժամանակ թվաբանության դասատուն էր: Թումանյանի ձախ կողմից կանգնած էր իր մտերիմ ընկերը՝ Ծալամյան Դավիթը, իսկ աջ կողմից՝ Հարություն Ծուղուրյանը, հետագայում գյուղագիր:

Ժամանակի դեպքերից Թումանյանի վրա մեծ տպավորություն է արել Ի. Ս. Տուրգենևի մահը, որը տևող է ունեցել Փարիզում 1883 թվի սեպտեմբերի 3-ին: Այդ մասին Թումանյանը գրում է հետևյալը. «Նոր եկած օրերս էր, ընկերս մի օր այլալված տուն եկավ ու հայտարարեց, թե Տուրգենևը մեռել է... զգացի՞նք, որ մի մեծ դժբախտություն է պատահել, որ նրա վրա էդքան ազդել է, որովհետև քիչ կպատահեր, որ նա իրեն էդպես կորցներ: Եվ մենք երկու օր դես-դեն ու սրա-նրա մոտ էինք վազում միասին: Լավ չեմ հիշում, թե ինչն՛ի, բայց վազվզում էինք Տուրգենևի պատճառով»:

Նշանակալից դեր են խաղացել Թումանյանի կյանքում պատմական դեպքերը, վայրերն ու գրույցները:

Այսպես, 1877 թվի ռուս-տաճկական պատերազմի ժամանակ Թումանյանը թեև գյուղական դպրոցի աշակերտ էր (ինը-տասը տարեկան), բայց և այնպես անընդելի տպավորություններ է ստացել այդ ժամանակվա քաղաքական դեպքերից և դեմքերից: Իր առաջին ոտանավորները նա գրել է հենց այդ պատերազմի հերոսների քաջագործությունների տպավորության տակ: Ինքնակենսագրության մեջ

նա գրում է. «Ծառ վաղ եմ սկսել ոտանավոր գրել: Տասը-տասնմեկ տարեկան ժամանակս երգեր էին երգվում ժողովրդի մեջ: Այդ երգերին տներ էի ավելացնում և գրում էի զանազան ոտանավորներ՝ երգիծարանական, հայրենասիրական և սիրային»^{*}:

Աշակերտական տարիներին, ինչպես գյուղում՝ մեծերից, ծերունիներից, այնպես էլ Թիֆլիսում իր դասընկերներից, շատ է լսել ժողովրդական առակներ ու լեգենդներ. լսել է և դեռ այն ժամանակ մի մասը մշակել է ու գրել: Այդ լեգենդներից ու առակներից են՝ «Ծուռն ու կատուն» և «Անբախտ վաճառականները», որ լսել է նա իր քեռի Իսայուց ամառը՝ սարերում: Մասնավորապես «Անբախտ վաճառականների» մասին նա գրում է հետևյալը. «...Էդ առակը աշակերտ ժամանակս կոչում իմ քեռուցս եմ լսել ու տպածների մեջ իմ առաջին գրվածքներից մեկն է...

Մի ժամանակ (1885— 1887) էդ տեսակ բաներ, ժողովրդական առակներ ու լեգենդներ շատ էի գրում բարբառով ու շատ էլ ունեի, բայց որովհետև չէի պահում, դեսդեն կորան, նրանցից մնացին «Ծուռն ու կատուն», մեկ էլ «Անբախտ վաճառականները...»

Գրական վաղ տպավորությունները, առաջին կարդացած գրքերն են՝ Խ. Արովյանի «Վերք Հայաստանին», Միք. Նալբանդյանի հոդվածներն ու երգերը, Րաֆֆու «Սամվելը», որոնց ընթերցումը խոր հետք է թողնում պատանի բանաստեղծի զգայուն հոգու վրա: Նույն այդ աշակերտական տարիներին ուսս պոետներից կարդում է Պուշկինի ու Լերմոնտովի բանաստեղծությունները և պոեմներից մի քանիսը, ինչպես և Կոիլովի առակները: Բանաստեղծի կինը պատմում է. «1888 թիվն էր, երբ ամուսնացանք, Հովհաննեսը մի կապոց ուներ: Այդ կապոցում երեք-չորս գիրք կար՝ Հովերոսի «Իլիականը» և «Ռիսականը», Խ. Արովյանի «Վերք Հայաստանին» և Լերմոնտովի «Երկերի ժողովածուն»:

Իսկ ժամանակակիցները գրում են. «Ներսիսյան դպրոցի աշակերտները բոլորն էլ «Հյուսիսափայլին» էին համա-

^{*} «Ինքնակենսագրություն», 1905 թ.:

կրում և սրտատրոփ սպասում էին Կոմս Էմմանուելի գրվածքներին»:

«Զմեռվա եղանակներին հավարպում Էինք Բողոքանյա Ըի մոտ, առավելապես նրա գրքերից օգտվելու նպատակով: Խ. Աբովյանի «Վերք Հայաստանին» երկուսս էլ թե պետ վաղուց կարդացել էինք, բայց ցանկանում էինք նորից կարդալ ու չէր ճարվում: Հովհաննեսի հայրն ուներ նամակ գրեց, ողարկեցին, նորից կարդացինք»:

«Վերք Հայաստանին» լինելով դպրոցական տարիների սիրված և մի քանի սնգիւմ ընթերցված գրքերից մեկը ուժեղ ազդեցություն է թողնում բանաստեղծի վառ երևա կայության վրա, նրա մեջ զարգացնելով հայրենասիրական ջերմ զգացմունքներ:

Այսպիսով, իր կյանքի դեռևս վաղ շրջանում Թումանյանն իր վրա կրում է մեծ լուսավորիչ Խ. Աբովյանի և հեղափոխական դեմոկրատ Միք. Նալբանդյանի ազդեցությունը: Մեծ էր վերջինիս հմայքը Թումանյանի համար: Մի քայել Նալբանդյանի և «Հյուսիսափայլի» մասին գրած հոդվածում նա ասում է. «Ծառ սիրեցի եղ բաց կապույտ, շուղարձակ տետրակները և պատանեկական ոգևորության կարդում էի: Առանձնապես դուր էին եկել Կոմս Էմմանուելի «Հիշատակարանն» ու մյուս գրվածքները»: Նա առանձին սիրով ու երախտագիտությամբ է հետազայում վերհիշում «Էն օրերը, երբ հատիշտակված կարդում էի նրա գրվածքները...»

Ներսիսյան դպրոցի երրորդ-չորրորդ դասարանի աշակերտները հետևել են ժամանակի մամուլին, ծանոթ են եղել գրական պայքարին ու էջանքին: «Հյուսիսափայլից» զայնրանք կարդացել են «Նոր դար», «Մշակ» թերթերը: Այս տարիներին է, որ պատանի բանաստեղծն սկսում է գրել երգեր, լեզենդներ, պոեմներ:

Ներսիսյան դպրոցում սովորելու սկզբնական շրջանում Թումանյանի մտավոր հորիզոնը, ընդհանուր զարգացում եղել է սահմանափակ և առավելապես ազգային բնույթ կրել: Այդ է ասում ինքը՝ բանաստեղծը, երբ համեմատում իր և իր ընկերներից մեկի մտավոր զարգացումը. «...Նոնեալական դպրոցումն էր սովորում, ես՝ Ներսիսյան: Ե հաճախ իրար դեմ էինք բերում՝ ես հայկականը, նա օտար

որ՝ գլխավորապես ռուսականը՝ է՛լ գրականություն, է՛լ պատմություն, է՛լ հերոսներ, է՛լ ժողովուրդ, եւ Վարդան Մամիկոնյան էի մեջ բերում, նա դիմացը հանում էր Աքիլեսին, նա Իլյա Մուրոմեցին էր առաջ քաշում, եւ դուրս էի բերում Հայկին (էն ժամանակ Դավիթը հայտնի չէր մեր գրականության մեջ):

Հիշում եմ, թե ինչքա՛ն երկար ժամանակ և ի՛նչ տաք պատերազմ ունեցանք Տիգրան Մեծի և Պոմպեոսի շուրջը:

...Նա շատ էր ծաղրում իմ ազգասիրությունը... Եվ մի քանի տարուց հետո մեր վեճերը շատ էին փոխվել: Քանի եւ հակվում էի դեպի օտար գրականությունն ու ցրվում էի հեռուները, նա ուժեղ թափով կենտրոնանում էր հայության վրա»:

Այդ ընկերը, որի հետ 1883 թվին բանաստեղծն ապրում էր մի սենյակում, լավ գիտեր ռուս գրականությունը, ռուս գրողներից սիրում էր Տուրգենևին և Գոգոլին, «սիրում էր առանձնապես Գոգոլին, անգիր գիտեր «Տարաս «Բուլբան»: Ծարունակ կարդում էր, գիշերները ուղղակի լուսացնում էր ընթերցանության վրա: Ծառ է պատահել, որ մեր բարի Եփեմիա ձալոն, նրա հորեղբոր կինը, առավոտները կանչել է մեզ, որ գնանք տեսնենք, թե ինչպես է ընկերս սեղանի առջև նստած քնել գլուխը դրած Գոգոլի քաց գրքի վրա...»:

Թերևս այդ ընկերոջ ազդեցության տակ նա սկսում է ռուսերեն կարդալ Տուրգենևի, Գոգոլի, ռուս մյուս կլասիկների գրվածքները: Թումանյանի մտահորիզոնի լայնացմանը և գրական ճաշակի զարգացմանը նպաստում է նաև ռուս բանաստեղծների՝ Կոիլովի, Պուշկինի, Լերմոնտովի երկերի ընթերցանությունն ու անգիր անելը դպրոցում: Բանաստեղծը գրում է. «Պատանեկան հասակում, ուսումնարանում սովորած Կոիլովի առակների ազդեցության տակ եւ ռուսնավորով գրել էի մի շարք առակներ մեր կովկասյան առակներից: Դրանցից ոչ մեկը չի տպվել և չկա այժմ»:

Մեծ նշանակություն են ունենում և ազդեցություն թողնում Թումանյանի գրական ճաշակի, մտավոր զարգացման և ստեղծագործական հղացումների վրա ռուս մեծ պոետներից հատկապես Պուշկինը և Լերմոնտովը, որոնց երկերը նա

կարդում է դպրոցում և դպրոցից դուրս: Այդ և իր սիրած գործերի մասին նա հիշատակումներ է անում հետագայում, 900-ական թվականներին, գրական դեմքերին գրած նամակներում:

«... Դեռ դպրոցում սովորած, թե դպրոցից դուրս կարդացած ուսուցանողների գործերը ինձ այնքան հարազատ ու սիրելի են, օրինակ Պուշկինի «Буря мглою небо кроет», «Полтава», «Цыганы», *Կամ Լերմոնտովի «Демон», «Ангел», «Ветка Палестины», «Песнь о царе Иване Васильевиче», «Три пальмы», «Мцыри», «Тучки небесные, вечные странники», «Спор», «Выхожу один я на дорогу», «Пророк», «И скучно и грустно»*

Ինչպես ուսուցանողները, այնպես էլ առհասարակ ուսուցանող գրականությունը Թումանյանի համար դեռևս պատանեկությունից ոգեշնչման անսպառ աղբյուր են եղել: Նա մեծ ցանկություն է ունեցել գնալ Ռուսաստանի մեծ քաղաքները՝ շարունակելու իր ուսումը, մոտիկից ծանոթանալու ուսուցանողներին ու կուլտուրային:

Աշակերտ ժամանակ Թումանյանը եղել է և Րաֆֆու մոտ, «Սամվել» վեպի վրա աշխատելու շրջանում: Այդ մասին բանաստեղծն այսպես է հիշատակում իր մի հոդվածում. «Հենց էդ օրերը, դեռ աշակերտ, եղա Րաֆֆու մոտ երբ առաջին փուլով «Սամվելն» էր գրում ու սրբագրում: Մի քիչ հետո եղա նաև Արծրունու խմբագրատանը, մի երկու աննկրոտանման բան էլ տվի թերթի համար»: Իր իսկ տված նյութերից երևում է, որ Թումանյանն էլ, ինչպես առհասարակ գրողներից շատերը, առաջին անգամ գրել սկսել է թերթերին թղթակցելով:

* * *

Թումանյանը սովորություն է ունեցել իր նոր գրվածքները կարդալ ընկերների շրջանում:

«Շատ հաճախ, մանավանդ շաբաթ երեկոները, մեր ընկեր և իմ հայրենակից Մելքոն Ասլիբեկյանի մոտ երկար ժամեր մեծ գոհունակությամբ լսում էինք նրա պատմվածքները, նրա գրվածքները: Առհասարակ հրապուրիչ էր նրա խոսքը», — գրում է իր ժամանակակից հագրատ Թումանյանը:

Իսկ իր դասընկերներից մեկ ուրիշն իր հուշերում գրում է. «Դասերից հետո ընկերներով հավաքվում էինք Ալեքսանդրյան այգում, նա իրեն գրպանից թերթի կտորներ էր հանում, բանաստեղծություններ կարդում, 1885—86 թ. թ. Հովհաննեսի բանաստեղծությունների մեծ մասը ամբողջացած չէր ու տեղ-տեղ ընդարձակ լուսանցքներ էին թողնված հետագայում լրացնելու նպատակով»:

Ա.Ն. Աբովյանի վկայությամբ Թումանյանն առաջին անգամ գրական ապարեզ է մտել «Նոր դար» օրաթերթում, մի նամակ տպելով Դսեղ գյուղի ընդհանուր նկարագրության և գյուղացիների նիստուկացի մասին: Այնուհետև լոռեցիների կյանքից մի շարք նյութեր է տալիս «Նոր դարին»:

Ինչպես ասացինք, 1886 թվին, դեռևս աշակերտ, Թումանյանը գրում է «Ծունն ու կատուն» և «Անբախտ վաճառականները»:

Դասընկեր Հ. Ծուղությանը պատմում է. «Երրորդ թե չորրորդ դասարանի աշակերտներ էինք: Էն ժամանակ՝ 1885—86 թ. թ. Հովհաննեսը Եգորովի տանն էր ապրում՝ Նորաշենի փողոցի վրա: Մի քանի հոգի էինք՝ ես էի, Մելքոն Ասլիբեկյանն էր, Դավիթ Ծալամյանը... Առաջին անգամ կարդաց «Ծունն ու կատուն» և Չոփուրանց տղերանց սևագիր պոեմը՝ Լոռու ավազակների մասին: Ծատ էր ոգեվորված այդ նյութով. մեծ տրամադրությամբ էր խոսում և լավ էլ գրել էր: Նրան ոգևորում էր այդ ավազակների իգիթությունը, ազնվությունը, ասպետությունը, ճարպկությունը: Ութը եղբայր են եղել. միևնույն՝ Սողոմանն էր. կառավարությունը խիստ հետապնդել է՝ բռնել և աքսորել: Մյուսները տարիներ շարունակ Լոռվա սարերում թաքնվել են, փախել: Նրանք որքան խիստ էին ու անգույթ դեպի ունևորներն ու կալվածատերերը, էնքան մեղմ էին ու կարեկից դեպի չունևորներն ու աղքատ գյուղացիները: Հարուստներին թալանում էին, խլում, տանում տալիս աղքատներին:

Ժամանակի դեպքերից Թումանյանի վրա շատ խոր է ազդել և տպավորվել 1885 թվին, Ալեքսանդր 3-րդ ցարի ժամանակ հայկական ծխական դպրոցների փակումը: Ասում են՝ պատանի բանաստեղծի բարկությունն ու վիշտը չարի ու սահման չունեի: Զայրույթով էր լցված միապետու-

թյան դեմ: Հ. Ծուղորդյանը հիշում է, որ 1885 թ. Թումանյանը մի բանաստեղծություն է գրել դպրոցները փակելու առթիվ և իր այդ ոտանգրքի մեջ ցարին անվանել է՝ «գազան»:

Հետաքրքրական է և բնորոշ ապագա բանաստեղծի համար Հայաստանին նվիրված 1884 թ. անավարտ սևագիր բանաստեղծություններից մեկը, որը գրել է երկրորդ դասարանում.

Ինչո՞ւ ես տխուր,
Թշվառ Հայաստան,
Է՞ր է վիզդ ծուռ,
Մայր իմ սիրական:

.

Ինչո՞ւ աչերդ
Լի եմ արտասուք,
Է՞ր ես խեղճ նայում
Դեպի Արևմուտք:

Դուն ես լավ գիտես,
Որ Արևմուտքեն
Օգուտ չկա քեզ,
Զատ անբույժ վերքեն...

Այսօր էլ թարմ են հնչում սկսնակ բանաստեղծի երգի այս տողերը, որ նա իր Հայրենիքի փրկությունը Արևմուտքից չի սպասում, որ Արևմուտքը միայն «անբույժ վերք» է բերում:

* * *

Իննսունական թվականներին Ներսիսյան դպրոցի խիստ ուժիմը աշակերտներին արգելում էր թատրոն հաճախելը, բայց նրանք զաղտնի էին ներկայացումներ դիտում: Աշակերտությունն առանձնապես ոգևորված էր Պետրոս Ադամյանի խաղով:

«Այդ ժամանակ մեծ հռչակ էր ստացել դերասան Ադամյանը,— հիշում է Սիմեոն Հովվյանը,— հենց որ ձեռքերս մի քանի կոպեկ էր ընկնում, վազում էինք թատրոն: Թումանյանն առաջիններից մեկն էր լինում»:

Ինչպես պատանի Լերմոնտովը դրամատուրգիական փորձեր արել է թատրոն հաճախելուց և Մոշալովի խաղը

տեսնելուց հետո, այնպես էլ Թումանյանը պատանհի հասա-
կում ոգևորվել է Պետրոս Ադամյանի խաղով և պիեսներ
գրելու փորձեր արել:

Թումանյանն առաջին անգամ թատրոն է գնացել իր
ուսուցիչ Տիգրան Տեր-Դավթյանի հետ, որի մասին խոսում
է Պետրոս Ադամյանի մահվան առթիվ գրված իր հոդվա-
ծում:

«Ահա էս ժամանակ,— գրում է Թումանյանը,— Ադամ-
յանի թունդ ժամանակը, Լոռուց Թիֆլիս եկավ իմ հին
ուսուցիչը՝ Տիգրան Տեր-Դավթյանը, որին պարտական են
իմ հասակակից գրեթե բոլոր լուսնիները, և իր նախկին
աշակերտներից մի քանիսին հավաքեց, թե եկեք ձեզ տա-
նեմ «Համլետի» ներկայացմանը, Ադամյանին տեսեք Համ-
լետի դերում: Տարավ: Տեսանք: Էդ գիշերը ինձ համար
եղավ մի կախարդական գիշեր և գրեթե վճռական նշանա-
կություն ունեցավ իմ ամբողջ գրական կյանքում: Էդ գիշեր
ես էնքան սիրեցի Համլետը և հետո էլ Օեքսպիրը, որ մի
քանի դրամս գրեցի ու միշտ ոչնչացրի, որովհետև... Օեքս-
պիրի գործերի նման չէին դուրս եկել: Սակայն էնքան ուժեղ
էր կախարդանքը, որ մինչև օրս էլ ես ինձ ավելի դրամա-
տուրգ եմ համարում, քան ուրիշ մի բան»:

«Էն գիշերից հետո, ես գաղտնի ճանապարհով դարձ-
յալ ընկա Ադամյանի ներկայացումներին, մինչև անգամ
մի գիշեր էլ խաղացի նրա հետ: Էդ խաղը, որ բոլորովին
անակնկալ մի սկանդալ դուրս եկավ ու խեղճ Ադամյանին
գրեթե սպանեց բեմի վրա, հենց էդ խաղն էլ պատճառ
եղավ, որ ես ծանոթացա նրա հետ: Էդ էլ էսպես եղավ:
Պոլիսից Թիֆլիս էր եկել ժամանակին հայտնի դերասան
Կյուրեղյանը և, եթե չեմ սխալվում, տիկ. Հրաչյայի հետ
«Վարդան Մամիկոնյան» էին խաղալու: Ահա այդ խաղի
մեջ Ադամյանն էլ վերցրել էր Եղիշեի դերը: Վարդան Մա-
միկոնյան... Եղիշե... Ադամյան... Ես էլ Ներսիսյան
դպրոցի աշակերտ,— վճռեցի՝ տեսնել, ինչ ուզում է լինի,
թեկուզ դպրոցից դուրս անեն: Մի բարի հոգի ինձ սովոր-
եցրեց, թե էնպես մի կարճ ու ապահով ճանապարհ կա,
որ համ Ադամյանին կտեսնեմ, համ Վարդան Մամիկոնյա-
նին, դեռ նրանց հետ էլ կխաղան ու քեզ էլ դպրոցից դուրս
չեն անիլ:

— Ի՞նչպէս:

— Թե՛ ներկայացումից առաջ կգնաս բեմի ետևը, կհայտնես, որ ուզում ես զինվոր խաղալ, կընդունեն, շորերդ կփոխեն, բեղեր կշինեն, ու կլինես բեմի վրա. էլ ո՛չ կճանաչեն, ո՛չ դուրս կանեն:

Փոխանակ մի ժամ առաջ գնալու, ես մի քանի ժամ առաջ գնացի, մինչև իրիկնասպահ սպասեցի: Իրար ետե-
վից եկան, հարցուփորձ արին, վերջապէս ինձ ընդունեցին հայոց զինվոր: Շորերս փոխեցին, տրիկո հագցրին, գույնը գոյն լանջասպանակ հագցրին, մի ոսկեզօծ կարտոնե ոտաշաւարտ կոխեցին գլուխս, մի փայտե սուր կախ արին կողքիցս, սուր ծերը արծաթի գույն թղթով պատած, մի նիզակ էլ ձեռս տվին, և արդեն կազմ ու պատրաստ էի մեծ պատերազմի համար:

Էսպէս կերպարանափոխված ու զինավառ՝ որ հայելու մեջ ինքս էլ ինձ տեսա՝ լցվեցի գործի լրջության գիտակցությամբ: Ռուս զինվորներ էին բերել, նրանց հետ տարան մի երկու անգամ էլ բեմի վրա պտտեցրին, փորձ արինք, թե որ կողմից պետք է մտնեինք, ինչ անեինք ու ինչ ասեինք՝ և ընդամենը ասելիքներս մի քանի բացականշություններ էին— «Կեցցե՛ Վարդան», «Կեցցե՛ գորավար» և սրա նման բաներ, նրանից հետո մտնել պիտի խաղայինք, իբրև պատերազմի դաշտում Ավարայրի դաշտում սպանված հայ զինվորներ: Ահա հենց այդ սպանված զինվորների դերն էր, որ ես չկարողացա կատարեմ ու դուրս եկալ սկանդալ: Վերջին գործողությանը, վարագույրը բանալուց առաջ, մեզ տարան պտտեցրին զանազան տեղեր՝ թե՛ դաշտում, թե՛ լեռնալանջերին, իբրև սպանված ու թափված զինվորներ: Ես ընկա մի լեռնալանջ: Բանն էն է, որ էդ լեռնալանջ ասածդ կտափի վրա նկարած լեռներ ու ժայռեր են, ետևից տեղ-տեղ արանք-արանք տախտակներով շինած: Էդ տախտակների վրա պտտեցինք՝ իբրև լեռնալանջերին: Ես էլ, ինչքան կարող էի, պատմական մեծ ողբերգությանը վայել մի դիրք ընդունեցի, սաղավարտս ու նիզակս էլ մի կողքիս ընկած, տախտակի լեռքով մին պտտեցի, քայց էնպէս պտտեցի, որ կարողանամ ներքև՝ դաշտին նայեմ, որ մի սևացած արկղի վրա, իբրև ժայռի վրա գալարվելով ու «ա՛խ, Հայաստան, Հայաստան...» մրմնջալով, մեռնում էր Վարդան Մամիկոն-

յանը— Կյուրեղյանը: Նրա մոտ պիտի գային և Վասակի կինը՝ տիկին Հրաչյան, և վերջապես Եղիշեն՝ Ադամյանը ծեր Ծառուկի հետ:

Վարագույրը բացվեց, առաջին անգամ էի քեմից հասարակություն տեսնում. անհամար գլուխներ ու աչքեր, բոլորը հառած դեպի մեզ: Բեմի վրա կես մութ, լուսնյակ գիշեր և խորհրդավոր լուռություն, միայն Վարդանն է, որ ոլոր-մոլոր է գալիս ու ցնվալի մրմնջում.— «Ա՛խ Հայաստան, Հայաստան...»

Ահա եկավ Սաթենիկը, մի բաժակ գինի ձեռին, որ Վարդանի համար է քերում Հայաստանից:

Ոտներս ինձ քաշեցի, սրան ճանապարհ տվի: Գնաց ներքև, սկսվեցին նրանց փոխադարձ ողջագուրանքները, գուրգուրանքներն ու սրբազան ոխտերը...

Մի՞ն էլ հանկարծ թատրոնը թնդաց ծափերից, գլխիս վրա հայտնվեց Եղիշեն— Ադամյանը ծեր Ծառուկին հեռված:

— Ծո՛, ճանապարհ տուր...

Ոտներս դարձյալ ինձ քաշեցի, սա էլ անցավ:

— Վարդա՛ն, իմ Վարդա՛ն...— մրմնջալով Ավարայրի դաշտն իջավ: Հենց դաշտն իջավ թե չէ, որ պիտի խաղա— ս՛ըս՛... հասարակությունը ամեն կողմից ս՛ըս՛ արավ ու լռեց, պատրաստվեց: Էդ ժամանակ ես էլ ուզեցի պատրաստվեմ, որ լավ լսեմ ու տեսնեմ. վիզս որ ծռեցի, թեքեցի դեպի ներքև, անկանոն դիրքի պատճառով թուրս կատիկս թռավ թե ինչ՝ հանկարծ մի հազ բռնեց ինձ: Ես ցնցվում եմ ամբողջ մարմնով, ինձ հետ շարժվում ու ճոճոճում է ամբողջ դեկորացիան, բոլոր տախտակներն ու կտավները— այսինքն բոլոր սարերն ու ժայռերը, և հակառակի նման էն ամենահանդիսավոր բոպեին, թատրոնի խորին լուռության մեջ: Թատրոնում ընդհանուր ծիծաղ բարձրացավ, գալերեան սկսեց աղմկել ու աղաղակել—բրա՛վո՛... բի՛ս, կեցցե՛ն հայոց քաջերը.. և այլն, և այլն:

Խեղճ Ադամյանը մնացել էր քարացած, մեջտեղը կանգնած: Վերջապես հագս դադարեց, ժողովուրդը հանգըստացավ, նորից ս՛ըս՛, նորից լուռություն: Ադամյանը մի փոքր էլ սպասեց ու խաղաց: Գործողությունը վերջացավ: Վարագույրն իջավ թե չէ՝ ժողովուրդն սկսեց դղրդալի ծա-

փառարություններով Ադամյանին կանչել, իսկ Ադամյանը տեղից թռավ դեպի մեռելները՝ կատաղած գոռալով.

— Ան ո՛վ էր, ծո՛... — բայց ժամանակ չկա, էնտեղ կանչում են, վարագույրը բարձրացնում են: Գնաց: Էս խառնակ դրությունից օգտվելով փախա, զինվորական համազգեստս հանեցի ու փախա դեպի պարտերը: Ծանապարհիմ, դեպի բեմի ետևը եկողները հարցնում էին, թե էն ո՛վ էր, որ էնպես հազում էր ու աչքերն էլ բաց ներքև նայում: Ես մտածեցի, որ էս աչքերի բացն էլ քանի չեն իմացել, շուտով թողնեն բեմական ասպարեզը, գնամ տուն:

Մյուս օրն էր, թե մեկ երկու օրից հետո, պատմեցին, թե այժմ Ադամյանն էլ բարկացած չէ, ծիծաղելով է պատմում Լո դեպքը և հարցնում է, ուզում է ինձ տեսնի: Ես գնացի, զարմանալի սիրով ու քաղաքավարությամբ ընդունեց, մանավանդ երբ իմացավ Ներսիսյան դպրոցի աշակերտ եմ և ինչ պատճառով էի գնացել, իրեն գրքերից մի՞նն էլ նվիրեց ի հիշատակ իմ կարճատև, բայց աղմկալի բեմական գործունեության: Նրանից հետո մի քանի անգամ եղա մոտը:

Ինձ թվաց մի շատ քաղաքավարի ու քնքուշ, բայց հիվանդ մարդ, և, չգիտեմ ինչու, մեռակ մարդ: Գուցե էն էր պատճառը, որ հյուրանոցում էր ապրում, չգիտեմ, բայց մեռակ մարդ...»*:

Թումանյանն իր այդ հուշերում գրում է, թե զինվորի դերը անհաջող խաղալուց հետո բեմական ասպարեզը թողի, բայց ինչպես երևում է նրա կենսագրական փաստերից, 90-ական թվականներին իր ընկեր գրողների հետ միասին, որպես սիրող, մասնակցել է զանազան ներկայացումների: Ինչպես օրինակ՝ 1894 թվին Ղ. Աղայանի, Թիրվանզադեի հետ մասնակցել է «Ուրիել Ակոստայի» բեմադրությանը, որի մասին ժամանակին գրվել է մամուլում:

* * *

1885—86 թվերին դպրոցը Թումանյանին այլևս չի բավարարում, նա մտածում է դպրոցը թողնելու մասին:

* «Ադամյանի օրերից», 1916 թ. հունիսի 8, «Թումանյանը քննադատ», էջ 867—871:

«Եվ շատ կարդալուց էր գուցէ, որ նրա ճաշակը էնքան զարգացաւ, որ նա էլ չէր հաւանում դպրոցն ու այնտեղի դասավանդութիւնը,— գրում է Ան. Արուլյանը,— այնպէս որ շարունակ ձգտում էր դպրոցից դուրս գալ, պատրաստու- վել և գնալ ուրիշ տեղ բարձրագոյն ուսում ստանալու:

Դպրոցից դուրս գալուց հետո նա սկսեց հաճախել քա- դաքային գրադարան-ընթերցարանը և գրքեր կարդալով պարապել»*:

Դպրոցից հետո Թումանյանին մշտապէս զբաղեցնող խնդիրներից մեկը, նրա երազը ուսումը շարունակելն էր, մի բան, որի մասին շատ են մտածել և՛ ինքը, և՛ իր մո- տիկ ընկերները, բայց գուրկ լինելով նյութական հնարավոր- րոյնություններից, չեն կարողացել իրենց ընկերոջ համար նպաստավոր պայմաններ ստեղծել: Այդպիսով, Թումանյա- նին չէր հաջողվում իր իղձն իրագործել, գնալ Մոսկվա, Պետերբուրգ՝ ուսումը շարունակելու...

Իր այդ իղձը նա փայտիայել է նաև հետագայում: 1900 թ. գրած նամակներից մեկում գրում է. «Ես ավելի համեստ մի ցնորք ունեմ՝ գնալ մի երկու տարի մնալ Պետերբուրգ կամ Մոսկվա, բայց ամաչում եմ ասել...»

Թումանյանը մեծ կարևորություն էր տալիս ինքնազար- գացմանը: Դպրոցը թողնելուց հետո նա աշխատում է ըն- թերցանությամբ լրացնել իր ուսման պակասը, բացի այն, որ օգտվում է գրադարաններից, այլև իր սուղ միջոցներից որոշ գումար է հատկացնում գրքեր գնելուն: Այդ շրջանի ընկերները, տեսնելով իրենց ընկերոջ ընթերցասիրությունը, օրինակ են առնում նրանից և իրենք էլ սկսում են գրքեր գնել: Դասընկերներից մեկը գրում է. «Ես տեսնում էի, որ նա գրքեր էր հավաքում, կարդում էր և առհասարակ ընթերցասեր էր: Հաճախ ինձ էլ էր խրախուսում ընթեր- ցանությամբ պարապել»:

Ինքնազարգացման, անհագ ընթերցանության շնորհիվ նրա մտափորիզոնը լայնանում է, մտավոր պաշարը հարըս- տանում, նրա աշխարհայացքը դեռևս պատանի հասակում ուկտում է կազմակերպվել, ձևավորվել:

* Ան. Արուլյան. «Հիշողություններ Հովհ. Թումանյանի կյանքից», «Պատկոմ», Երևան, 1923 թ., № 2, էջ 11:

Ամառվա արձակուրդներին Թումանյանը առաջիններից
 և լինում, որ հայրենակից դասընկերների հետ ձիով ճա-
 նապարհվում է դեպի Լոռի, իր ծննդավայրը:

«Հովհաննեսը, երբ սովորում էր Թիֆլիսում, ամառները
 միշտ գալիս էր գյուղ,— վկայում է քանաստեղծի կրտսեր
 եղբայրը:— Սիրում էր հանդերը ման գալ, զանազան ժայ-
 րերի կամ խաչարձանների վրա փորագրություն կատարել:
 Մեզ՝ փոքրերիս, տանում էր որսի, ձորերը ման ածում, խո-
 սում էր, կարդում, պատմում և այդպիսով միշտ ուշանում
 էինք անտառներում կամ ձորերում: Հայրս և մայրս շատ
 բարկանում էին մեզ վրա, բայց ավելի շատ Հովհաննեսի
 վրա, թե՛ ամենամեծը դու ես, և դու էլ չես մտածում ըն-
 տանիքի և ապրուստի մասին,՝ երեխաներին էլ խաբում ես
 ու հետդ տանում:

Քիչ ժամանակ անց հայրս մեղմանում էր և հարցնում,
 թե ինչ նոր երգ ենք սովորել Հովհաննեսից: Ասում էինք
 մեր սովորած երգերը՝ «Անհոգ ես, չգիտես ինչ կա
 քո մասին», «Ազնիվ ընկեր, մեռանում եմ» և այլն:

Մայրս ամեն առավոտ մեզ վաղ էր արթնացնում, իսկ
 հայրս բարկանում էր մորս վրա և ասում՝ թող երեխաները
 քնեն: Մայրս Հովհաննեսին չէր արթնացնում, ասում էր՝
 նա օտար տեղից է եկել, ո՞վ գիտի քաղաքում շատ է քնել,
 թե՛ քիչ:

Մենք՝ փոքրերս, Հովհաննեսի հետ գաղտնի պայման
 ունեինք, որ հերթով ամեն առավոտ մեկումեկս պետք է
 քնեինք նրա անկողնում: Այս բոլորը կատարվում էր ամա-
 ռային կալի աշխատանքների օրերին»:

1886 թվի գարնանը ոգեշնչված Լերմոնտովի ազատա-
 տենչ պոեզիայով, հատկապես՝ «Մծիրիով» և Շիլլերի
 «Ավազակներով», Թումանյանը, դարոցը թողնելով, հեռա-
 նում է դեպի Լոռի՝ իր հայրենի լեռների գիրկը: Լոռու ձո-
 րերում նա հանդիպում է ցարիզմի դեմ ըմբոստացած Չո-
 փուրի տղաներին, որոնք այդ ժամանակ ապաստան էին
 գտել Լոռու ձորերում:

Թումանյանի կյանքի այդ շրջանի օրերը հիշում է քանաստեղծի դարոցական ընկերներից Ս. Հովվյանը, որը գրում է. «1886 թվականի ամառվա ծիրանի սեզոնն էր, ուրեմն հունիսի վերջը կամ հուլիսի սկիզբը: Ես այդ օրերը մուգունլար էի գնացել պապոնցս գյուղը, և ապա մուգունլարի ձորը և այգիները՝ հորաքրոջս այգուց ծիրան բերելու: Իջա Դեբեդի ձորը, և ահա, Օհաննեսը տրեխները հագին, սևամորթ փափախը գլխին, բերդանկա կոչված հրացանը ուսին Չոփուրի տղա Ռամազի հետ էր: Հովհաննեսը այդ շրջանում կարծես մի յուրահատուկ Կարլ Մոորի է նմանում»:

Չոփուրի տղաները ցարական արյունալի ռեժիմի դժբախտ զոհերն էին, որոնք թափառում էին Լոռու լեռներում և ձորերում, նեղում էին հարուստներին և օգնում չքավոր գյուղացիներին:

Դեբեդի ձորումն է, որ նա հանդիպում է ծերունի այգեսպանին՝ Ղոխնանց Պապին, զրույց է ունենում գյուղացու ծանր, չարքաշ կյանքի մասին, տեսնում ութսունամյա ծերունու գրկանքներով լի կյանքը, և նրա մեջ առաջանում է «Հառաչանք» պոեմը գրելու գաղափարը:

Ղոխնանց Պապի հետ ունեցած իր հանդիպումը քանաստեղծը հիշում է և իր կյանքի վերջին օրերին, Մոսկվայում.

«Աշակերտ վախտս էր: Ղոխնանց Պապը* մեր ձորում գիշերները կրակի դրաղին չիբուխը սարքում էր, հեքիաթներ ասում: Դեբեդը վշտում էր... ձորերը թշտում, ձեն տալի... պախրեն գոռո՛ւմ էր... Ղոխնանց Պապը պատմում էր, մենք էլ ականջ էինք դնում... Լավ պատմող էր... Էդ պատմածներից կտորներ ունեմ «Հառաչանք» պոեմում»:

Թումանյանն իր ընկերներից շատերին է պատմել Չոփուրի տղաների կյանքից, ասել է, որ մի պոեմ, մի դյուցազներգություն պիտի գրի, այդ պոեմը «Հառաչանքն» էր, որը, սակայն, մնաց անավարտ:

Այլ. Իսահակյանը, որին նույնպես Թումանյանը ոգևորված պատմել է Չոփուրի տղաների պատմությունը, իր հուշերում գրում է. «Օհաննեսը պատանի հասակից տենչացել

* Ղոխնանց Պապը (1818—1906) Լոռու Այգեհատ գյուղից է, ազգեսպան: Մշտապես ապրելիս է եղել Քոբեթի մոտերը իր այգում: Լավ պատմող և զրույց անող ծերունի է եղել, իմացել է շատ հեքիաթներ, սուսկներ, նաև «Հազարան բլբուլ» հեքիաթը:

Է գրել մի պոեմ՝ նրանց հերոսական կռիվների մասին. «Հառաչանք» պոեմի զարմանալի գեղեցիկ հատվածն այդ չիրականացած պոեմի թանկագին մնացորդն է»:

«Հառաչանք» պոեմը գրված է որպես բողոք ցարական կարգերի դեմ: Պոեմը լրիվ մեզ չի հասել, այլ մնացել են հատվածներ: «Հառաչանքի» առաջին տարբերակը, ինչպես ինքն էր ասում, խուզարկության ժամանակ (1908 թ) անհետացել է:

Ներսիսյան դպրոցից հեռանալուց հետո Թումանյանը միառժամանակ մնում է գյուղում: Ուսումը շարունակելու բուն ցանկությունը սրտում, ամառն անց է կացնում գյուղացիների շրջանում, շրջագայում է մոտակա վայրերը, մասնակցում է գյուղական աշխատանքներին, երազում նորից վերադառնալ Թիֆլիս:

«Նա ավելի սիրում էր անասուններն արոտ տանելը, տավարածությունը: Տանում էր անասուններն ազատ թողնում անտառում, ինքը մի քարի գլխի նստած կամ մի ծառի տակ պառկած անձնատուր լինում իր ցնորքներին...»

Մեջքի վրա պառկած, մտազբաղ աչքերը հառած հոյակապ երկնականարի խորքը կամ այնտեղ մխված քարձր գագաթներին, գլխի վերևը շարժվող տերևների մեղմ շրջուցի, թռչունների ծվոցի ու ծվվոցի ձայներով թովված, արթուն երազներ էր տեսնում:

Ահա Թիֆլիսը, հի՛ն ահագին Թիֆլիսը... դանդա՛ղ, լայնածավալ Քուռը խաղաղ թավալվում է քաղաքի գոռոցի, հարալիրոցի մեջ:

Ահա հրաշալի տները... քարվանսարանները... ահա Ներսիսյան դպրոցը՝ հոյակապ տաճարն ուսման... մանուկների, պատանիների:

17 տարեկան պատանին, ամառը ապրելով գյուղում, երազում է թողած դպրոցը, հիշում է իր դասընկերներին: Գյուղացիների շրջանում նա տեսնում է գյուղացիների ծանր կյանքը, դաժան իրականությունը, տեսնում է ինչպես գյուղացուց կոռ ու քեզար են պահանջում, և այդ տպավորությունների տակ է, որ 1887 թվին գրում է իր առաջին պոեմը՝ «Մարոն», «Արև և լուսին» լեգենդը, «Գուրթանի երգը», «Հին օրհնություն», «Ամառվա գիշերը գյուղում» բանաստեղծությունները և այլն:

1886 թ. աշնանը Թումանյանը վերադառնում է Թիֆլիս: Այնու հնարավորություն չունենալով շարունակելու ուսումը, նա իր ժամանակն անց է կացնում քաղաքային գրադարան-ընթերցարաններում գրքեր կարդալով, թիֆլիսաբնակ լոռեցիների շրջանում՝ զրույցով և նյութեր հավաքելով: Հաճախ լինում էր գործակատարների, արհեստավորների շրջանում: Ինքն էլ շատ կարճ ժամանակով ծառայում է խանութներից մեկում: Այդ հանդիպումները առիթ են դառնում մոտիկից դիտելու և ճանաչելու բազազ Արտեմի, գործակատար Վասույի և փոքրիկ Գիքորի տիպերը:

Հարազատներից, հայրենի շրջանի բանիմաց ծերունիներից շարունակ ժողովրդական խոսք ու զրույց, առակ ու լեգենդ հավաքելով, անմիջականորեն ժողովրդական ստեղծագործության վճիտ աղբյուրից նյութեր քաղելով, պատանի բանաստեղծը մշակում է զրանք և ստեղծում իր գոհարները:

Իր հայրենակիցների շրջանում ժողովրդական լեգենդներ, առասպելներ, զրույցներ ժողովելով, միաժամանակ ուսումը շարունակելու փորձեր է անում, սակայն ասպարհյուն: Հակառակ նրա այդ ցանկության, 1887 թ. օգոստոսին, ստիպված, պաշտոնի է մտնում Թիֆլիսի հոգևոր կոնսիստորիա:

Սակայն պաշտոնի մտնելով նա չի կտրվում ո՛չ գրքից ո՛չ էլ գրականությունից: Ընդհակառակը, իր ազատ ժամերը նվիրում է ընթերցանությանն ու ստեղծագործությանը: Հենց այս տարիներին նա գրում է և հրատարակում իր Պշանափոր լեգենդներից ու սյոնեմներից մի քանիսը և մի շարք բանաստեղծություններ: Հետագայում մշակում է զրանք, դարձնում բյուրեղացած գործեր:

Բանաստեղծի տպավորվող և զգայուն հոգին ստեղծագործական բուն շրջան է սպրում: Գրագրի պաշտոնը թեև լրիվ չի ապահովում նրա կյանքը, բայց տալիս է որոշ ինքնուրույնություն, քաղաքում ապրելու և գրադարաններից օգտվելու հնարավորություն:

Ահա այդ տարիներին է, որ սկսվում է երիտասարդ Հովհաննես Թումանյանի ստեղծագործական վերելքը: Սակայն այդ մասին կխոսենք բանաստեղծի լրիվ կենսագրության մեջ:

ԲՈՎԱՆԴԱԿՈՒԹՅՈՒՆ

Բանաստեղծի ծննդավայրը	3
Պապերը	10
Հայրը	15
Մայրը	20
Անհոգ եզնարածը	22
Խաղերի և հեքիաթների աշխարհում	25
Բնության գրկում	30
Սարերում	35
Գյուղացիների հետ	40
Դսևդի դպրոցում	46
Զալալօղիում	50
Դպրոցական տարիները Թիֆլիսում	59

Թումանյան Նվարդ Հովհաննեսի ԹՈՒՄԱՆՅԱՆԻ ՄԱՆԿՈՒԹՅՈՒՆԸ

Туманян Нвард Оганесовна
ДЕТСТВО ТУМАНЯНА

Для среднего и старшего школьного возраста

(На армянском языке)

Издательство «Советакан քոչ»

Ереван, 1983

Խմբագիր՝ Ռ. Հ. Քալաշյան, նկարիչ՝ Ա. Վ. Հովհաննիսյան, գեղ.
խմբագիր՝ Ս. Գ. Սաֆյան, տեխն. խմբագիր՝ Մ. Է. Մաննապանյան,
վերստուգող սրբագրիչ՝ Է. Ս. Սեդրակյան

ИБ 4752

Հանձնված է շարվածքի 20. 04. 83: Ստորագրված է տպագրության
14. 09. 83: ՎՋ 09483: Ֆորմատ 84×108¹/₃₂: Թուղթ՝ տպագր. № 2: Տա-
նաստեսակ «Նորք»: Տպագրություն՝ բարձր, 4,41 պայմ. տպ. մամ., 4,61
պայմ. ներկ. թերթ. 3,8 հրատ. մամ., + 2 ներդիր: Տպաքանակը 10.000:
Պատվեր 530: Գինը՝ 15 կ.:

«Սովետական գրող» հրատարակչություն, Երևան—9, Տերյան 91:

Издательство «Советакан քոչ», Ереван-9, ул. Теряна, 91.

ՀՍՍՀ հրատարակչությունների, պոլիգրաֆիայի և գրքի անտրի գոր-
ծերի պետական կոմիտեի № 2 տպարան, Երևան, Տերյան 44:

Типография № 2 Госкомитета по делам издательств, полиграфии
и книжной торговли Арм. ССР, Ереван, ул. Теряна, 44.

